

祿者乎是以不敢畏當塗避聚怒愛微軀保妻子心知時事之可憂而塞默不言也竊覩陛下英睿之性希世少倫即位以來勵精于治恥為繼躅守成之常主高歆慕堯舜之隆下不失漢唐之盛擢俊傑之才使之執政言無不聽計無不從所奪者超遷所毀者斥退垂衣拱手惟其所為推心置腹人莫能間雖齊桓公之任管仲蜀先主之任諸葛殆不及也執政亦悉心竭力以副陛下之所欲恥為碌碌守法循故事之臣而每以周公自任是宜百度交正四民豐樂頌聲旁洽嘉瑞沓至六年之間百度紛擾四民失業怨憤之聲所不忍聞災異之大古今罕比此

其故何哉豈非執政之臣所以輔陛下者未得其道歟所謂未得其道者在于好人同己而惡人異己是也陛下既全授之以威福之柄使之制作新法以利天下是宜與衆之捨短取長以求盡善而獨任己意惡人攻難羣臣有與之同者則擢用之不同者則禍辱隨之人情誰肯去福而取禍棄榮而就辱是以天下之士躁于富貴者翕然而附之爭勸陛下益加委信順從其言嚴斷刑罰以絕異議如是者往往立取美官比年以來中外執事權者皆此類也其有懷忠直守廉恥則擯斥廢棄或罹罪戾無所容立至于臺憲之官天子耳目所以規朝政之

闕失糾大臣之專恣此則陛下當自擇而亦使執政擇彼專用親愛之人小有所違即加貶逐以懲後來必得便佞之尤者然後使為之如此則執政之愆繆羣臣之姦慝生民之疾苦遠方之冤抑陛下何得而聞之又奉使詢訪利害于四方者亦其所親愛之人皆先稟其旨憑其氣勢以驅迫州縣之吏善惡係其筆端升黜由其唇吻彼州縣之吏承迎奉順之不贍奚暇與之論利害立同異哉及其入奏則言州縣守宰咸以為便經久可行陛下但見其文書燦然可觀以謂法之至美詢謀僉同豈知在外之所為也或有更增其條目務為新巧互陳利病各事改

張使畫一時之法日殊月異久而不言吏民莫知所從蓋由襲故則無功出奇則有賞彼皆進身之私計非有益國便民之心也又令使者督責所在監司督責所在州縣上下相驅競為苛刻奉行新法稍不盡力則謂之非才不職也及沮壞新法立行停替或未熟新法誤有違犯者皆不理赦降官去官與犯贓罪者同而至于犯私罪者州縣之交惟奉行文書求免罪戾之不懈民事不復留心矣又潛遣邏卒聽市道之人有誹謗者執而刑之又出榜立賞募人告捕誹謗朝政者臣不知自古聖帝明王之政固如是耶昔堯稽于衆舍己從人舜誠羣臣曰予違汝

弼汝無面從退有後言此其為帝王稱首也秦惡聞其過殺其直諫之士禁偶語之人及其禍敗行路之人皆知之而已獨不知此其所以為萬世之明戒也子產相鄭鄭人遊于鄉校以議執政或為諸毀之子產曰何為而毀之夫人朝夕退而遊焉以議執政之善否其所善者吾則行之其所否者吾則改之是吾師也若之何而毀之吾聞忠善以損怨不聞作威以防怨嚴為之防豈不遽止然後防水大決所犯傷人必多吾不免救也不如小決使薰吾聞而藥之也何今之執政異于古之執政乎齊景公謂梁丘璩曰維璩與我和夫晏子曰璩亦同也安得為和

和如和羹焉水火醯醢鹽梅以烹魚肉宰夫和之齊之以味濟其不及以減其過君子食之以平其心君臣亦然君所謂可而有否焉臣獻其否以成其可君所謂否而有可焉臣獻其可以替其否是以政平而民無爭心今璩不然君所謂可璩亦曰可君所謂否璩亦曰否若以水濟水誰能識之今朝廷之臣對揚啟沃其有異于梁丘璩者乎衛侯言計非是而群臣之和者如出乎一口子思曰以吾觀衛所謂君不君臣不臣也人主自臧則衆謀不進事是臧之猶以衆謀况和非以長惡乎夫不察事之是非而悅人之贊已暗莫甚焉不度理之所在而阿諛求容

諂莫甚焉君暗臣諂以在民上民不與也若以不己國無類矣
子思之言于衛侯曰君之國事將日非矣君出言非自以為是
而卿大夫莫敢矯其非卿大夫亦自以為是而士庶人亦莫敢
矯其非君臣既曰自賢矣而上下同轂而贊之贊之則順而有
福矯之則逆而有禍如此則善安從生今執政主新法而上下
同志而贊之亦有異于衛國之政乎是以士大夫憤悶鬱結視
屋竊嘆而不敢言庶人飢寒憔悴號泣而無所告此則陛下所
謂忠謀讜言鬱結于上聞而阿諛壅閉以成其私者也苟忠讜
退伏阿諛滿側而歆望百度之正四方之富頌轂之洽嘉瑞之

臻固已難矣今朝廷之闕政其大者有六而已一曰廣散青苗
使民負債日重而縣官責無所責二曰免上之役歛下民之錢
以養浮浪之人三曰置市易之司與細民爭利而定耗散官物
四曰中國未治而侵擾四夷得少失多五曰排結保甲教習凶
器以擾農民六曰信狂狡之人妄興水利以勞民費財若其他
瑣瑣未盡之事皆不足為陛下道也捨其大而言其小捨其急
而言其緩外有獻貢之迹內懷附會之心是姦邪之尤者臣不
敢為也凡此六者之為害人無貴賤愚知莫不知之乃至陛下
左右前後之人日譽新法之善者其心亦知其不可但希合聖

心附會執政以盜富貴耳一旦陛下之志移則彼之所言亦異耳臣今不敢復費簡札特叙六者利害以瀆聖聽但願陛下勿問阿諛之黨勿詢權臣之心斷志罷之必有為陛下言其詳者矣此六者之中青苗免役為害尤大夫力者民之所生而有也穀帛者可以耕桑而得也至于錢則縣官之所鑄民不得私為也自未行新法之時民間之錢固已少矣富商大賈藏鏹者或有之彼農民之富則不過占田稍廣稍穀稍多室屋修完耕牛不假而已未嘗有積錢巨萬于家者其貧者藍縷不蔽形糟糠不充腹春指夏熟夏望秋成或為人耕種資以為生亦未嘗識

錢也故古之取民者各因其所有而取之故農民之役不過出力稅不過穀帛自唐末興兵始有稅錢者故白居易訛之曰私家無錢爐平地無銅山言責成于所無也今有司之為法則不然無問市井田野之人由中及外自朝至夕惟錢是求農家值豐則賤糶所收之穀以輸官比常年之價或三分減一于斛斗之中或十分加二以求售于人若值凶年無穀可糶而吏責其錢不已欲賣田則家家賣田欲賣屋則家家賣屋欲賣牛則家家賣牛既無所售則不免代桑柘撤室屋以賣其薪或殺牛以賣其肉然後得錢以輸官然民一年如此則明年恃何以為生

也故自行新法以來農民有被害農者天下之本也農既失業
餘民安取食哉今貨益重物益輕年雖飢饉物不甚貴而民倍
因為國計者豈可不少思其故哉此皆歛錢之咎也今北盡塞
表東被海涯南踰江淮西抵巴蜀自去歲至冬絕少雨雷事并泉
溪澗往往涸竭三麥無收民已絕望孟夏過半種耒入土中下
之戶太抵乏食採木末食草根以延旦暮苦又如此其當奈何
當此之際而州縣之吏督責青苗免役不敢少緩鞭笞縲絏惟
恐不追父子皇皇如在湯火號泣呼天無復生望臣恐烏窮則
啄獸窮則攫民因已極矣而無救恤羸者不轉死于溝壑壯者

不聚而為盜賊將何之矣若東西南北所在嘯聚連羣結黨日
流月蔓瀰滿山澤盜藉城邑州縣不能禁官軍不能討當此之
時方議罷去新法又何益哉綠林黃巾赤眉之徒自何而有皆
苦于賦歛復飢饉窮困無聊之民耳此誠宗廟社稷深憂而廟
堂之上方且晏然自得以為太平之業八九而已此臣之所痛
心疾首晝則忘食夜則忘寢不避死亡歆嘿而不能也易復之
初九曰不速復祇悔元吉言能改過不速則雖悔之不大至上
六曰迷復凶有災眚人人用行師終有大敗以其國君凶至于
十年不克征言迷而不復凶且有災于君道尤不利者也昔

秦穆公敗于崤秦誓曰惟古之謀人則曰未就于忌惟今之謀人姑將以為親雖則去然尚猶詢茲黃髮則罔所愆蓋悔弃老成人之道用利口之淺謀以取戾敗而思補其過也故能終雪前恥強霸西戎漢武帝征伐四夷中國虛耗盜賊蜂起又喪貳師之軍乃下哀痛之詔廼者以縛馬書編示丞相御史二千石中大夫為文學者皆以虜自縛其馬不詳甚哉公車方士太史太卜皆以為吉及謀計封兆悉皆反繆然後乃寤公卿方士之諂對不以誠致誤國事有悔于心也故禁苛暴止擅賦力本務農而天下復安國家自行新法已來天下之人心祈口禱惟冀

陛下之早悟以拯其失以蕪疲民如望天之膏澤日復一日以至于今及今改之猶可救也過則民力竭一旦渙然離散乃始安輯豈不難哉臣竊觀陛下詔書寅威天戒深自譴之叮嚀懇惻以求至言是陛下已知前日之失而亦有所改為也若徒著之空文而于新法無所更變猶臨鼎烹魚之爛而益薪不已又將何益哉陛下誠能垂日月之明奮乾剛之斷放逐阿諛勿使蔽壅自擇忠讜以為諫官收還威福之柄悉由已出詔天下青苗勿使復散官在捕欠者計從初見本錢作數年輪納更不收利其免役錢除放差役並仍舊法罷市易務其所積貨物依元

賣價出賣所欠官物錢亦除利權本罷拓土闢境之兵先阜安
中國然後征伐四夷罷保甲教役使民服田力穡所興修水利
委諸州縣相度凡利少害 者悉罷之如此則中外懽呼上下
咸 和氣薰蒸雨必應矣彼阿諛之人附會執政者皆訟新法
以得富貴陛下以為非而舍之彼如魚之失水必力爭固執而
不肯移願陛下勿問之也竊觀陛下今以旱暵之故避 徹食
其焦勞至矣而民終不與其澤不如罷此六者則溥博之德及
于四海矣又聞京師近雖得雨而畿甸之外旱氣如故王者以
四海為家無有遠近皆陛下之赤子願陛下雖徇羣臣之請御

正殿復常膳猶應兢兢業業憂勞四方不可遂自寬以謂無復
有暵旱之災也又諸州奏雨往往止欲解陛下之焦勞一寸則
云三寸三寸則云一尺多不以實不可不察也又青苗之法災
傷及五分則當倚閣其間官吏有不仁者至于抑過百姓只放
四分已下稅此尤可罪者臣居冗散之地若朝廷小闕失臣不
與聞今坐視百姓困于新法如此則為朝廷深憂而陛下曾不
之知又今年已來臣哀疾浸增萬一不續先朝露賁懷忠不盡
之情長抱恨于泉下矣是以冒死一為陛下言之倘陛下猶弃
忽而不之信此則天也臣不敢復言矣干冒冕旒無任戰汗之

年原作來

至謹具狀奏聞

播芳大全文粹卷五十二

國家圖書館, NATIONAL CENTRAL LIBRARY, TAIWAN, R.O.C.

聖宗名賢五百家播芳大全文粹卷五十三

萬言書

上皇帝書

歐陽永叔

月日臣某謹昧死再拜上書于皇帝陛下臣近准詔書許以封章言事臣學識愚昧不能廣引深遠以明治亂之原謹采當今急務為三弊五事以應詔書所求伏惟陛下裁擇臣聞自古王者之治天下雖有憂勤之心而不知致理之要則心愈勞而事乖雖有納諫之明而無力行之果斷則言愈多而聽愈惑故為人君者以細務責人專大事而獨斷此致理者也納一言而可

用雖衆議不得以沮之此力行之果斷也知此二者天下無難致之理矣臣伏見國家大兵一動天下騷然陛下思治亂之安危念兵民之困弊四五年來憂勤可謂至矣然而兵益日老賊盜日強併九州之力平一西戎小者尚無人敢前今又北戎大者違盟妄作其將何以禦之從來所患夷狄今夷狄叛矣所患者盜賊今盜賊起矣所憂者水旱今水旱作矣所仰者民力今民力困矣所急者財用今財用乏矣陛下之心日憂于一日天下之勢歲危于一歲臣所謂用心之勞而不知致理之要也近者朝廷雖廣言路獻計之士不下數千然而事緒轉多支吾不暇從前年來衆議紛紜至于臨事誰策可用此臣所謂聽言雖多不如力行之果斷也臣伏思聖心甚憂而當所最闕者不過曰無兵也無將也無才也無禦戎之策也無可任用之臣也此五者陛下所憂其未有而臣謂今皆有之然陛下未得而用之者陛下未思其術也國家創業之初四方割據中國地狹兵民不多然尚能南取荆楚西平蜀國東下并潞北窺幽燕當是時所用兵財將吏其數幾何蓋善用之故不覺其少也豈知今日承祖宗之業素盡有天下之富强人衆物盛十倍國初故臣敢曰有兵有將有財用有禦戎之策有司任用之臣然陛下皆不得

而用之者何哉由朝廷有三大弊故也何謂三大弊一曰不謹號令二曰不明賞罰三曰不責功寔此弊因循于上則萬事弛慢廢壞于下且聞號令者天下之威也賞罰者天下之權也若號令煩而不信賞罰行而不當則天下不服故又須責臣下以功寔然後號令不虛而賞罰不濫行是以謹號令明賞罰責功寔此三者帝王之奇術也自古人君英雄如漢武帝聰明如唐太宗皆能知此三術而自執威權之柄故二帝所求無不得所欲皆如意漢武好用兵則誅滅四夷收功萬里以快其心欲求將則衛霍之材供其指使欲得賢士則有公孫董汲之徒以稱

材

原作

材

其意唐太宗好用兵則誅突厥破遼東威加四海以逞其志欲求將有李靖李勣之儔入其駕馭欲得賢士則有王魏房杜之輩奉其左右此二帝凡有所為後世莫及可謂所求無不得所欲皆如意無他術也惟能自執威權之柄耳伏惟陛下以聖明之資超越二帝又盡有唐漢之天下然則禦邊嘗患無將欲瞻軍富國則常無財欲平復四夷則常患無策欲任使賢才常患無人是所求皆不得所欲皆不如意其故無他由不用威權之術也自古帝王或為強臣所制或為小人所惑權柄不出于己方今外無強臣之患又無小人獨任之惑內外臣庶尊陛下

如天愛之如父傾耳延首願聽陛下之所為何憚而久不為哉
若一旦奮威權以臨之可使萬事皆辦何患五者之為奈何為
三弊之因循而一事之不集臣請言三弊夫言多變則俗不信
令頻改則下難入今出令初不詳審行之未久尋又更張以不
信之言行難從之令至于每有處置之事天下知朝廷未有一
定之命則官吏咸相謂曰且未可行不久必須更改或曰脩禮
行下略與應破指揮旦夕之間果然又變至于官吏更易道路
疲于迎送文牒縱橫上下莫知遵稟官吏軍民或聞而嘆息或
聞而竊笑號令如此欲感天下其可得乎此不慎號令之弊也

古今人君之法不過賞罰而已然賞及無功則恩不足勸罰失
有罪無權雖有人不可用也臣嘗聞太宗皇帝時王全斌等破
蜀歸功不細矣犯法一貶十年不問蓋是時方伐江南故黜全
斌與諸將立法及江南已下乃復其官太宗神武英斷所以能
平天下者賞罰分明皆如此也自西將用兵四五年矣賞罰之
際是非莫分大將以無功而依舊居官軍中見無功者不妨居
好官則諸將誰肯立功矣偏裨畏懦逗留法皆當斬或斬貶而
尋還或不貶而依舊軍中見有罪者不誅則諸將誰肯用命矣
是謂賞不足勸罰無所懼賞罰如此而欲用人其可得乎此不

綱

明賞罰之弊二也自兵動以來處置之事不少然多有名無寔請畧舉其一二則其他可知數年以來黜兵不絕諸路之民半為兵矣其間老弱病患短小怯懦者不可勝數兵額空多所用少此有點兵之虛名而無得兵之寔效也新集之兵所有教習追呼上下民不安居主教者非將領之才所教者無旗鼓之法往來州縣怨嘆嗒嗒既多是老弱小懦之人又無訓練精練之術此有教兵之虛名而無訓兵之寔效也諸州所造器械數不少矣工作之際以勞民力運輦般送又苦道路然而鐵又不鏗筋膠不固長短小大多不中度蓋造作之所但務充數而速了

不計所用之不堪經歷官司又無檢責此有器械之虛名而無器械之寔用以無寔之法教小怯之兵執鈍折不堪之器械百戰百敗理在不疑臨事而悞何及乎故事小大悉皆鹵莽此不責功寔之弊三也萬事不可盡言臣請直言其大者五事其一曰兵臣聞攻人以謀不以力用兵闔智不闔多前代用兵之人多者常敗少者常勝漢王尋等以百萬之師遇光武六千人而敗是多者敗而少者勝也苻堅以百萬之衆遇東晉二三萬人而敗是多者敗而少者勝也曹操以三十萬青州兵敗于呂布退而歸許復以二萬人破袁紹四十萬是用兵多敗而少則勝

之明驗也況于夷狄尤難力爭只可以計取李靖破突厥于定襄只用兵三千人其後破頡利于陰山亦不過萬人其他以三五千人立功塞外者不可悉數蓋兵不在多能用計爾故善用兵者以少而為多不善用兵者雖多而為少謂方今添兵則耗國減兵則破虜今沿邊之兵不下七八十萬可謂多矣然訓練不精又有老弱虛數十人不當一人是七八十萬之兵不得七八萬人之用加之軍中統制支離分多而寡兵法所忌此所謂不善兵者雖多愈少也故常戰而常敗願陛下赫然奮威飭勵諸將精加訓練去其怯弱七八十萬中可得四五十萬人古人

用兵一以當百今既未能但得以一當十則五十萬數可當五百萬之用此所謂善用兵者以少而為多古人所以少而勝多者以此也今無寔效但務添多耗國遷延日月賊雖不至天下已困矣此一事也其二曰將臣又聞古語曰或出于士或出于卒伍或出于奴僕或出盜賊唯能不次而用之巧為名將耳今國家求將之意雖切遷將之路太狹今詔近臣舉將而限以資品則英豪在下位者不可得矣試將材者限以弓馬一夫之勇則智畧萬夫之敵皆遺之矣山林奇傑之士召而至者以其貧賤而薄之不過與一主簿借職使之怏怏而去則古之屠釣飯

牛之傑皆激怒而失之矣以至無人可用則寧用癡鍾跛躄庸懦暗劣之人皆委之要地授以兵柄天下三尺童子皆為朝廷危之前日澶州之卒幾為國而生事此可見也議者不知取將之無術但云當今之無將臣願陛下革去舊弊奮威精求英豪之士不須限以下位智畧之人不必試以弓馬山林之傑不必薄其貧賤唯陛下以非常之禮待人臣人臣亦將以非常之效為報又何患于無將也哉此二事也其三曰財用臣又聞善治病者必醫其受病之處善救弊者必塞其起弊之原今天下財用固乏其弊安在起兵興而費大也昔漢武帝好窮兵用盡累

困

世之材當時耀兵軍于臺不遇十萬人尚能困其國力況今日七八十萬連四五年而不解所以罄天地之所生竭萬民之膏血而用不足也今雖有智者物不能增而計無所出矣唯有減冗卒之虛費練精兵而速戰功成兵罷自然足矣今兵有可減之理而無人可當其事賊有速擊之便而無人敢奮其勇後時敗事徒耗國而耗民惟陛下以威權力責之乃有期耳此三事也其四曰禦戎之策臣又聞兵法曰上兵伐謀其次伐交北虜通好近四十年不敢妄動今一旦發其狂謀者其意何在蓋見中國頻為元昊所敗故敢啟其貪心伺隙而動耳今督勵諸將

選兵秣馬疾入西界但能痛攻昊賊一陣則吾軍威大振而虜計沮矣此所謂上兵伐謀者也今論事者皆知西北欲併一國之力窺我河北陝西若使二虜並寇則難以力支今若我先入擊敗一虜則北戎勢減半不能獨舉此兵法所謂伐交者也元昊地狹賊兵不多向來攻我傳聞北虜常有助兵今若虜中自有點集之謀而元昊驟然被擊必求助于北虜北虜分兵助昊則二國有南寇之力若不助昊則二國有隙自相疑貳此亦伐交之策也假令二國刻期分路來寇我能先期大舉則元昊蒼皇自救不暇豈能與北虜相為表裏是破其素定之約乖其刻

日之期此兵法所謂親而離之亦伐交之策也昊賊敗逆以來幸而屢勝長有輕視諸將之心今又見朝廷北憂戎虜方經營于河朔必謂我師不能西出今乘其驕急正是疾驅急擊之時此兵法所謂出其不意者取勝之上策也前年西將有請出攻者當時賊氣方盛我兵未練朝廷尚許其出師况今元昊有可攻之勢不可失之時彼方幸吾憂河北而不虞我能西征出師此可攻之勢也自四路分帥今已半年訓練恩信兵已可用故近日屢奏小捷是我師漸振賊氣漸斂此可攻之勢也苟失此時而使二虜先來則吾無策矣臣願陛下不以臣言為狂密詔

四路之帥協議而行之此四事也五曰可任之臣臣又聞語曰十室之邑必有忠信况今文武常選之官盈于朝廷徧于天下其間非無才智之人陛下總治萬机之大既不暇盡識其人固不能躬自進賢而退不肖執政大臣動循舊例又不敢進賢而退不肖審官吏部三班之職但掌文簿差除而已又不敢越次進賢而退不肖是上自天子下至有司無一人得進賢而退不肖所以賢愚混雜僥倖相容三載一遷更無精別平居無事常患太多而差除不行但臨事要人常曰無人使用自古任人之法無如今日之謬也今議者或謂以舉主轉官為進賢犯罪即

黜為退不肖此不知其弊之深也夫凡善惡之人各以類聚故好職濫者各舉貪濁之人好財利者各舉誅求之人性庸懦者各舉不才之人守廉節者乃舉公幹之人朝廷不問是非但見舉主數足便與遷秩則公幹者進矣貪濁者亦進矣誅求者亦進矣不才者亦進矣混淆如此便可為進賢之法乎方今黜責官吏豈有澄清糾案之法哉唯犯職之人因民論訴者乃能黜之耳大能舞弄文法而求財賄者亦強黜之吏政事必由已出故雖誅剝豪民尚或不及貧弱至于不才之人不能主事眾胥羣吏共為姦欺則民無貧富一時受弊以此而言職則吏與不

才之人為害等耳今職吏因自敗者十不去其一二至于不才
之人上下共知而不問寬縱容姦其弊如此便可還不肖之法
乎賢不肖既無別則宜乎設官雖多而無人可用臣故曰五者
皆有然陛下不得而用者為有弊故也明賞罰責功過則才不
才皆列于前矣三弊五事臣既以詳言之矣唯陛下擇之天下
之務不過此也方今天災見于上地理逆于下人心怨于內四
夷攻其外事理如此殆非遲疑寬緩之時唯陛下留計狂直甘
俟誅夷臣昧死

上仁宗皇帝書

嘉祐三年十二月

蘇老泉

臣前月五日蒙本州錄到中書劄子連牒臣以兩制議上翰林
學士歐陽修奏臣所著權書衡論策二十篇乞賜甄錄陛下過
聽名臣試策論舍人院仍令本州發遣臣赴闕臣本田野匹夫
名姓不登于州閭今一旦卒然被召寔不知其所以自通于朝
廷承命慄恐不知所為以陛下躬至聖之資又有羣公卿之賢
天下士大夫之衆如臣等輩固宜不少有臣無臣不加損益且
不幸有負薪之疾不克奔走道路以副陛下搜揚之心憂惶負
罪無所容處臣本凡才無路自進當少年時亦嘗欲僥倖陛下
之科舉有司以為不肖輒以擯落蓋退而處者十有餘年矣今

雖欲勉強扶病戮力亦自其踈拙終不能合有司之意恐重得罪以辱明詔且陛下所為千里而召臣者其意以臣為能有所發明以庶幾有補于聖政之萬一而臣之所以自結髮讀書至于今茲犬馬之齒五十而猶未敢廢者其意亦欲效尺寸于當時以快平生之志耳今雖未能奔伏闕下以累有司而猶不忍嘿嘿卒無一言而已也天下之事其深遠切至者臣自惟踈賤未敢遽言而其近而易行淺而易見者謹條為十通以塞明詔其一曰臣聞利之所在天下趨之是故千金之子欲有所為則百家之市無寧居者古之聖人執其大利之權以奔走天下意

有所向則天下爭先為之今陛下有奔走天下之權而不能用人何者古者賞一人而天下勸今陛下增秩拜官動以千計其人皆以為已所自致而不知戮力以報上之恩至于臨事誰當劾用此由陛下輕用其爵秩秩使天下之吏積日持久而得之譬如傭力之人計功而受直雖與之千萬豈知德其主哉是以雖有能者亦無所施以為謹守繩墨足以自致高位官吏繁多溢于局外使陛下皇皇汲汲求以處之而不暇擇其賢不肖以病陛下之民而耗竭大司農之錢穀此議者所欲去而未得也臣竊思之蓋今制天下之吏自州縣令錄幕職而改京官者皆未得

其術是以若此紛紛也今雖多其舉官而遠其考重其舉官之罪此遠足以隔賢者而容不肖且天下無事雖庸人皆足以無過一旦改官無所不為彼其舉者曰此廉吏史此能吏朝廷不知其所以為廉與能也幸而未有敗事則長為廉與能矣雖重其罪未見有益上下相蒙誰託公行涖官六七考求舉主五六人此誰不能者臣愚以為舉人者當使明著其迹曰某人廉吏也嘗有某事以知其廉某人能吏也嘗有某事以知其能雖不必有非常之功而皆有可紀之狀其特曰廉能而已者不聽如此則夫庸人雖無罪而不足稱者不得入其間老于州縣不足甚

惜而天下之吏必皆務為可稱之功與民興利除害唯恐不出諸已此古之聖人所以驅天下之人而使爭為善也有功而賞有罪而罰其寔一也今降官罷任者必奏曰某人有某罪其罪當然然後朝廷舉而行之今若不著其所犯之由而將曰此不才貪吏也則朝廷安敢以空言而加之罪今又何獨至于改官而聽其空言哉是不思之甚也或者以為如此則天下之吏務為可稱用意過當生事以為己功漸不可長臣以為不然蓋聖人必觀天下之勢而為之法方天下初定民厭勞役則聖人務為因循之政與之休息及其久安而無變則必有不振之禍是

以聖人破其苟且之心而作急情之氣漢之元成惟不知此以至于亂今天下少情矣宜有以激發其心使踴躍于功名以變其俗况于冗官紛紜如此不知所以節之而又何疑于此乎且陛下于天下之士相期于功名而無苟得此待之至深也若其宏才大畧不樂于小官而無聞焉者使兩制得以非常舉之此天下亦不過幾人而已吏之有過而不得遷者亦使得以功贖如此示陛下之有所推恩而不惟限之也其二曰臣聞古者之制爵祿必皆孝悌忠信脩潔博習聞于鄉黨而達于朝廷以得之及其後世不然曲藝小教皆可進然其得之也猶有以取之

獎其不若今之甚也今之用人最無謂者其所謂任子乎因其父兄之資以得大官而又任其子弟將復任其孫孫又任其子是不學而得者常無窮也夫得之也易則其失之也不甚惜以不學之人而居不甚惜之官其視民如草芥也固宜朝廷近年始有意于裁節然皆知損之而未得其損此所謂制其末而不窮其源見其粗而未識其精僥倖之風少衰而猶在也夫聖人之舉事不惟曰利而已必將有以大服天下之心今欲有所去者必使天下知其所以去之之說故雖盡去而無疑向者恃其說明也夫所謂任子者亦猶曰信其父兄而用其子弟云爾彼

其父兄固學而得之也學者任于人此易曉也今之制苟幸而其官至于可任者舉使任之不問其始之何從而得之也且彼任于人不暇又安能任人此猶借資之人而欲從之自貸不已難乎臣愚以為父兄之所任而得官者雖至正即宜皆不聽任子弟唯其能自脩飾而越錄躐次以至于清顯者乃聽如此則天下之冗官必大衰少而公卿之後皆奮志為學而不待父兄之資其任而得官者知後不得復任其子弟亦當勉強不肯終老自棄于庸人此其為益豈特一二而已其三曰臣聞自設官已來皆有考績之法周衰既亡其法廢絕自京房廢考課之義

其後終不能行夫有官必有課有課必有賞罰有官而無課是無官也有課而無賞罰是無課也無官無課而欲求天下之大治臣不識也然更歷千載而終莫之行行之則益以紛亂而終不可考其故何也天下之吏不可以勝考今欲人人而課之必使入于九等之中此宜其顛倒錯繆而不若無之為便也臣觀自昔行考課者皆不得其術蓋天下之官皆有所屬之長有功有罪其長皆得以舉刺如必人人而課之于朝廷則其長為將安用惟其大吏無所屬而莫之為長也則課之所宜加何者其位尊故課一人而其下皆可以整齊其數少故可以盡其能否

而不繆今天下所以大不治者守令丞尉賢不肖混淆而莫之辨也夫守令丞尉賢不肖之不辨其咎在職司之不明職司之不明其咎在無所屬而莫之為長陛下以無所屬之官而寄之以一路其賢不肖當使誰察之古之考績者皆從司會即今之尚書尚書既廢唯御史可以總察中外之官臣愚以為可使朝廷議定職司考課之法而于御史臺別立考課之司中丞舉其大綱而屬官之中選強明者一人以專治其事以舉刺多者為上以舉刺少者為中以無所舉刺者為下因其罷歸而奏其治要使朝廷有以為之賞罰其非常之功不可掩之罪又當特有

以償之使職司知有所懲勸則其下守令丞尉不容復有所依違而其所謂課者又不過數十人足以來得其寔此所謂用力少而成功多法無便于此者矣今天下號為太平其寔遠方之民窮困已甚其咎皆其職司不敢盡言陛下試加採訪乃知臣言之不妄其四曰臣聞古者諸侯臣妾其境內而卿大夫之家亦各有臣陪臣之事其君如其君之事天子此無他其一境之內所以生殺與奪富貴貧賤者皆自我制之此固有以臣妾之也其後諸侯雖廢而自漢至唐猶有相君之勢何者其署置辟舉之權猶足以臣之也是故太守刺史坐于堂上州縣之吏拜

于堂下雖奔走頓伏其誰曰不然自太祖受命收天下之尊歸之京師一命以上皆上所自署而大司農衣食之自宰相至于州縣吏雖貴賤相去甚遠而其寔皆所與比肩而事主耳是以百餘年間天下不知有權臣之威而太守刺史猶用漢唐之制使州縣之吏事之如事君之禮皆受天子之爵皆食天子之祿不知其何以臣之也小吏之于大官不憂其有所不從唯恐其從之過耳今天下以貴相高以賤相諂奈何使州縣之吏趨走于太守之庭不啻若僕妾唯唯不給故大吏常恣行不忌其下而小吏不能正以至于曲隨諂事助以為虐其能中立而不撓

者固已難矣此不足怪其勢固然也夫州縣之吏位卑而祿薄去于民最近而易以為奸朝廷所恃以制之者恃以厲其庶隅全其節槩而養其氣使知有所恥也且必有異材焉後將以為公卿而安可薄哉其尤不可者今以縣令從州縣之禮夫縣令官雖卑其所負一縣之責與京朝官知縣等耳其吏胥人民習知其官長之拜伏于太守之庭如此之不威也故輕之輕之故易為姦此縣令之所以為難也臣愚以為州縣之吏事太守何恭遜卑抑不敢抗而已不至于通名贊拜趨走其下風所以全士大夫之節且以做大吏之不法者其五曰臣聞為天下者必

有所不可窺是以天下有急不求其素所用之人使天下不能幸其倉卒而取其祿位唯聖人為能然何則其素所用者緩急足以使也臨事而取者亦不足用矣傳曰寬則寵名譽之人急則用介冑之士今之所用非所養所養非所用國家用兵之時購方畧說武舉使夫屠沽健兒皆能徒攫陛下之官而兵休之日雖有超世之才而惜升斗之祿臣恐天下有以窺朝廷也今之任為將帥卒有急難而可使者誰也陛下之老將曩之所謂戰勝而善守者今亡矣臣愚以為可復武舉而為之新制以革其舊弊且昔之所謂武舉者蓋踈矣且以弓馬得者不過挽

強引重市井之粗材而以策試中者亦皆記錄章句區區無用之學又其取人太多天下之知兵者不宜如此之衆而待之又甚輕其第下者不免于隸役故其所得皆貪汙無行之徒豪傑之士恥不忍就宜因貢士之歲使兩制各得舉其間有司試其可者而陛下策之權畧之外便于弓馬可以出入險阻勇而有謀者不過取一二人待以不次之位試守邊之任文又有制科武有武舉陛下欲將相于此乎取之十人之中豈無一二斯亦足以濟矣其六曰臣聞法不足以制天下以法而制天下法之所不及天下斯欺之矣且法必有所不及也先王知其有所不及

是故存其大畧而濟之以至誠使天下之所以不吾欺者未必皆吾法之所能禁亦其中有所不忍而已人君御其大臣不可以用法如其左右大臣而必待法而後能御也則其遠臣小吏當復何以哉以天下之大而無可信之人則國不足以為國矣臣觀今兩制以上非無賢俊之士然皆奉法供職無過而已莫肯于繩墨之外為陛下深思遠慮有所建明何者陛下待之于繩墨之內也臣請得舉其一二以言之夫兩府與兩制宜使日夜交于門以誦論當世之務且以習知其為人臨事授任以不失其材今法不可以相往來意將以杜其告謁之私也君臣之

鞠

道不同人臣惟自防人君惟無防之是以歡欣相接而無間以兩府兩制為可信耶當無所請屬以為不可信耶彼何患無所致其私意安在其相往來耶今相制之舉不免用封彌謄錄既奏而下御史親往泣之凜凜如鞠大獄使不知誰人之辭又何其甚也臣愚以為如此之類一切徹去彼稍有知宜不忍負若其猶有所欺也則亦天下之不才無恥者矣陛下赫然震威誅一二人可以使天下姦吏重足而立想聞朝廷之風采必有個儻非常之才為陛下用也其七曰臣聞為天下者可以名器授人而不可以名器許人人之不可以一日而知也久矣國家以

科舉取人四方之來者如市一旦使有司第之此固非真知其才之高下大小也特以為姑收之而已將試之為政而觀其悠久則必有大異不然者今進士三人之中釋褐之日天下望為卿相不及十年未有不為兩制者且彼以其一日之長而擅終身之富貴舉而歸之如有所負如此則雖天下之美材亦或怠而不脩其率意恣行者人亦望風畏之不敢按此何為者也且又有甚不便者先王制其天下使尊尊相高貴貴相承使天下仰視朝廷之尊如泰山喬嶽非扳援所能及苟非有大功及出羣之才則不可以輕得其高位是故天下知有所忌而不敢覬

覲今五尺童子斐然皆有意于公卿得之則不知愧不得則怨何則彼習知其一旦之可以僥倖而無難也如此則匹夫輕朝廷臣愚以為三人之中苟優與一官足以報其一日之長館閣臺省非舉不入彼果不才者也其安以入為彼果才者也其何患無所舉此非獨以愛惜名器將以重朝廷耳其八曰臣聞古者敵國相覲不覲于其山川之險士馬之衆相覲于人而已高山大江必有猛獸怪物時見其威故人不敢襲夫不必戰勝而後服也使之常有所忌而不敢發使吾常有所恃而無怯耳今以中國之大使夷狄視之不甚畏敢有煩言以黷亂吾聽此其

心不有所窺其安能如此之無畏也敵國有事相觀以使今之所謂使者亦輕矣此人也為此官也則以為此使也今歲以某來歲當以某如縣令署役必均而已矣人之才固有所短而不能強其專對捷給勇敢又非可以學致也今必使強之彼有倉皇失次為夷狄笑而已古者大夫出疆有可以安國家利社稷則專之今法令太密使小吏執簡記其旁一搖足輒隨而書之雖有奇才辨士亦安所効用彼夷狄觀之以為樽俎談燕之間尚不能辨軍之際固宜其無人也如此將何以破其奸謀而折其驕氣哉臣愚以為奉使宜有常人惟其可者而不必均彼其

不能者陛下責之以文學政事不必強之于言語之間以敗吾事而亦稍寬其法使得有所施且今世之患以奉使為艱故必均而後可陛下平世使人而皆得以辭免後有緩急使之出入死地將皆逃耶此臣又非獨為出使而言也其九曰臣聞刑之有赦其來遠矣周制八議有可赦之人而無可赦之時自三代之衰始聞有肆赦之令然皆因天下有非常之事凶荒流離之後盜賊垢汙之餘于是有以沛然洗濯于天下而猶不若今之因郊而赦使天下之凶民可以逆知而僥倖也平時小民畏法不敢趨起當郊之歲盜賊公行罪人滿獄為天下者將何利于

此而又糜散帑廩以賞無用冗雜之兵一經大禮費以萬億賦
斂之不輕民之不聊生皆此之故也以陛下節用愛民非不欲
去此矣顧以所為從來久遠恐一旦去之天下必以為少恩而
天下無賴之兵或因以為辭而生亂此其所以重改也蓋事有
不可改而遂不改者其憂必深改之則其禍必速惟其不失推
恩而有以救天下之弊者臣愚以為先郊之歲可因事為辭特
發大號如郊之赦與軍士之賜且告之曰吾于天下非有惜乎
推恩惟是凶殘之民知吾當赦輒以犯法以賊害吾良民今而
後赦不于郊之歲以為常制天下之人喜乎非郊之歲而得郊

之賞也何暇慮其後四五年而行之又從而盡去之天下晏然
不知而日以遠矣且此出于五代之後兵荒之間所以姑息天
下而安反側爾後之人相承而不能去以至于今法令明具四
方無虞何畏而不改今不為之計使姦人猾吏養為盜賊而後
取租賦以啖驕兵乘之以飢饉鮮不及亂矣當此之時欲為之
計其猶有及乎其十曰臣聞古者所以採庶人之議為其踈賤
而無嫌也不知爵祿之可愛故其言公不知君威之可畏故其
言直今臣幸而未立于陛下之朝無所愛惜領念于其心者是
以天下之事陛下之諸臣所不敢盡言者臣請得以僭言之陛

下擢用俊賢思致太平今幾年矣事垂立而輒廢功未成而旋去陛下知其所以乎陛下知其所以則今之在位者皆足以有立若猶未也雖賢人千萬天下終不可為何者小人之根未去也陛下遇士大夫有禮凡在位者不敢用褻狎戲慢以求親媚于陛下而謗言邪謀之所以至于朝廷者天下之人皆以為陛下不疎遠宦官之過陛下特以為耳目弄玩之臣而不知其陰賊險詐為害最大天下之小人無由至于陛下之前故皆道于宦官珠玉錦繡所以為賂者不絕于道以間閼齟齬賢人之謀陛下縱不聽用而大臣常有所顧忌以不得盡其心故曰小人

之根未去也竊聞之道路陛下將有意乎去而疎之也若如斯言則天下之福然臣方以為憂而未敢賀也古之小人有為君子之所抑而反激為天下之禍者臣每痛傷之蓋東漢之哀宦官用事陽琳為司隸校尉發憤誅王甫等數人磔其尸于道中常侍曹節過而見之遂奏誅陽琳而宦官之用事過于王甫之末誅其後竇武何進又欲去之而反以遇害故漢之衰至于掃地而不可救夫君子之去小人唯能盡去乃無後患惟陛下思宗廟社稷之重與天下之可畏既去之又去之既疎之又疎之刀鋸之餘必無忠良縱有區區之小節不過帟闥洒掃之勤無

益于事惟能務絕其根使朝廷清明而忠言嘉謀易以入則天下無事矣陛下無使為臣之所料而後世以臣為知言不勝大願曩臣所著二十篇略言當世之要陛下雖以此召臣臣觀朝廷之意特以其文采辭致稍有可嘉而未必其言之可用也天下無事臣每每狂言以迂濶為世笑然臣以為必將有時而不迂濶也賈誼之策不用于孝文之時而使主父偃之徒得其餘論而施之于孝武之世夫施之于孝武之世固不如用之于孝文之時之易也臣雖不及古人惟陛下不以一布衣之言而忽之不勝越次愛國之心効其所見且非陛下召臣臣言無以至寬之

于朝廷今光矣恐後無由復言故云云之多至于此也唯陛下

播芳大全文粹卷五十三

國家圖書館, NATIONAL CENTRAL LIBRARY, TAIWAN, R.O.C.



聖宋名賢五百家播芳大全文粹卷五十四

長書

上范司諫書

歐陽永叔

月日具位謹齋沐拜書司諫學士執事前月中得進奏吏報云
自陳州召至闕拜司諫即欲為一書以賀多事匆卒未能也司
諫七品官爾于執事得之不為喜而獨區區欲一賀者誠以諫
官者天下之得失一時之公議繫焉今世之官自九卿百執事
外至一郡縣吏非無貴官大職可以行其道也然縣越其封郡
逾其境雖賢官長不得行以其有守也吏部之官不得理兵部

鴻臚之卿不得理光祿以其有司也若天下之得失生民之利害社稷之大計惟所見聞而不繫職司者獨宰相可行之諫官可言之爾故士學古懷道者仕于時不得為宰相必為諫官諫官雖卑與宰相等天子曰不可宰相曰可天子曰然宰相曰不然坐乎廟堂之上與天子相可否者宰相也天子曰是諫官曰非天子曰必行諫官曰必不可行立殿陛之前與天子爭是非者諫官也宰相尊行其道諫官卑行其言言行道亦行也九卿百司郡縣之吏守一職者任一職之責宰相諫官繫天下之事亦任天下之責然宰相九卿而下失職者受責于有司諫官之

失職也取訊于君子有司之法行乎一時君子之訊著之簡冊而昭明垂之百世而不泯甚可惧也夫七品之官任天下之責惧百世之訛豈不重邪非材且賢者不能為也近執事始被召于陳州洛之士大夫相與語曰我識范君知其材也其來不為御史必為諫官及命下果然則又相與語曰我識范君知其賢也他日聞有立天子陛下直辭正色面爭廷論者非他人必范君也拜命以來翹首企足竚乎有聞而卒未也竊惑之豈洛之士大夫能料于前而不能料于後也將執事有待而為也昔韓退之作爭臣論以訊陽城不能極諫卒以諫顯人皆為城之不

諫蓋有待而然退之不識其意而妄訛脩獨以謂不然當退之作論時城為諫議大夫已五年後又二年始廷論陸贄及沮裴延齡作相欲裂其麻纜兩事爾當德宗時可謂多事矣授受失宜叛將強巨羅列天下又多猜忌進任小人于此之時豈無一事可言而頃七年邪當時之事豈無急于沮延齡論陸贄兩事也謂宜朝拜官而夕奏疏也幸而城為諫官七年適遇延齡陸贄事一諫而罷以塞其責向使止五年六年而遂遷司業是終無一言而去也何所取哉今之居官者率三歲而一遷或一二歲甚者半歲而遷也此又非一可以待乎七年也今天子躬親

庶政化理清明雖為無事然自千里詔執事而拜是官者豈不欲聞正議而樂讜言乎然今未聞有所言說使天下知朝廷有正士而彰吾君有納諫之明也夫布衣韋帶之士窮居草茅坐誦書史常恨不見用及用也又曰彼非吾職不敢言或曰我位猶卑不得言矣又曰我有待是終無一人言也可不惜哉伏惟執事思天子所以見用之意懼君子百世之譏一陳昌言以塞重望且解洛士大夫之惑則幸甚幸甚

上田正言書

曾子固

伏聞詔書以執事直諫院不勝喜賀夫以執事蓄才美知古今

博學善論得失法度朝廷固以公卿待執事不止為諫官也然
鞏區區致喜賀者亦有云也方今內外居位之士以千數貴者
賤者舉錯趨嚮一本于苟且天下役役日就衰缺慮終不可更
興起四方每見用一偉人則皆曰是人也天子特達用之其能
使古道庶幾可復見乎羣臣顛顛思見其為國家興太平也天
下既以此望之而又為公卿大夫侍從司計謀持紀綱之臣是
宜朝拜職而夕建言使四方聞之皆曰天子明于知人而衆君
子不負天子之知天下之望矣其久默默而自欺也豈國家用
賢者意適然哉四方有私論而疑且歎息者矣始者執事為天

下主軍畫在外朝之士大夫每禁林臺閣有虛位則人人皆意
執事宜為之至今而乃為諫官非大位然論議一皆思之則非
大位乃大任也諫官剛果有氣節不浮沉則得失利病上無不
聞下無不達也諫官與時俯仰則天下之事上欲聞而不悉下
欲言而不通矣非直如此又且道其惡聞下之言畏言上之事
矣歷觀前世之得失而察當時諫官有言與否則為諫官賢不
肖立定是非凡居其選者固以一人之身而繫天下之得失當
萬世之是非也其重較然者于內外之利病主雖力行之其事
不可則宜爭而捨之主雖力止之其事當然則論而行之不聽

則繼言之又不聽至于再三則釋其位而去之矣可也固非謂從時重而卿背者也今世有為諫官者設曰吾某日言某事吾責塞矣及章下而省其言不過趨趨簿書哇隴間淺事一紙之中尚十七八避就時人喜怒不然則迂僻誕幻而不可世用者也又有居其位而不聽又不能引去者天下以為是非固不論而易明也今如執事者始自舉曰賢而能諫諍也天子以為然而遂用之今用矣雖于因循畏避自同于衆人固不可也然世倘有不顧其不可而為之者則執事豈曰是人也是徒徒以一時文字聲名傾四海而取進耳乃世之以浮道相悅附而蹈利者

之所為非有志者所忍肆也昔漢有公孫欽杜鄴谷永皆賢良選用論其一時之名迹不減于今世也其才豈盡不及今人哉當時既得名位而終于無所開陳以至于泯泯其始于人而以為安矣由今觀之則諛之迹固不可掩也後人已見其如此久忍循其邪徑乎竊計頃自擇也天下自唐天寶以來上下汲汲以謀相傾材力相長雄兵相制伏百姓靡靡日入于困窮生于困窮歆勿為罪戾不可得也令刑日煩而民愈薄利愈竭而用不足人益困而歆未休可為太息執事既居得言之任將終為身謀而已則鞏言雖切何用若歆興太平報國家則願無容容

而隨俗也矧執事計當世之得失已詳矣忿世俗之垢玩有素矣士君子用舍去就輕重之分又豈不盡知而熟曉也鞏是以聞成命而不覺喜且以為賀也想日夕當有言故陳區區少助思慮今世布衣多不談治道鞏未嘗一造而輒吐情寔有所發憤也伏惟不甚怪怒而省察之

上蔡侍郎書

石守道

侍郎閣下夫物生而性不齊裁正物性者天吏也人生而材不備長育人材者君宰也裁正而後物性遂故曲者直者酸者辛者仆者立者皆得其和易曰乾道變化各正性命是也長育而

後人材美故剛者柔者暴者舒者急者各得其中洪範曰會其有極歸其有極是和謂之至道中謂之大德中和而天下之理得矣介者正所謂不合其中而不得其和者也喜怒哀樂未發謂之中喜怒哀樂之將生必先幾動焉幾者動之微也事之未兆也當其幾動之時喜也怒也哀也樂也皆可觀焉是喜怒哀樂合于中者也則就之是喜怒哀樂不合于中也則去之有不善知之于未兆之前而絕之故發而皆中節也易曰吉之先見不言凶而言吉者其能知善不善于幾微之時善則行之不善則改之凶何由而至也介見天下之有未得其治則憤悶發

于內而言語形于外已暴著于外猶不知協于中也拂于事邪
欲其吉之先見發而皆中節其可得乎故凶悔吝當隨之冬集
至閣下有人密道閣下之語于介者歲規訓誡丁寧切切至如聽
箕子皇極之義若聞孔思中庸之箴幡然大覺前日之非噫天
以剛方直烈之性授于介不納介于中夫剛方直烈不以中輔
之暴殘戕折日可待矣今閣下毆介歸之于中是天以剛方直
烈付于介閣下納之令德也天欲暴殘戕折于介而閣下賜之
更生也介荷閣下仁育陶宰為至厚矣今西走蜀四千里不敢
以跋涉為勞以平生未得一登閣下之門為恨引首南望不勝

拳拳之心不宣介再拜

與裴負外書

裴君負外足下前日專使至厚貺長書目駭心悚流汗竟趾非
所當非所當夫咸章韶夏至樂也不奏于夔牙之府而奏于俚
鄙惡能審其聲而知其音也飛兔腰褭逸馭也不騁于王樂之
前而鬻于市人惡能審其駿而知其良也然而餒甚者人饋之
以太牢雖食之不知其旨而知貪乎味也如渴甚者人飲之以
旨酒雖啜之不知其醇而知嗜其甘也固亦心腹飽飫而靈府
浹洽也噫文之弊已久自柳河東王黃州孫漢公輩相隨而亡

世無文公儒師天下不知所準的猶學夫樂者不知六律之有
統五音之有會而淫哇之聲百千萬變徒囋囋惱人心噪噪聒
人耳終莫能適夫節奏而和于人神文之本日壞枝葉競出道
源益分波派彌多天下悠悠其誰與歸輕薄之流得斯自騁故
雕巧纂組之辭徧滿九州而世不禁也妖怪詭誕之說肆行天
地間而人不禦也今天下大道榛塞人無所由趨而之于堯舜
周孔之聖人惟詰屈一徑而已吾嘗思得韓孟大賢人出芟去
其荆棘逐去其狐狸道大開而無荒磧人由之直之于聖不有
徑曲小道如依大塗而行憧憧往來舟車通焉適中夏之四海

東西南北坦然廊如動無有阻碍往年官在汶上始得士熙道
今春來南郡又逢孫明復韓孟茲遂生矣斯文之弊吾不復以
為懼也然則吾願與足下協施其力而助二人焉來書過稱將
走六服之外至于萬百里而避之也豈敢當唯足下無中道叛
去不宣介再拜

上王侍制書

朱晦菴

月日具位某敢薰沐裁書再拜以獻知府待詔侍郎某窮居晚
學無所肖往似往時學不知方而過不自料妄以為國家所恃以
為重天下所賴以為安風俗所以既漓而不可復淳紀綱所以

既壞而不可以復理者無一不係乎人焉是以聞天下之士有
聲名節行為時論所歸者則切切然以不得見乎其人為歎及
其久也或得見之或不得見之而心之拳拳慕用不少衰也聞
其進為世用則私以為喜聞其阨窮廢置則私以為憂及乎與
其所就而觀之則終始大節真可敬仰者蓋無幾人而言論風
旨卒無可稱功名事業卒無可紀者亦往往往往而有以此喟然自
歎知天下所謂聲名節行者蓋亦不足以定知天下之人而天
下之事未知其果然安所寄也自是以來雖不敢易其賢愚之
心緩其憂世之志然亦窈自笑其前日所以求于人之重而所

以自任者反輕如孟子之所訛也于是始復取其平昔所聞于
師友者夙夜講明動靜體察求仁格物不敢弛其一日之勞以
庶幾乎有聞者而于前日之所為切切然者則既有所不暇矣
當是之時聽于士大夫之論聽于真人走卒之言下至閭閻市
里女婦兒童之語亦莫不曰天下之望今有王公也已而得其
為進士時所奉大對讀之已而得其在館閣時所上奏事讀之
已而得其在史館在臺院遷侍郎時所論諫事讀之已而又得
所為故大丞相魏國公之諫文及楚東酬唱等詩讀之觀其立
言措意上自奏對陳說下逮燕笑從容蓋無一言一字不出于

天理人倫之大而世俗所謂利害得喪榮辱死生之變一無所入其中讀之真能使人胸中浩然鄙吝消落誠不敢自意古人頑廉懦立之効乃于吾身親見之于是作而歎曰士之求仁固當以反求諸己為務然豈不曰士大夫之賢者乎我今以前日失望于諸公者自懲而無復此意是以一噎而廢食也于是慨然復有求見于左右之意而未獲也昨聞明公還自夔州撫臨近甸而某之里閭交朋適有得佐下風者因以書賀之蓋喜其得賢大夫而事之而自傷無狀不得從賓客吏民之後以望大君子道德之餘光也不意緣與其向來無取鄙妄之言皆得

徹聞于視聽明公又不以凡陋為可棄狂僭為可罪而辱枉手書以抵宋屨盛有所稱道竊惟明公之志豈非以世衰道微遺君後親之論交作肆行無所忌憚舉俗滔滔思有以障其橫流者是以有取于愚者一得之慮因以不求其素而借之辭色也邪明公之志則正矣大矣而某之愚未有以稱明公之意也雖然有一于此其惟益思砥礪不敢廢其所謂講明體察求仁格物之功者使理日益明義日益精操而存之者日益固拓而充之者日益遠則明公之賜庶乎其有以成之而幸明公之終教之也雖然明公以一身當四海士大夫軍民一面之責其一語

一默一動一靜之間所係亦不輕矣伏惟盛德大業前定不窮其剛健中正篤寔輝光者固無所俟于勉強然以某耳目之所睹記則古語所謂行百里者半九十里明公其亦念之況今人物渺然如明公者僅可一二教是以天下之人責望既切而明公尤不可以不戒不審高明以為何如哉某又聞古之君子尊德性矣而必曰道問學致廣大矣而必曰盡精微極高明矣而必曰道中庸溫故知新矣而必曰敦厚崇禮蓋不如是則其所學所守必有偏而不備之處惟其如是是以居上不驕為下不倍有道足以興無道足以容而無一偏之弊也某之區區以此

深有望于門下蓋所謂德性廣大高明知新者必有此措而所謂問學精微中庸崇禮者又非別為一事也狂易無取明公其必有以裁之往者明公在夔成都汪公聲問密邇竊計有足樂者比來以時通問否乎此公涵養渾厚寬靜有容使當大用必有不動聲色而內外賓服者明公相知之深一日進用于世引類之舉其必有以先矣某杜門養親足以自遣昨嘗一至相浙少資友朋講論之益歸來忽逼除書既不敢辭而拜命矣然明公未歸朝廷則某亦何所望而敢前也引領牙齶未有瞻拜之期向風馳義日以勤止輒敢復因宋侯相為介紹致書下執事

以道其拳拳之懷伏惟昭察

上趙先生書

石守道

謹上書先生左右近得姚鉉文粹及韓昌黎集觀其述作有三代制度兩漢遺風殊不類今之文曰詩賦者曰碑頌者曰銘贊者或序記或書箴心本于教化仁義根于禮樂刑政而後為之辭大者驅引帝王之道施于國家敷于人民以佐神靈以及蟲魚次者正百度序百官和陰陽平四時以舒暢元化輯安四方今之為文其主者不過句讀研巧對偶的當而已極美者不過事寔煩多韻律調諧而已雕鏤篆刻傷其本浮華緣飾喪其

真于教化仁義禮樂刑政則缺然無髣髴者易曰文明以正觀乎人文化成天下春秋傳曰經緯天地曰文堯則曰聰明文思禹則曰文命敷于四海周則曰郁郁乎文哉漢則曰文章爾雅訓辭深厚今之文何其衰乎去唐百餘年其間文人計以千數而斯文寂寥缺壞久而不振者非今之人盡不賢于唐之人盡不能為唐之文也蓋其弊由于朝廷敦好時倍習尚漬染積漸非一朝一夕也不有大賢奮袖于其間崛然而起將無革之者乎唐之初承隋剝亂之後餘人薄俗尚染齊梁流風文體卑弱氣質叢脞猶未足以鼓舞萬物釅明六合逮章武皇帝負義軒

之資懷唐虞之材卓然起立于軒墀之上武功戰定海內刮疵剔瑕乾清坤寧以文德化成天下驚潛燭幽雷動日暄韓吏部愈應期會而生學獨去常俗直以古道在已乃以空桑雲合千數百年希潤泯滅已亡之曲獨唱于萬千人間衆人耳慣所聞唯鄭衛憇憇之聲忽然聞其太古之上無為之世雅頌正始之音恍惚茫昧如喪聰如失明有駭而亟走者有陋而竊笑者有怒而大罵者叢聚嘲噪萬口應答無窮休爰而喜前而聽隨而和者唯柳宗元皇甫湜李翱李觀李漢孟郊張籍元稹白居易輩數十子而已吏部志復古道奮不顧死雖擯斥摧毀日百

千端曾不少改所守數十子亦皆協贊附會能窮精畢力效吏部之所為故以一吏部數十子力能勝萬百千人之衆能起百數十年之弊唐之文章所以怛然明白揭于日月渾渾灑灑漫如江海同于三代駕于兩漢者吏部與數十子之力也今天子繼明守成道德高厚功業巍然宜與唐並今卿士大夫垂紳曳組森森布列行義超然直與唐比獨斯文邈乎不可視于唐居上者點畫語言絳織章句如彼畫工不知繪事後素以為質但誇其藻火之明丹漆之多如彼追師不知良工不琢以為美但誇其彫刻之工文理之縟載毫輦筆窮山刊木模刻其文字布

于天下以為後進式後進耳所習聞聲名赫奕位望顯盛之者
惟是不知前人有孟軻楊雄董仲舒司馬相如賈誼韓吏部柳
宗元之材之雄也目所常見制作淫麗文辭侈靡者唯是不知
前世有三代兩漢鉅唐之文之懿也父訓其子兄教其弟童而
硃研其口長而組綉于手天下靡然向風寢以成俗吁無變之
者有以待先生也如唐之樊豐之待吏部也繼唐之文章紹吏
部之志唯先生能之先生無與讓先生識與天地相際接學臻
古今緼奧名節德範人倫師表所謂有臯夔之才伊呂之志周
孔之道軻雄之文施之于一國之間和風仁聲油然其洽矣施

之于廊廟之上皇猷帝功卓然其成矣而命與才戾四十始登
一第仕纔得上農夫之祿料不能得居廟堂之上調燮元化訂
謨百度堯舜其君仁壽其民也夫豈虛生先生于世哉傳曰五
百年一賢人生孔子至孟子孟子至楊子楊子至文中子文中
子至吏部吏部至先生其驗欤孔子孟子楊子文中子吏部皆
不虛生也存厥道于億萬世迄于今而道亦明也名不朽也今
淫文害雅世教隳壞扶顛持危當在有道先生豈得不為之乎
仲尼有云吾欲托之空言不如見之寔事深切著明也先生如
果欲有為則請先生為吏部介願率王建中之徒為李翱李觀

先生唱于上介等和于下先生擊其左介等攻其右先生倚之介等角之又豈知不能勝茲萬千人之衆革茲百數十年之弊使有宋之文赫然為盛與大漢相視鉅唐同風哉語曰當仁不讓于師孔子曰天之未喪斯文也孟子不曰我亦欲正人心息邪說距跛行放淫辭以承三聖楊子不曰後之塞路者有意窃自比于孟子文中子不曰千載之下有紹宣尼之業者吾不得而讓也吏部不曰釋老之害過于楊墨吾欲全之于已壞之後使其道由愈而粗傳蓋知其道在已不得而讓也今也道寔在于先生先生豈得讓乎介窃痛斯文衰道不克力不足不能救世有賢如君子天下所屬意豈特區區小子窃有望乎左右先生留意焉

與張秘校書

歐陽永叔

前日去後復取前所賦古今雜文十數篇反復讀之若大節賦樂古太古曲等篇言尤高而志極大尋足下之意豈非問世病俗究古明道欲拔今以復之古而剪剝齊整凡今之紛駁冗者歟然後益知足下之好學甚有志者也然而述三王太古之道捨近取遠務高言而顯事實此少過也君子之為學也務為道為道必先知古知古明道而後履之以身施之于事而又見

于文章而發之以信後世其道周公孔子孟軻之徒常履而行之者是也其文章則六經所載至今而取信者是也其道易知而可法其言易明而可行及誕者言之乃以混蒙虛無為道洪荒曠畧為古其道難法其言難行孔子之言道曰道不遠人中庸者曰率性之謂道又曰可離非道也春秋之為書也以成隱讓而不正之傳者曰春秋信道不信邪謂隱未能蹈道齊侯遷衛書城楚丘與其仁不與其專封傳者曰仁不勝道凡此所謂道者乃聖人之道也此履之于身施之于事而可得者也豈如誕者之言者邪堯禹之書皆曰若稽古傳曰事不師古匪說攸

聞仲尼曰吾好古敏以求之者凡此謂古者其事乃君臣上下禮樂刑法之事又豈知誕者之言者邪此君子之所學也夫所謂捨近而取遠云者孔子曰生周之世去堯舜遠孰與今去堯舜遠也孔子刪書斷自堯典而弗道其前其所謂學則曰祖述堯舜以孔子之聖且勤而弗道其前者豈不能耶蓋以其漸遠而難彰不可以信後世也今生于孔子之絕後而反欲求堯舜之已前世所謂務高言而鮮事寔者也唐虞之道為帝王首仲尼之歎曰蕩蕩乎謂高深閎大而不可名也及夫二典紀之炳然使後世尊崇仰望不可及其嚴若天然則書之言豈不高耶

然其事不過于親九族平百姓憂水患問臣下誰可任以女妻
舜及祀山川見諸侯齊律度謹權衡使臣不誅放賊而已孔子
之後惟孟軻最知道然其言不過于教人樹桑麻畜雞豚以為
養生送死為王道之本夫二典之文豈不為文孟軻之言道豈
不為道而其事乃世人之甚易知而近者蓋切于事寔而已今
學者不深本之乃樂誕者之言思混沌于古初以無形為至道
者無有高下遠近使賢者能之愚者可勉而至無過不及而一
本乎大中故能亘萬世可行而不變也今以謂不足為而務高
遠之為勝以廣誕者無用之說是非學者之所盡心也宜少下
其高而近其遠以及乎中則庶乎至矣凡僕之所論者皆陳言
淺語如足下之多聞博學不宜為足下道之也然修之所以云
者本欲損足下高遠而俯就之則安敢務為奇言以自高耶幸
足下少思焉

上丞相書

范文正公

天聖八年五月日具位某再拜上書于昭文相公閣下某昨者
伏蒙聖恩優賜差任蓋鈞造之際靡不獲所退者踈拙且驚且
懼慎况唐虞舊域風俗淳儉獄無積訟亭鮮過客栖遲偃仰何以
報國然嘗試思之似有所補敢不冒瀆而言之夫善國者莫先

育材育材之方莫先勸學勸學之要莫尚宗經宗經則道大道
大則才大才大則功大蓋聖人法度之言存乎書安危之幾存
乎易得失之鑒存乎詩是非之辨存乎春秋天下之制存乎禮
萬物之情存乎樂故俊哲之人入乎六經則能服法度之言察
安危之幾陳得失之鑒析是非之辨明天下之制盡萬物之情
使斯人之徒輔成王道復何求哉至于扣諸子獵_獵羣史所以觀
異同質成敗非求道于斯也有能理其書而不深其旨者雖扑
愚之心未可與適道然必頽瞻禮義執守規矩不猶愈于學非
而博者乎今文庫不振師道久缺為學者不根乎經籍從政者

罕議乎教化故文章柔靡風俗澆偽選用之際常患才難某聞
前代盛衰與文消息觀虞夏之純則可見王道之正觀南朝之
麗則知國風之衰惟聖人質文相救變而無窮前代之季不能
自救則有來者起而救之是故文章以薄則為君子之憂風俗
其壞則為來者之貲今朝廷思救其弊興復制科不獨振舉滯
淹詢訪得失有以勸天下之學育天下之才是將復小為大抑
薄歸厚之時也斯文丕變在此一舉然恐朝廷命試之際謂所
舉之士皆能熟經藉之六義知王伯之要略則反屏而弗問或
將訪以不急之務雜以非聖之書辨二十八將之功勳陳七十

二賢之德行如此之類何所補益蓋欲伺其所未至誤其所常習不以教育為意而以去留為功若如所量恐非朝廷勸學育才之道也何哉國家勸學育才必求為我器用輔我風教設使皆明經籍之旨並練王伯之術問十得十亦朝廷教育之本意也况文有精粗理有優劣明試之下得失尚多何患去留之難乎今或伺其所未至誤其所常習則天下賢俊莫知所守將其傳習非聖旁攻異端聖人之門無復啟發逮于後舉差之益遠如此則制科之設足以誤多士之心不足以救斯文之弊恭惟前聖之文之道昭昭乎為神器于天下得之者昌失之者亡後

世聖人開學校設科舉率賢俊以趨之各使盡其心就其器將以共理于天下故書曰咸有一德斯之謂矣願相府為此一舉倘昌言于兩間制如能命試之際先之以六經次之以正史該之以方畧濟之以時務使天下賢俊翕然修經濟之業以教化為心趨聖人之門成王佐之器十數年間異人傑士必穠穠于王庭矣何患俊又不克風教不興乎救文之弊自相公之任也當有吉甫輩頌吾君之德吾相之功登于金石永于天地者矣四海幸甚千載幸甚于祀台自嚴無任僭越戰汗之至某再拜

上蘓學士書

黃魯直

庭堅齒少且賤又不肖無一可以事君子故常望見眉宇于衆人之中而終不得使令于前後伏惟閣下學問文章度越前輩大雅豈弟約博後來立朝以直言見排補郡輒上最課可謂散寔于中內外稱職凡此數者在人為難兼而閣下所蘊海涵地負特所見于一州一國者耳惟閣下之淵源如此而晚學之士不願親炙光烈以增益其所不能則非人之情也借使有之徒非用于富貴榮辱顧日暮計功道不同于謀則愚陋是已無好學之志訑訑予既已知之者耳庭堅天幸早歲聞于父兄師友以立乎二累之外然固未嘗得望履幕下以齒少且賤又不肖

耳知學以來又為祿仕所縻聞閣下之風樂承教而未得者也今日竊食于魏會閣下開幕府于彭門傳音相聞閣下又不以未嘗及門過譽斗筲使有黃鐘大呂之重蓋心親則千里晤對情異則連屋不相往來是理之必然者也故敢坐通書于下執事夫以少事長士交于大夫不肖承賢禮故有數似不當如此恭惟古人之賢有以國士期人畧去勢位許通書者故竊取焉非閣下之愷悌單素處顯何時不可直不敢也仰冀知察故又作古風詩二章賦諸從者詩云我思古人寔獲我心心之所期可為知者道難為俗者言不得于今人故求之古人中耳與我

並世而能獲我心思見之心宜如何哉詩云既見君子我心寫
兮今此未見而寫我心矣春候暄冷失宜不審何如伏祈為道
自重

上孫端明書

張文潛

昔樂正子用于魯孟子為之喜而不寐夫功名進退之際君子
本不以累其心其來何足喜其去何足愠一樂正子用于區區
之魯而足以悅孟子浩然之懷何也夫天下之事不如人意者
常多而其委曲會合與人同謀者常少故也豈特少哉蓋千百
而一遇焉夫人之脩身為善擇地而蹈之者豈嘗一日不願取

諸其身而布之天下哉而世之人視夫賢人君子之有立于世
其心亦豈不願為之奔走而受其澤也此二者宜若物理之所
當然者然其行也或止之其親也或間之讒邪閑于其前檢巧
伺于其後而賢人君子又不肯少屈其意俯仰而有就故憂憂
乎其勢欲合而常難故使夫物理之所當然者一旦莫^更指之為
不可逢之會可勝歎哉由此言之則其萬一有合而得施其用
豈不可喜也未生三十五年其間職事之名亦久矣方先帝之
時羣才並進多士滿朝而天下之人指以為正人大丈夫不為
利回不為義疚挺然于羣枉之中其進退用舍係天下輕重者

凡七八人而公其一也天下之士其望受賜于公久矣然中間何其屹屹乎歆合之難耶今春以來前日所指以為正人大丈夫者翕然四合而至矣公雖優游近藩然聞之道塗以謂入陪輔弼寔在旦暮夫如今日之所用其磊落震動人者皆往時天下之士將至于絕望而不得見者也今也一旦而盡見之則其喜也是宜不獨不寐而止也夫未之蒙弟乘幸得望履幕下乘嘗欣然自負以為辱公知之而來今也為令沈丘得在使部聞公之府有慶也日夜喜躍樂頌其事而願有獻焉故不量其賤且愚喜為執事一道之而來之家世單寒無勢力自援于當途而方天下治平賢俊振起區區之心未能自甘于無用來歲之春公將有薦其屬為京官者未願沾其一乎夫天下之士願奔走于君子而君子亦豈一日忘天下之士哉伏惟察之進退俟命未再拜

上文潞公書

張文潛

古之言詩者以謂動天地感鬼神莫近於詩夫詩之典出乎人之情喜怒哀樂之際皆一人之私言而至大之天地極幽之鬼神而詩乃能感動之者何也蓋天地雖大鬼神雖幽而惟至誠能動之彼詩者雖一人之私意要之必發于誠而後作故人之

于詩不感于物不動于情而作者蓋寡矣今夫世之人有順于其心而後樂有逆于其欲而後怨當樂而反悲當怨而反愛者世之所未嘗有而樂與怨者無有使之莫知其然而然者也豈非至誠之動也哉詩者宣所樂所願之文也夫情動于中而無偽詩道其情而不苟則其能動天地感鬼神者是至誠之說也夫文章之興其變多矣惟詩獨迺于誠故欲觀人者莫如詩故古之君子相與燕樂酬酢之際必賦詩以觀賓主之意雖未必作于其人而取古人之詩以見其志故先王之時大至于朝廷之政事廣至于四方之風俗微至于匹夫賤士之悲嗟婦人女

子之幽怨一考于詩而知之而使有司以來採取而藏諸太師又播之樂章大者薦之郊廟而次者陳之燕享則夫詩之所以觀政察物其重蓋如此自周衰以來後世作者紛然並出以至于今數十年其間變制異技奇言詭述不可勝記其間卓然可稱者不遇數人其餘紛紛藉藉皆不足道而違情拂志之作往往或有非如古之于詩必出于誠意而不誣也然違情拂意者蓋有之矣至于顯情之真發志之寔者尚十九也某不肖自幼至今頗考歷世之為詩者上自風雅之興而中觀騷人之作下考蘓李以來至于唐掃除蕃穢而撫其真刊落蔓衍而食其寔

頗有得于前人而時時心之所感發亦窈見之于詩句夫人之
生于天地之間目之所見耳之所聞心之所思一日之見無頃
刻之休而又觀夫四時之動敷華發秀于春布材布寔于夏_下凄
風冷露鳴木墮葉而秋興重雲積雷_雪大寒飛霰而冬至一歲之
間無一日隙以人之無情對物之無定候則感觸交戰旦夜相
召而欲望其不發于文字言語以消去其情蓋不可得也則又
知詩者雖欲不為有所不能

上曾子固書

張文潛

某嘗以謂君子之文章不浮于其德其剛柔緩急之氣煩簡舒
歛之節一出乎其誠不隱其所已至不强其所不知譬之楚人
之必為楚聲秦人之必衣秦服也惟其言不浮乎其心故因其
言而求之則潛德遁志不可隱伏蓋古之人不知言則無以知
人而世之惑者徒知夫言與德二者不可以相通或信其言而
疑其行_為嗚呼是徒知其一而不知夫君子之文意固出于其德
與夫無其德而有其言者異位也某之初為文最喜讀左氏離
騷之書丘明之文美矣然其行事不見于後不可得而考屈平
之仁不忍私其身其氣猶其趨高故其言反覆曲折初凝于煩
左顧右挽中疑其迂然其誠惻怛于其心故其言周密而不厭

考乎其終而知其仁也情而非懟也異而自潔而非私也徬徨
悲嗟卒無有省之者故剖志快慮以死自顯此屈原之忠也故
其言如明珠美玉明麗而可悅也如秋風夜露淒怛而感惻也
如神仙烟雲高遠而不可挹也推其言以考其事其有不合者
乎三代以來最喜讀太史公韓退之之文司馬遷奇邁慷慨自
其少時周游天下交結豪傑其學長于討論尋繹前世之迹負
氣敢言以蹈于禍故其文章踈蕩明白簡樸而馳騁惟其平生
之志有所鬱于中故其餘章末句時有感激而不洩者韓退之
文如先王之衣冠郊廟之鼎俎至其放逸超卓不可收攬則極

言語之壞巧有不足以過之者嗟乎退之之于唐蓋不愚矣然
則犯人主忤權臣臨義而忘難剛毅而信寔而其學又能獨立
于道德滅裂之後纂孔孟之緒餘以自立其說則愈之文章雖
敬不如是蓋不可得也自唐以來更五代之紛紜宋興鉏叛而
討亡及仁宗之朝天下大定兵戈不試休養生息日趨于富盛
之域士大夫之游于其時者談笑佚樂無復向者幽憂不平之
之氣天下之文章稍稍迴起而廬陵歐陽公始為古文近撥兩
漢遠追三代而出于孟軻韓愈之間以立一家之言積習而益高
淬濯而益新而後四方學者始聽其舊而唯古之求而歐陽公

于是時寔持其權以開引天下之豪傑而世之號能文章者其
出歐陽之門者居十九焉而執事寔為之冠其文章議論與之
上下聞之先達以謂公之文其興雖後于歐公屹然歐公之所
謂忘其後來而論友者也某自幼讀書即知讀執事之文既長
而思之廣求遠訪以盡攬其變嗚呼如公者真極天下之文者
歟

播芳大全文粹卷五十四

聖宋名賢五百家播芳大全文粹卷五十五

疊幅

丞相

上陳丞相小簡七幅

呂伯恭

秋令權輿餘暑尚劇恭惟斟酌化波乾清坤晏幽明協贊鈞候
動止萬福某謹勒狀仰承記府

甲詎寒溫之儀已布右方適日不審鈞用何似恭惟浩然之氣
上際下蟠靈府虛明百家來舍更祈慈調視履宣節雨暘仰符
當宁倚注之隆俯徇徇四海依歸之望

某叢外之蹤屏伏間巷與昆虫草木共游_坵治之中涵泳太和為日久矣具瞻之地禮絕百僚分有常尊賤不可瀆士有常守進不可輕用是不肖之姓名無由自達于典籤曠宇碩畫細大并容草芥之微當在原貸

成均置屬本待名儒推澤之餘下及孱陋怵然內顧業荒學淺且無一日之雅于門下果何以得此意者大鈞播物不聞_聞遠邇推拔十得五之義故雖頑鈍猶在甄獎

深惟至公之舉本非私德而犬馬蛇雀導諛之言亦非承學所當施于大君子也惟當博師友砥礪講習不辱于官官無為化筆之羞而已拳拳之誠有如皎日

某尺牘以貢謝悃訪諸典彙厥有固常用敢忘其蕪類致之凡格尚覲鈞慈俯加采覽

某一介疏遠不敢僭布鈞閱之問若請委令于黃扉又_適重不韙之罪俯伏陳露尚祈鈞察

上丞相小簡八幅

汪彥章

秋高氣爽伏惟入侍帷幄闕決政機六氣順逆百福陰相某祗役遠方仰戴恩地未有趨拜皆所之期下情無任瞻戀伏乞以時調護寢興為宗社無疆之福

某向緣屬吏獲趨走左右寒鄉賤士平昔之望何嘗及此至榮
至幸惟圖朝夕望塵以承謦欬無何得罪深重奔走漂零引領
崇墉坐成霄壤展轉淮浙俯仰半年雖叩恩德之誠無食息
暫置其如身繫罪籍不敢輒拜起居以故姓名迄今方徹門下
而言語拙訥所以控漑肺肝者又極于如此伏乞鈞慈俯賜矜
察

恭以某官勲業福祿之盛度越古今自生民以來未有其比此
固能言之士為天下後世道也然某以為此特我公之細事惟
身作太平之墓壽考百年則民有千年之澤壽考千年則民有

無窮之澤由是言之天下頌詠之情果何時而已哉不知當時
崧高之頌申伯閔宮之頌魯公果能如是否方今縉紳蒙德賜
以為適然耳當知數百歲之後悵然企慕者甚于崧高閔宮之
詩也况蒙收錄預門下諸生之列其欣何如哉

恭以某官學貫九流身兼數器膺人主非常之寄極縉紳甚盛
之選四方喁喁倚俟柄用久矣伏計進朝伊夕顯冊一頌周公
拜前魯公拜後感事赫然追古某以孤生猥被知獎其為頌禱
信百他人某得罪本末伏計熟聞于左右者聽不當喋喋再有
塵浼伏念某學術迂淺自揣甚明緣出入門牆以來寔不敢以

片言妄干進取昨者蒙恩權置東省修道史皆某官特達之知
假以恩地其本心何嘗及此而言者遽以構造之罪上聞寔為
非意今謫佐偏州于某以為僥冒然某蒙知過本以薄技進身
若緣口舌得官雖至駕賤寔深恥之今傳播四方長陷浮薄終
身何以自明伏祈鈞慈特與昭雪

某昨日承蒙某官驟賜收錄既修道史復遷東省自為托跡宇
下不啻太山之安豈圖身迹疵賤反累恩地一朝倉卒禍出非
意若非鴻造察其非辜假以仕祿則一家為壑中之瘠久矣每
一思之不知涕之橫集也故到官以來朝夕惴恐莫知所以圖

報惟有恪守官箴勤于簿領庶不玷門下之知伏紙西向不勝
拳拳

恭以聖上參萬世之紀成一代之史命師臣儒宗董領其事其
所辟置皆當時之選某頃以來學猥預甄收可謂不世之遇才
幸朝夕執筆左右庶幾綴名編末垂示無窮亡何事有大謬不
然者今而思之恍若夢寐窮薄所致夫復何言倘執事憫其無
辜以前日嘗被使令特加採錄只作在京宮觀名目再陪英俊
參俟硯席瞑目無恨矣伏乞鈞慈特賜留聽

某寒鄉晚出無異能解自束髮志讀書屬文及登門牆屢蒙採

錄益不敢怠方今朝廷極治之時人孰不願操觚執簡以紀休
烈如某荒拙辱獎成之久亦豈多愧流輩伏乞鈞慈早賜收錄
無使白首槁死與異時數子同不遇之歎幸甚

某近者切觀邸吏報宣德樓成寵賚輔臣恩數絕異輝映今古
雖周公營洛不過是也某不揆輒撰宣德樓賦鋪張一時之盛
擬繕寫投進又以阻隔遠方不經目睹恐述作未盡倘因牽叙
許過都一至其下畢區區之志死不恨矣伏乞鈞慈特賜矜察

上丞相七幅

毛伯穎

夏序敷榮景物清潤恭惟丹青神化為國棟梁勲績之隆增光
日月神所贊相鈞候動止萬福謹具啟承候下執事

伏以聖主憂勤緝熙紹開統業某官弼亮帝室格于皇天折衝
綏遠之謀能使獯獫革心海寓清晏詩書簡冊之意無與比侔

仰冀為棟隆鼎鼐之重保練冲氣光輔基圖某下情無任傾頌
伏以方內乂安邊不隅聳軌迹夷傷庶尹允諧某官均調燮理
之功萬世永賴某疋孱樸邁無所短長備員郡吏夙夜俯仰大
化畏法遵繩無由操篲整襟奔走于光範簪裾之末無任景慕
某才質朽下墊蹟卑允駁于遠近之繩墨辱在某官埒陶蕭勺
之中整襟濯纓沈浸醲郁夙興夜寐未抵譴訶豈不知幸為是

怡恭分守不敢時具竿牘冒昧省鑒恭惟大公樂育之度洞賜
矜察

某項嘗具不腆牋牘冒昧典記譬夫擊棘拊缶巴人下里唐哭
清朝之奏率爾犯分何所逃罪某官方以大賢全德嘉善矜憇
雖涓微塵埃下才末技不賜翦棄特垂酌答使得光華蔀室拳
拳服膺以自砥礪于寵綏之盛幸甚吳蜀萬里江湖悠末陳謝
迂緩伏深慚罪

備負省山亦既一年有半雖稱大拜然軍源兵賦百孔千瘡之
後土壤境垧民俗褊儉囂訟盤互號為難治孱懦書生無網絡
張設之巧功苦食淡鞠躬履方粗能日恪詔條未抵瘰癧伏惟
大鈞埙北函容覆護之德何以上酬

某政和二年塵忝名第沈淪州縣粗知奉法循理震動恪恭紬
繹于摩研編削之業建炎中誤蒙朝廷收召造蹟文館遭淮甸
之亂垂翅北歸仰賴清朝樂育之仁三劄符竹年事荏苒舊殖
將落伏遇某官以道德文章輔弼明主論道經邦之暇尤加意
于長育人材是敢不因介紹不以未見顏色為款飾因陋之說
自通于下執事倘蒙一賜親采予而進之使遐陬喬壤枯槁沈
溺之士聞風而作鼓舞于執事之功業幸甚

上丞相小簡四幅

汪彥章

庚伏在辰伏惟秉執事樞均福中外陰有神明來護寢興其屏迹里閭無緣俯伏軒墀瞻望履烏下情依戀以日為歲仰乞珍愛節宣上佐休明為宗社華夷無疆之慶

某比者專差人上狀伏計已經均覽退維疵賤不敢數具起居取瀆尊之罪仰惟厚恩未賜誅絕茲者鈞治一新中外呼舞雖小大賤隸皆得與觀班庭感禮蒙恩地之久乃獨阻絕一隅無緣俯伏後塵伸惓惓萬一北望台纏精爽飛越

某茲者伏審肆頒顯冊登用大賢居上相之尊兼一品之貴華

夷民物慶賴惟均恭惟某官以道德為儒宗以公忠持國是頃雖未授魁柄允所建明無不卓然上當帝意故體貌日隆至于絕等人人以為他日居太平任相職者非公而誰是以詔音一出和氣隨生蓋物望所歸不謀而合方將觀施設之威與天壤並新不知伊尹周公並駕爭馳孰為先後也屬衣制不敢具啟稱賀獨書與人之頌如此伏乞鈞慈特賜矜察

某窮悴山居罪釁深崇謂先狗馬填溝壑決矣今者大賢當國至仁所被雖踈遠微賤之夫猶恐或失其所况趨走門闈之久受知不後衆人切計奄然殘息必不大至漂零舉家慰幸勉奉

大事以盡犬馬之誠如未隕越間尚期一望赤鳥作為崧高庶民之詩稱頌元勳盛德未為晚也

上丞相小簡

馮當可

調元秉鈞道洽履載天眷宗社鈞候動止萬福某即蒙生息大造之恩謹冒昧具狀上瀆仰惟天稟粹全涵養充實神明所蘊妙參化元益祈與聖賢千載一時之遇保思康寧以副天人之所屬望

伏以某官道協天人德流夷夏仁義之澤薰為至和大而山川鬼神莫不清寧微而鳥獸草木咸遂生植蓋干戈紛擾之日未

遠皆天下所未見以古準今則太平之象可得而言矣某廢黜有年荷鉏扶犁從事田畝日與山夫谷民休息至化時和歲豐物無疵厲故得不填溝壑以迄于今蒙被更生之恩由是贊論功德出其誠悃不自以為諛伏望恕察

仰惟某官盛德大業高出前古天下士大夫蓋嘗探求其所以至而莫得其端倪但見端坐廟堂酬酢萬幾以物處物各當其分退而燕私絕聲色貨利之欲熏香靜坐翫味蘭素如山澤癯儒是若可得而聞者以能超古人之萬萬至于道心精微與天地同功其所感召有非人力所能致者則非庸常可得而測是

故當求三代與周化無間矣孔子弟子智知其師靈山之徒贊頌佛祖某叨蒙大恩輒陳識者之意以見依歸之心

竊以宮祠之典允謂優恩或年德孤高宜優其晚節或賢勞王事當錫以燕閒縱其甚寬寧及罪廢豈謂某官行孔門之恕寶老氏之慈一視同仁無間遠近雖如其罪累湮沒之久披拭滌洗之恩振其零丁亦叨此數拜命之日質之天地託之神明誓持啣戴之恩盡于摩捐輒有啟事叙此悃幅顧其_樸澁之辭安能寫心

歲事戊午蒙被君恩獲至闕廷瞻望崇嚴之尊自此奉叨郡符遂遠太階繼以迂愚貽譴司察由是自絕于造化生成之門姓名不登于史記蓋十有三年矣其于鈞衡之重可謂至疎至遠仰惟某官廓如天地以厚德深仁芻狗萬物收茲微賤疎遠並蒙大恩振其廢墜之蹤錫爾優閒之祿僥倖所期不謂至此雖至道善貸漠然無心而微物受成如蒙私德欲伸御荷莫知所云

爰自束髮以來粗親紙筆積日滋久遂涉其流中年公家罪私門釁櫻拂心志舊業荒疎然虛華之氣以憂患而盡銷盈虛之原由履歷以自見于是粗窺六經弛張之用竊見聖賢心術之

蘊每恨以百指累心未遑究業及今仰蒙大恩賜以無事之祿
杜門却掃優游卒歲誓當研精極思深伏長引熏此心香仰酌
造化如其不至猶是用心率以自陳伏紙戰汗

惟蜀不罹兵革民物全盛自近以來年穀屢登今歲又復大稔
遐邇之俗薰陶大化鼓腹擊壤歌咏昇平仰惟生民休戚均慮
所存故敢以耳目之所見聞之于下執事備率之罪莫知所逃

上丞相小簡

賀生辰

孫太冲

杪冬協序歲律將新恭惟雍容廊廟熙載惠疇天佑神扶鈞履
起居萬福某代匱邊隅仰承蔭樾末由瞻望均墀謹具柔訥申

候茵鼎

仰詞典書已列右牘邇來未審均履何如欽想異宣威美上應
天心戩穀川增百祥來舍春陽將屆氣令正寒敢祝勉為基圖
葆寧德宇以慰寰海黔黎之望

歲功將就氣節皆周留一候以示無窮存五莩而全大數天子
此時誕毓真儒鼎角匿犀骨瑩皓玉寔苞靈曜之紀稟山岳之
暉宜其出應昌期輔隆聖緒中興茂烈專美于今祿位之崇壽
棋之永固自有昊天默相非蠡測管見所能知其極也

某官梁楹重器金壁高標雅性內融英華外發故能依光日月

感會風雲勳紀旂常名書竹帛輔太平之至治迺滋至之宏休
荷眷益隆竭忠彌著既富但周之事業宜膺彭喬之年齡輿論
所同愚情彌佞

恭以夢熊穀旦照社剛辰縉紳士民萬口咸詠莫不以椿歲八
千廣成壽考仰祝遐齡蓋由威德洪恩漸洽四海無一夫不被
其賜則揄揚感戴有不約而同者某素荷陶鎔尤深禱頌限拘
官次不獲躬造府門廁迹稱觴之列軌以星香未禮及裴文祝
疏專人賫納鈞廡以表屈屨之誠仰乞寬仁特賜鑒亮

比因亞歲令辰嘗借具竿牘前玷鈞嚴想已獲塵記史今茲恭

遇誕慶之日不量疵賤又以緘封輕瀆尊威極深戰悚伏覲鈞

慈愍其劬^勤而恕其率爾不勝至幸

某迂鈍之資仰蒙埏埴得以効能小壘已過瓜期夙宵勉礪幸
免曠瘼舉錯溫飽寔由洪造誓當益罄篤情以期報塞更期包
舉提獎俾永安于薄分傾依感刻交積卑悰

上丞相小簡

賀生辰

趙莊叔

成歲受春恭惟天棊正人道尊德隆鈞候動止萬福某被受大
庇方達墻仞敢祈嚴護威重永綏斯文某下情真禱

借候鈞崇粗謹公牘矣泰律初回天地始交裁成輔相眷倚上

宰仰惟以道消息戩穀畢臻更祈倍萬節宣順含太和以副九重仰成重慰四海百世具瞻無窮之願

恭惟皇上纘德聖德配天天寔祚之卜世千億則有光明碩大

萬人之英應時而來勵相我國家昔武丁中興帝賚良弼宣王中興岳降申甫此豈偶然哉無疆惟休豈特一時賴之某疎賤率爾妄議上及天人君相之際蓋師友宿昔之共論以為如此非某所私臆也

恭惟某官受天地間氣出佐興運曉然見秦漢以來歷世之士陷溺末習隨宜補闕僅立一代之治寔始慨然收拾堯舜三代

周孔之遺文盡發其秘起是道于千載禮樂廢絕之後神功妙用無處不到大位天地小育萬物聖天子知是其出于一也傑閣大書以表中興天下皆得而測之曰君臣之際蓋如此豈非真儒治效之極致聖宋無窮之盛烈也某敢誦言之

某謀書竊嘗妄議以為人莫大于有我莫小于有物有我之至于無我孔子孟子之身相魯為齊卿卿當時視之若一旅人然何則有我之至也伏惟某官有大勳勞于天下皇上念無以致其報脩物典冊窮極尊榮可謂盡天下之富貴矣而燕居之室左圖書而右文史介然端坐奉養枯槁如高僧逸人士之以言

語自達有無間有精粗靡不畢覽陰暑祈寒忍倦忘疲如布衣
儒生然則兩儀之間復何物可以惑我者非孟子所謂富貴貧
賤威武不能動莊周所謂焚大澤流江海破山震海之風雲所
不能變者哉擴而充之是為大丈夫斂而融之則為博大真人
某不自虞僭議光明無所逃其罪

某草茅微賤讀書應舉其寔為貧也當聖王勵精庶政某官器
使羣材之日得以文墨微名于上冒寵不避退有愧懼繼得再
到東閣道所以幸敢圖賜之從容如大賓客擇地除官滿適其
意且謂純白可教教以有吏某雖愚無知聞某公先生此言亦

竊自奮厲以口語心惟忠惟孝惟恭惟謹庶幾萬一不負嚴訓
區區感激不覺布露惟先生撫綏之

仰惟上帝篤生大賢以休息我國家元元十餘年來溥海內外
父子兄弟得保天性禾麻菽麥各遂生理投我木桃瓊瑤報之
人情古今一也矧億萬生靈舉八壽域此何從來哉是則無以
報矣獨無可以致其誠乎茲者岳降之辰竊為炷香薰心瞻南
極之星誦千載之章而虔頌者無間貴賤人也羣情如一上帝
臨之

竊惟威德無私施及萬物天下樂推而頌焉者劫于情而惑于

中也某蒙被生成及茲愈豐矣既不能親舉壽觴切不自揆綴
為律詩十篇引領鈞屏再拜以獻願以一德格天福及萬方眉
壽不害與宋無極豈待人言哉然其中有不得自己者如前之
云斐然而成突然而至不自知其言之陋也惟大仁人寬之某
慚圖前去交割職事身在鈞鑄之下有命其敢不承惟某官所
以命

上丞相宮使小簡

王元長

某一介之賤輒犯威嚴僭易請問起居狀下情悚懼暑氣益隆
恭惟琳館宴閑神右賢業鈞候萬福某仰籍大芘塊處田野萬
想滅矣獨于門墻未嘗一日忘也謹勒恭候

竊以相公自去秋解机務之重從俟館之佚高標雖望超世絕
俗仰惟襟宇日益冲淡更覲順寒暑之宜適與居之節妙理和
倪以爲相門盛大之慶以副生靈之望

某中春走介寓咫尺之書塵涸記室日俟僭率之罪比其歸也
伏蒙賜布帛之溫言寵系榆之暮景雖王公大人謙尊而光顧
豈疎遠疵賤所宜蒙哉伏讀悚然以榮為懼

某得請以歸深居窮僻未嘗與士大夫接其于時事可謂耳無
聞目無見出入阡陌惟見田父野老佇袞衣還廟堂致中興之

事業以幸天下獨未知天意如何耳天民聰明自我民聰明民心
蓋天意也鋒車之召其在旦暮屈辱之私尤所歧望
某居閑微祿不足以糊口豚蹄之祝蓋惟望歲而已久雨不止
下田皆墮渺漫見者有填壑之憂連亘數郡如此正恐亦軫九
重之慮也

上丞相小簡

晁子西

璇穹周迴協氣充塞恭惟坐于廟堂兼運樞極王室倚賴神明
並相鈞候動止萬福某敬奉牋代其身賀于堂上

適辰不省鈞用何如聖賢相逢坐建中和之極當此淑節更覺
協氣周流伏惟冲粹集于神衿超居超勝其在方內拳拳之情
更乞盡消息理永享三壽之祉

伏聞丞相之印明天子久未有所付海內延頸日佇顯冊之頒
蓋踰年于此矣屬者恭審詔自中出告于大庭卿大夫則相賀
于朝士庶人則相賀于家乃知明天子必待其知之深而後用
之富公韓公之登庸豈直如是耳某在遠不得從百執事詣光範
門敢致一牋于衮衣之前伏乞鈞覽

某名迹冗微不敢以書通于明公大臣而獨喜見東南來者從
之問名公大臣之賢東南來者皆疊：談相公頃在天官時吏

不敢為姦而士大夫恃為津梁已有廊廟之望矣今某與遠方
之人自聞召還揆路遂執鈞衡無不欣：相告中外幸甚幸甚
某少經憂患異于他人重以才具迂踈不任當世驅使以此寔
無宦情願出仕垂三十年無田廬可歸為貧所驅屹屹州縣間
但知自治而已不自意猥蒙朝廷遽從支郡擢付一道而巴蜀
之俗喜為朋比以闕落不事：為賢某效之則違其本性且負
朝廷欲不效之雖民則喜矣其如官吏不悅者衆朝夕皇：不
知所圖輒敢布之伏乞鈞察

上丞相小簡

汪彥章

初秋氣爽伏惟經體贊元均福中外陰有神明來護寢興某銜
恤里居未有俯伏階祀之期下情伏深瞻仰敢乞惠令節宣上
承眷倚為宗社無疆之慶
伏自違去思地旬歲有餘雖日與陶冶諸生蒙被膏澤荷戴不
貲其如身迹疵賤曾不獲薰沐修狀仰布此誠茲者大賢登用
海內同慶伏以區區犬馬之報越在遐方無緣陪士大夫班庭
之末瞻望台閣精爽飛越

恭惟某官以天與峻明之才加之聖人淵懿之學為盛時而出
必當大有施為利澤天下故方朝廷輔相之典一新首膺柄任

中外呼舞以數千百年太平之期適當今日雖至愚不肖者亦
將得其分顧顧非木石豈無此情緣衣制不敢具啟稱頌
某至愚極陋晚預簪纓之列奔走布領乃分之宜不圖先生過
聽擢于衆人之中付以學校之選退惟僥冒已無可報稱之理
至于為親之故周旋曲折動皆如意雖使自為之謀不過如此
罪逆顛隲受賜不終然在荒迷中未嘗一日少忘感戴惟當庸
自修飾或未隕滅尚期少効區區上答生成悚息悚息
某禍患漂零屏居饒之德興雖聞大賢富國田野無知之民交
口相慶緣地遠不克即布層層之誠伏惟鈞慈特賜矜察

伏覩顯冊之頒曾未更時人心所悅和氣隨生風雨協期倉箱
萬計雖纍然俟填溝壑亦知未至失所以此感戴厚恩尤倍倫
比

上丞相小簡

晁子西

比日時有清和意不省中台之光所照山川氣序何如伏惟赤
烏燕居倍膺冲粹加以神明協相鈞候動止萬福某守地不得
詣行馬之前乞為天下未究之功盡消息理以須臾名

伏聞袞衣西歸凡鄉黨之士與嘗從賓客之游者無不迎于道
路候于里門而某平日受兩世之知最厚願獨不得前豈勝愧

恨雖再上牋牘終不能紓下情萬分也伏惟悚仄

某敢問久處衡軸乍還甲舍向來對植之木皆已成陰按行三徑最物增麗雖釋幾務之勞比就閑暇固足以樂敢誦獨樂園詩之恐造物不我舍耳某敬頌耳以聽

伏惟門下趨材之館固應日盛日富而平昔得之于破內者惟某與李健為耳健為尤答覘不振甚為門墻羞近聞大為州將所苦且將就建極可念能為解其急者非歸窮于門下不可敢亟以請倘軫鈞懷徑從府庭遣一介致書于州將宜聽率爾申論皇悃

上丞相小簡

王望之

某借易請問起居狀于記室不勝震恐

已春寒色尚凜即

日伏惟總繼領百辟密贊萬幾天人擁佑鈞候萬福某杜門窮巷竊祿祠庭仰戴恩私誓不敢忘惟是無路進俟下情倦。某謹勒恭候

某蒙恩便私遂遠門墻朔風馳情惟劇犬馬之戀即日不審寢饋何似伏惟默運神心調和元氣動膺百順坐致休祥氣候暄寒未齊敢祈上副倚毗下慰具瞻保合太和為宗社無窮之福竊惟相公以孔孟之道發為相業巖瞻聳然威名遠播紹復中

原萬物吐氣蓋有日矣惟佇褒陞槐鼎與天下共慶

某曩謬叨冒政宜自竭而多病罷軟一毫亡補滙誠弓閑伏蒙
鈞慈軫念寵以職名處之祠館華其老而濟其私皆鈞播也某
非木石豈不知歸倘未填壑筋力可勉誓摩頂踵效蛇珠龜印
之報神寔臨之不敢誣也

某臨行兩詣朝堂府第竟不得望台光侍熒坐少叙屈：感激
依戀之誠迄今負負未已也惟鈞慈恕察幸甚

上丞相小簡

正賀

文天賦

蒼精司候歲序肇端恭惟銓時論道天相忠勳鈞應興居萬福

某備數偏城仰托恩覆尚遙瞻拜門墻謹修守訥申玷典籤
謹時申問之儀已列彝式東風解凍氣令尚寒不審鈞履奚如
恭惟弼亮一人布德行慶共格龐鴻之祉更乞重為社稷生靈
怡神養漑逢迎太和下副輿情之禱

元祚屆期三朔正始寔上下文泰之辰品物咸亨之際仰惟大
忠碩亮輔行洪化德協日新高穹之所保佑綿宇之所贊祈皆
以君明臣良宜永膺于多福昌熾耆艾萬有千歲豈特詩人能
為魯公頌哉門生下吏寔亦賡咏再三不知窮已頌依瞻禱倍
越夷等

恭以某官至德邁倫全才拔萃勲業蓋天地姓名高日月求之
往哲非阿衡周公不可為比當歲律之更新諒眷懷之益厚格
天盛美奠枕休聲有識者莫不以時稱頌非臣：私情敢獨形
于紀述之者也

竊惟方今道洽政治歲阜民和囹圄屢空兵革不試典章制度
煥然與三代同風塗歌巷舞共慶海內之丕平寔自某官輔佐
真其主履中興之運隆不拔之基感會天人宣明帝載以致其然
某恪奉教條遵承德意獲與舉邊遠郡氓同被恩澤其為忻戴未
易明言遐遠鈞儀荐更歲月雖駕駕蹇戀軒之情夙夜在念自惟

名分有間不敢頻貢柔函上瀆威重伏冀寬仁曲垂恕亮

某綿力薄才重蒙恩造之加假守邊圉已書一考雖不敢務為
矯異之事以拂人情而仰賴函覆勉恭欽昭布朝廷之德意
致蠻獠向風編氓安堵使闔門百指溫飽自如寔出生成之賜
某誓將愈竭靡捐盡瘁撫綏庶逃瘵曠以少酬陶冶之私銘篆
愚襟筆端莫究

某浮賤微蹤累叨獎拔雖贊論帥幕無所取裁而付以一麾尤
為寵異自顧僥冒之深慈歸卯翼敢不銜恩戴德以圖龜雀之
報耿：此心叨祈洞鑒

某恐憊僭越百拜申問鈞閱寶眷恭惟履此新序茂膺戩穀
某惶恐武岡恐有駮委乞賜鈞旨

上丞相小簡

賀正

孟陽紀候四序肇開恭惟詞庭多暇天相人瞻鈞履燕興萬福
某承乏偏城遠托鈞履尚阻趨侍謹具手訥申候典籤

仰承寢饋之儀祇載右楮不審適日鈞候何如欽惟真宇恬然
天光內發休祥之至密有相扶春令方新寒颶尚徑更祈精葆
粹和復登塊鼎以副四方之望

某官名高今古功在社稷雖退休外服以道自娛而去就用舍
為國安危當茲歲節更端陽德居內佇聞召還廊廟再膺爰立
以固珍圖式符輿論下情傾望尤為深切

元正歲祚品物俱榮伏惟盛德履之自天膺祐殊慶大來壽福
之延何有紀極稱觴祝永填益鈞門某以官箴有守阻趨崇仰
輒具短戩以伸祇賀之誠仰止高山恨無羽翼

某才力凡下備數蕃宣仰荷恩德履提兩見新歲其為感幸未
易名言更祈益賜推揚俾遠訶譴瞻依之悃仰冀鈞照
申問恩閱鈞眷伏惟中表共納純休國大夫人恭日有安問履
茲新歲福美駢增

上丞相小簡賀正

熊子復

龍杓甫轉鳳紀再頒恭惟明良相須隱顯交相鈞候動止萬福
某猥糜漕指第劇岩瞻恭裁贊牘之辭仰涸典籤之史

祇叙寒燠已挾彛賤欽伺夙霄用攄申禱惟真宰相之弼亮有
神明之護持紫皇注心蒼生拭目茂臨新序荐納多祺

歲筦肇新物華萌動猥拘七聚方攬轡而服動勤逖望三階阻捧
觴而介壽仰鴻儒之揆道欽燕處之對時仁風翔而發育無邊
和氣薰而昇平有象採諸輿頌荐此蕪辭

恭以丞相器逾鼎重材極棟隆盛德格天昔既有若伊尹殊勲
闢國今豈無如召公鈞樞承兩世之傳膠漆契千年之遇澤方
霑于華夏績已燦于旂常何幸親逢焉敢為佞

敬惟道德之門仁義之宇孤蹤一別元翔再更屬外絆于輕輶
第遠輸于華翰昨屆履長之序嘗修贊壽之儀茲復挾裁併庸
鋪叙崇閣倚漢華萃瀛肇逢萬寶之亨均迓百祥之集

上丞相小簡

熊子復

璿杓建子實歷頒冬恭惟帝倚台衡神扶國棟鈞候起居萬福
某猥糜使傳逖望宰廷輒裁狂簡之辭式叙勤拳之意敬馳單

介仰拱典曹

敬頌成處甫贊彝儀欽贊節宣庸申虔禱仰惟一相之揆道倍擁百靈之荐祥正芴垂紳重茵列鼎上體九宸之眷下符四寓寓之瞻永贊珍圖並綏繁祉是誠真禱非敢返

景至測圭陽來浮琯洪鈞一氣已潛復于寅宮泰階六符正炳連于紫極某屬拘塵鞅阻奉椒觴願闕真宰之規拳益狀太平之氣象惟易明剛長之序是謂得時而詩存難老之章尚歌為壽熒煌甚邈悃悃奚殫

恭以丞相敦大有容直方無撓自出膺帝簡若：早峻于師瞻迨再秉國鈞挺挺益彰于祖烈當綜覈勵精之治有彌縫藏用之功譽處益隆頌歎難極

拜遠指符侵尋日月仰高墻伋間阻山川每戴惠于岩廊屢控忱于竿牘適屆迎長之序用虔修慶之儀聲雖成文言莫盡意竊以漕總七閩疆連三浙起孤蹤之閑散伏隆指之將明深懼踈庸上辜臨遣惟賴帡幪之庇尚圖毫髮之禔搖筆怔忡伏紙惶懼

鈞閭星辰之眷諒皆擁于休祥閩封山海之區恐尚煩于約束鄙心敬祝綿力願宣

賀丞相小簡

賀冬
六幅

熊子復

杓占朔易律兆陽回恭惟帝眷宗丘民瞻元老鈞候起居萬福
某謬膺轉輓幸蔭幘幘瞻衮烏之未遑冀鼎茵之加嗇拳拳是
禱

筆毫奕殫

拜遠堦浮時既多閱仰高墻伋心弗少移比叨六轡之來喜際
五雲之近屬簿書之煩委愒日方糜加原隰之阻修移風未果
雖嘗裁于尺牘曾莫述于寸懷何當款侍熒煌歷陳悃幅引毫
思澁伏紙神馳

伏值迎長之序合恭展慶之儀緣拘絆于冗司阻贊持于壽掌

仰止台衡之重履茲陽律之新即還秉于國鈞用益調于帝綽
使萬彙沐太和之澤而千齡膺難老之祥敢竭此誠敬為是禱
某誤由閑散起昇將明惟此七閩介于百粵何幸使華之輶傳
乃依宰鉉之鄉闕雖綿薄之亡堪尚此存而得免顧恩輝之甚
厚宜感鏤以奚窮

冬序凝嚴相閱遂靚迎蓬瀛之眷集蒙岳瀆之護持萬慶日新
百祥川至

閩封物夥漕局事煩豈無間燕之需或有丁寧之戒願聞鐫喻
乃見鈞憐

上丞相小簡

冬賀

劉夷叔

朔律戒嚴寒飈彌勁恭惟宰正百官儀刑四海蓋載荐休鈞候
興居萬福某備員遐圉仰託雲床尚稽瞻拜鈞庭謹具啟申塵
記府申候饗寢之儀恪填右紙未審此辰鈞履復奚似緬惟運
動樞機變化人神叶氣嘉生永膺純祐當陽剛來復之辰更祈
益體卷隆鈔毓神觀式副寰宇具瞻之望卑悰傾祝無任拳拳
某官負閒世之才茂經邦之畧名齊崧岱勳耀鼎彝自昔宗工
碩德翊贊中興輔成平治未有若斯之盛者寔社稷無疆之福
生民莫大之幸當令序之復臨諒大忠之益著垂方典冊固將

與霄壤同為不朽區、稱述蓋採之輿論仰乞鈞慈俯賜矜察
竊惟盛德大業超冠今昔固非小智寡識所能窺較然考之時
事則風雨調適稼穡豐成訟獄空稀干戈偃戢羣生和而萬物
殖亦足以見格天之效休祥滋至矣某仰荷鈞播每與黃童白
叟共歌化日之舒長未嘗不感慨歡呼以幸逢華旦也

一元肇啓萬彙潛亨恭惟某官道與時行德膺帝祉上協岡陸
之固下霑動植之煩簪履稱觴款啟騰沸某拘縻恪次祇畏簡
書無階躬詣鈞庭徒深傾祝謹修尺牘少叙微誠敢祈鈞照

播芳大全文粹卷五十五

國家圖書館, NATIONAL CENTRAL LIBRARY, TAIWAN, R.O.C.



卷五十五

聖宋名賢五百家播芳大全文粹卷五十六

疊幅

參政 樞密

與張參政小簡

伏自執事參柄國鈞凡絲粟毫髮之才皆蒙收用如某門墻舊物當是爐錘中受賜一人之數而獎用過當非意所及重勤誨飭恩言慰藉勉以造官即日航湖襆被而行尚欲策磨朽鈍以効一割之用而力小任重不可負荷必至顛殞以孤任使伏紙占謝以愧以恐

時事多故更用大吏視之殆不如恭也參政自結主知進登三
事倚注之重度越諸公靖康以還一人而已側聞淮寇衆散而
歸宗社再安鼎司空位當屬元勳即聽非常之恩以慰天下之
望

某愚暗自用屬觸怨咎投閒置散乃分之宜參政念一夫不獲
之辜必欲滌除瑕垢復齒于縉紳嚴詔初下亟上免奏率意之
所欲言止欲感動上聽而言狂意拙不悅已者又復醞釀以為
大罪以參政秉造物之柄噓枯吹生而某頭方命薄動輒得咎
莫如解去全璧而歸區區之心方換朝夕投誠上

與參政小簡

王元長

秋氣淒清恭惟鈞候動止萬福某承乏宰屬賴雲蔭雖未以罪
斥而門牆緬邈無從趨侍趨借易詞問記室

某屬者數以竿牘仰勤聽覽正恐犯分獲罪左右鈞慈貶損必
賜誨飭以故區區之私每不自安至于感戢榮施又非一言所
能了也即日不審鈞用何似風露益並冷敢冀妙里冲和歸俟冕
旒發揮賢業使生靈出塗炭之中躋仁壽之域蓋天下之望也
某曩晚踈拙方欲丐歸田里未及下手而丞相已去矣孤迹廟
堂既無相知又言者攻呂似未已不知如某者得全璧歸否四

顧茫然無所控告欲望鈞慈惻然以一書為席參言之使得一
在外遠闕待盡山林其為恩造何翅生成之賜也特桑梓之末
輒忘借易惟參政留念幸甚

上參政小簡

于子儀

蒼精司候歲序肇端恭惟弼亮公忠天人參介鈞候興居萬福
某代匱偏城仰叩雲陰尚遙參拜鈞堦謹具柔訥申詞記府
謹持申問之儀祇載前楮即此東風解凍氣令尚寒不審鈞履
復何似欽想翼宣盛美道茂經綸戩穀之繁明靈默贊更祈重
為社稷生靈精請苜鼎下符傾祝之勤不備

佐

元祚屆期三朔正始寔天地交泰之辰品物咸亨之際仰惟大
忠碩德輔行洪化遐齡景福山聳川增下僚傾頌尤為切至
某官躬久大德業之資當盛旦昌期之會備摠妙蘊保佑聖神
變化之勲如被草木岩瞻之望簡在宸衷佇聞榮陟元台輔隆
洪祚早情不勝祈向之切
歲律更端椒觴稱壽茲為彝禮今古所同遠想簪履盈庭冠蓋
旁午某以拘縈吏役阻造軍門輒憑毫楮以代虔儀仰乞矜察
某疎逖庸微邈在邊圉仰視大府潭、何嘗霄壤前此不自量
分僭貢竿牘以為星辰之慶迨茲元旦復拜緘封蓋以懷感德

誼殫布悃幅不敢自後于與人冒犯之愆仰起原貸

某迂愚下士久荷涵容屢勉蕃宣苟逃譴斥感銘厚德寔倍常倫更蘄包匿荒垢俾獲保全依禱之私非言可既

上參政小簡

冬

李久善

冬律屆中朔風凝凜恭惟協贊政机天錫純嘏恭候燕興萬福某遠託蒙覆尚稽瞻拜履細謹勒手啟申塵記史

載詞寢餼之儀已列前楮比辰不審鈞履何如緬惟寅亮天工休有神相茂集繁祉七日來復萬寶潛萌仰祈上體春懷精加調衛以副中外之望

某官以宗工鉅儒經綸之業贊襄黼屨勤勞王家弼成至治宸衷眷厚右揆久虛佇聞渙號之行別條賀牘士夫之論固不同之竊觀比載以來三光全而寒暑平五穀熟而人民育道洽政治上恬下熙協氣橫流頌教并作盖由同心協謀繙縫輔贊以共成不拔之功某承乏偏壘得與遠方黎庶鼓舞化鈞不勝欣幸之至

星回昴陸化日肇舒恭惟某官道與時生百祥萃止某限以拘守官箴阻墻仞第勤傾頌之誠輒修慶削上美典籤伏幸鈞察某一介寒微仰荷埏埴雖瞻望崇墉勢隔天壤而傾依戀美慕

之誠夙夜無已自顧孱微宜安薄分故不敢數貢柔緘以取狂
僭之罪引領鈞墀恨無飛肉

某才韻枯梗無他技能以竊誤恩分符支郡寔賴鈞造包含未
歸司敗私衷感戴未易名言更冀威德優容益垂覆庇卑悰無
任依歸之劇

上樞密小簡

毛伯穎

冬序凝凜恭惟參翊化鈞樞機周密威名武震折衝萬里鈞候
動止萬福謹具啟承候起居

某官道德謀謨經綸之學遭時艱棘纓冠授任威謀勲代震動
海寓社稷所賴泯庶具瞻伏乞保御粹和永膺多福

盛

伏以妖氛未靖獯醜尚汙中原主上憂勤緝熙紹開聖緒信順
體治天人參助賚茲碩輔同心同德廟筭先定克集大功恭惟
執事維綱調度指蹤制勝萬全之舉近在旦夕縉紳傾頌咸願
紙筆和鈇鐫勒金石以追歌詩誓命之威天下幸甚

某官以儒林宗匠登翊聖朝運動樞極傳說旁求俊乂周公降
禮海內人士莫不願輸肝剖膽自効于樂育鑪錘之末而某卑
飛榆枋磨眇連蹇何足以辱執事之傾盼然竊意洪鍾虛受無
求不應匡、悃幅當蒙矜照

某建炎初蒙召赴維揚行在與丞相張公比牒併名出入于黃
丞相之門才疎命薄所向跋扈桑榆頽迫俛仰無成切感某官
以宏材高誼振拔汙險之中疏遠寒雋無不向風慕義是敢飾
其固陋願自附于構榱株櫨之末恭惟兼取並蓄之度有以財
幸

竊以書生事業卑陋寒冷方時艱難賢哲馳騫寒裳濡足惟恐
不及而摩研編削之技將何所施但竊伏執事之下風嘗獲誦
詠遺編墜藁沾飫于殘膏賸馥者久矣是敢效古人執贄之禮
錄其不腆之文獻諸黃閣下伏惟陶冶大公無棄金遺土辱磨
汰而埏埴之幸甚

某人微地寒越在別壤于執事之門無葭莩鴻毛之重而率爾
狂言犯分冒恥自通于記室以流俗之見言之亦可謂不思之
甚矣然竊意執事方以瑰瑋奇傑之度旁搜遠紹進用貧賢孤
士以復古道以振流俗之際終不以其踴躍不祥而賜棄絕用
是自決若執事幸辱教之亦市駿骨致千里馬之義也干冒鈞
慈無任戰越

上韓樞密小簡

宮祠

王李高

申問起居粗如常禮庚伏矣敲茶惟琳館晏閒神右勳業鈞候

萬福某竊祿祠館杜門窮巷末由瞻望履舄遡風馳情不勝拳
拳謹勒恭候

自錫邑津亭請違脩高秋矣疎速疵賤亡路擁篲以待門墻即
日不審鈞用何似暑氣正酷敢覲調護茵鼎保合太和以篤相
門盛大之慶以副海宇之望

竊以樞密端明聲名風采寔魏王是似至于奮然不顧遠使強
虜其為忠義近時士夫所未有也持顛持危正賴柱石今乃解
樞筦之重從祠觀之佚然鋒車之召其在旦暮乎願戒舍人束
裝以待某胷中索然七毫髮可為時用者獨樞密存錄獎拔蓋

三十年矣而其頑鄙倍費鑪錘之力樞密刻意成就久而益勵
願惟此思何以論報虺珠龜印莫之異時而已僭易死罪

上沈樞密小簡

毛伯穎

春杪暄潤恭惟運動樞極嘉言孔彰折衝綏遠之謀海隅蒙賴
神理昭勞鈞候動止萬福謹具手啟申問黃閣

恭惟某官以全德上賢譽處隆洽誕敷典冊入踐樞極宥密之
地伏想綸言誕告公門省戶之間縉紳喁喁罔不欣頷某素荷
知眷遐聞褒詔切深忭躍

伏以某官道隆德峻見遠識微爰自翊宣萬幾羽儀表著敬猷

軌訓之懿海內誦之今者光被贊書再登政路定將闡融勲績
嘉靖萬邦仰冀嗇神養和愈茂棟隆鼎鼐之素

伏聞某官促駕銜車入覲宣室懋膺華光講勸之重尋具尺牘
附致悵惘伏想已闚視眎覽惟是揆述詢範歲月滋久邈在遠
服壅蔽朴愚瞻仰堦符但增悄抱

伏以皇武鷹揚執敵震駭主上圖任耆俊維清緝熙用丕顯祖
宗之休命某官以舊德元勳荐登樞近恭惟經文緯武職思其
憂佇待親咸劉武邁之功混一區宇垂副具瞻之望

與樞密小簡

氣候漸熟伏惟從容右符神明其相之鈞候動止萬福末緣參
承切冀若時保重倚須大拜

違去熒席雖涉日未久區區景慕若隔年歲向非親誼用全至
厚詎能使人奉之不忘能如此憑書引領愈切依歸

伏自擢司本兵之地即捷奏無虛日制勝之策何其神速若此
耶惟閣下至誠樂易其心休之焉蓋古之常人吉士非適來縉
紳所可及也當坐廟堂謀謨天下庶幾厚德以鎮浮卓行以善
俗一變近世澆薄之風則智明勇功特其餘事耳

屬者獲依大庇苟祿數月亦已幸矣既已丐閑請請俾遂山林

得

之性此意豈可忘耶今茲翳迹華門寂無一念特以扁州草履履放浪田里中倘未獨弃或以餘光振之固所願也非所敢望也

上樞密小簡賀

黃鍾紀律氣令凝寒伏惟運籌樞府天人交相鈞候動止萬福某孱瑣微蹤遠依幘芘尚稽參拜赤舄謹勒狀冒塵典記

修詞鼎茵之儀恪具異式適辰不審鈞履奚若緬想惟忠宥密贊計廟謨休慶之來百靈攸介天元肇復庶彙潛萌願言咀調道消息時宜以副海內黔黎之望

某官偉才名世妙識濟時簡在冕旒擢專樞柄竒謀碩畫遠邁古人輔贊彌縫實推明哲行觀大拜以快輿情早悼祈嚮之初切竊惟方今華夏乂安四方無侮兵革偃息百姓牧寧蓋由默運韜鈴折衝海表故治效之著如此其盛某備員遐圉得與士民同其鼓舞寔千載一時之榮遇忻幸之至倍極愚衷

書雲紀候爰日初長恭惟某官道協剛明福祚蕃衍某限以官守拘牽莫獲走慶鈞堦徒勒祝頌輒修尺牘以露微誠仰乞鈞慈俯垂體照

某疎遠孤蹤仰賴洪厯得以効能小壘瞻望鈞庭邈在雲漢自顧分守有等不敢敷貢柔函上浼聽瑩惟傾瞻戀慕之誠無時

或替敢乞鈞察

某浮賤之資濫分符竹秋間已遂書考敢籍鈞庇之宏得免曠政
瘝卑情豈勝感刻更冀至仁兼愛益賜包荒俾遂安全誓將疲
精盡瘁以酬恩履依戀之深仰丐矜念

申問鈞閱瑤眷伏惟上下各擁純休

某惶恐下郡恐有驅策乞賜戒約

郡王 太傅 太尉

上韓郡王小簡

賀生
辰

蒼精司候歲序肇端恭惟琳宇燕清天人參介鈞候興居萬福

某代匱偏城仰叨雲蔭尚遙瞻拜鈞堦謹具柔訥申詞記府
謹時申詞之儀祇載前楮即辰東風解凍氣令尚寒不審鈞履
復何如欽想優游祠館忠繫益彰戩穀之繁明虛默贊更祈重
為社稷生靈精調苗鼎下符祝頌之勤

元祈屆期三朔正始寔天地交泰之時品物咸亨之際仰惟大
忠碩德茂對昌辰福祿綿永早情瞻頌寔倍夷等

某官竒謀妙畧素蘊宵中茂烈殊勳久揚閭外功成勇退恩寵
益隆雖願神奉祠坐享封爵猶悵不忘帝室之大計忠義之
節愛無前比佇觀進跪槐鼎積考中書以允協于師言幕府舊

僚祈嚮彌切

比辰候屆三冬莫收九葉既歲功之已就寔春令之將臨天下
此時誕生賢帥英姿偉質超冠等倫宜其夙奮忠謀結知黼座
扶持王運茂著元勳壽考之隆固將與寶祚同其久長欽頌之
情毫楮莫既

某孤蹇微蹤久蒙獎庇恭逢降岳令辰及此新節當躬造崇墉
廁賓屬稱觴之列限以賤守攸拘不克如志輒以星香末禮及
祝疏慶函冒塵熒座敢乞鈞慈俯賜鑒照

某迂愚下士備數蕃宣獲逴譴訶寔由恩覆更覲盛德愛人益
賜提攜俾安于終始瞻依壑仰彌激懦衷

上韓郡王小簡

冬賀

冬序向深寒風加勁恭惟棲神真館天祐忠勳鈞候興居萬福
某仰窈雲陰末由瞻望履綦謹拜手干冒典書

申候記史已列前楮通辰不審鈞候復何如緬想玩道祠庭密
扶宗社休祥之衍山聳川增陽氣方亨氣候凝凜切乞勉體春
懷精調鼎飪下慰傾祝之誠

某官以雄才碩量為國宗臣功在王家芳垂史冊用能顯膺茅
土茂對龍光身名俱榮超冠前烈誓茲均逸琳宇益著丹誠佇

聞正位上公以福天下

亞歲令辰有生同慶恭惟巨德履之戩穀駢臻某祗畏簡書拘于職守不遑趨厠賀客之後塵徒勤傾頌輒修短牘以露愚悃仰乞察

逖違榮座荐易星霜鄙心傾馳無日不在墻仞更事倥偬不獲時拜柔函第深悚愧伏惟鈞仁俯賜恕諒

某鈍駕之質假守偏方寔自獎拂之素每思夙夜恭勤盡心綏撫以仰稱于知遇感幸之私無以為喻

某碌、無竒徒勞小壘速賴廕越苟免曠瘵已書兩考更覲威德始終提掖不勝至幸瞻跋旌戟志徃形留

上陳太傅小簡

季秋謹時伏惟道隆德重勲業赫奕社稷攸繫神明相輔鈞候動止萬福某服力職事不敢上煩賜念謹奉啟上聞

區區上承候問之禮敬布右楮適辰不審燕申餘暇鈞用何如伏乞仰副宸衷禮眷之渥寶練冲和某頌

某疎逖之跡伏自一違鈞闈屢更歲籥岩瞻景仰不勝下情某拘絆天涯未緣眷宥但深依歸戀慕之誠

某微賤無取引分自慙不敢輒修竿牘塵汙几閣恐速僭越之

罪仰惟鈞度容涵未賜譴訶下誠幸甚

恭惟某官協德位師端誠考古功名終始深契禮經惠澤元勳四海蒙福天錫難老永固壽祺天下幸甚

某孱鈍竒危一介之賤承乏鄉郡閱日滋久無補事功方虞敗黜茲蒙朝廷以某芟艾狂卒叙錄微勞賁以宸章進直龍閣飾之魚紋就叅漕計罷數便蕃踰涯溢分內視缺然有此遭遇以榮為懼寔為鈞造曲賜甄收噓枯吹生自卯而翼天地父母之恩恐未致是某感激幸會豈敢須臾以忘道阻且長無由趨詣鈞屏侍面以叙謝墜下情無任悚恐之至

某人微望輕智疎術拙早被眷憐得預使令之末已為莫大之幸仰承恩數遂使綿薄而摠繁劇况賤而陞清華出于覬覦之外非所宜蒙曉夕恐畏如臨淵谷誓當殫思畢慮竭盡駑力庶幾無辱門牆而已

某本路恐有驅使事件乞賜鈞喻願効犬馬之力

鈞閱寶眷伏惟神示相佑坐擁休祥

上劉太尉小簡

問訊起居狀于記室之史頗涉僭率殊深愧惕春寒尚凜恭惟總領大軍紀律嚴整神明依護福祿駢集某竊祿祠館未由伏

謁幕下遡風馳情謹奉狀恭候

某承乏行朝每荷優遇比者得請而歸更勤飲餞區區感戴未嘗少忘即日不審鈞候何如氣候暄寒末節敢冀為國家眷顧倍加調護以副天下之望

某遠家幸四境亡虞得以偷生田野皆出大庇敢不知幸但乍歸一番應接擾擾無少暇以故不即寓狀起居其寔于左右未嘗不眷也

舍弟于門墻雖昧平生伏蒙特達許辟置帳下刻骨感藏更望留念早賜成就幸甚晚瀆聞聽伏深愧懼

與劉太尉小簡

即日凝寒恭惟鎮撫豐暇神明協相台候動止萬福某遠託恩庇未由參覲伏冀為國自重

某違去旌幢于茲累年下情傾仰無物以喻一行作吏赦過不暇追數初心每用慨嘆何當躬詣帳下盡布此懷臨書重增悵望

昔歲病臥山中伏聞登壇受鉞之寵扶憊占辭因一叟兵為慶迄今不返其浮沈殆不可保比遣使臣護綱至鄂渚再上記頗詳悉伏計已塵台几感念恩義有不能忘者不在書疏之疎密

爾尚幸字照

某偶以宣威之檄分校特奏名進士于成都用四十日始得歸中途下拜因永康所賜台諭跪坐以讀恩意慈祥寒屋為暖薄暮就道傍僧舍取火作記未謝萬一益深感愧之至

某資中方報代已蒙朝廷記錄繼下沈黎之命願何以得此不敢忘所自也重增感愧然某衰病益侵行挂衣冠神武門下與草木同腐矣平生相知如公無幾輒布苦懷臨書淒斷

台眷上下均慶有役願受令

侍從

上王尚書小簡

員顯道

未夏謹時仰惟崇深禁掖武部雄特職穹地峻神天扶贊台候萬福某謹專勤勒記上詞興居

某中悃之誠右牋已悉比辰暑氣漸盛仰惟師長百僚羽儀萬化賢哲所介擁祥時萬益壽而臧伏丐妙用冲和永為王室依賴下副字縣傾繫之切

某仰惟某官誠明之質溫厚之文二者皆粹然不雜所謂黃琮白璧天地之器南金東箭湖海之望向者屢試藩符均勞外府然汲黯寢謀望之雅意自當本朝之重適者黼宸所以深思

旌車所以亟召先畀舊物行秉元樞旦夕真何踵而須矣匪佞
伏覩制書以禁掖之任仰屬威德百全之英誠足以施六藝之
明效分九品之清濁縉紳君子與夫蓬茅之細民間命之日皆
歡欣鼓舞引首南望恐除拜之緩也更乞養望台衡遂熙庶政
則山公品題毛玠稚量皆不足列于大君子之前矣
某區區一介力劣才下鼯鼠五技駕馬十駕深虞不堪世用今
者恪將使事遠廕幘幪逖觀盛時登進良輔俾無庸者得依洪
庑與萬類同慶誠夙昔之願也感悚之懷臨紙無極

上尚書小簡

夏令云初炎蒸漸劇仰惟典正七曹鼎來萬祉神天協贊台履
動止集福某謹勒記上千典籤

比辰星迎東井風起南薰不審台座日用何似想惟濯纓清途
視草禁掖兩有勝適更祈妙護一節即正三階下情企禱之切
某官富文篤學燭理明道冠藝于南宮謁譽乎西蜀令聞令望
表恭一世名流勝士殆未可跂而及也五兵要職八座崇班蓋
聖主姑示優賢之寵然超除特拜未見其止側耳白麻之宣黃
靡之入匪昕伊夕也不誣不佞

竊惟國家隕福生靈兼愛南北則繼好息民折衝樽俎當有人

馬令執事踐揚中外閱天下誼理甚精且義則附近懷遠之術勝殘去殺之義非執事其誰茂明之

某寒蹤衰退遠塵使節既聞德望今領頭拜益喜庇身之有地也方墮萬里外不任進伏兩階乃情依々耳

上尚書小簡

春律更調恭惟玉立朝端神祇昭相台候動止萬福某備員戎幕苟安分守乞不重念矯首門下晤對邈未有期伏乞養無害之剛成不貲之福俯慰中外之望

某逖遠台儀倏兩易歲倦々高誼鑒寐不忘卑棲冗局畧無少休念々拜起居之間迄今未果尚期大人君子曲垂包容寸毫尺楮言不能叙

恭惟某官經術文章師表一世以八座之重進讀經筵兼職翰苑自昔儒者逢時之榮何以加此然荐紳之談向以未完施設為憊况某受知素厚者其私用延跋宜如何哉即聆大拜慰此遐瞻

賀秦大資小簡冬

冬律方中祈寒彌盛恭惟提總蘭臺納忠文陞天人介相鈞候興居萬福某備數遐陬仰叨恩履未由參拜鈞堦謹勒手誠申

潤典記不備

申詞茵鼎之儀祇具右方適辰鈞履復何似伏情游情圖典神
祐傳碩哉穀之來日加繁衍一陽換節朔吹方嚴更乞惠令飾
調輔隆景祚以慰生民之望

仰惟某官英才妙蘊出類離倫名高斗南望隆人傑故能擢魏
科隆厚眷峻躋政府綱舉圖書輔成緝熙光明之美勳德無感
萃于一門考古驗今未有其比是宜延保宗社流慶無窮超越
乎揚公四世蕭氏八葉輿議攸歸非某敢佞

天光肇屆動植咸亨緬惟碩德履之茂膺純嘏某以拘職遠方

不獲走廁縉紳獻掌之列輒藉毫楮以摠傾頌之誠伏惟鈞仁
曲垂矜亮

伏自拜違恩閱三更歲籥感慈之深發于宵寤寔念雲泥勢隔
不敢頻以竿牘微禮冒玷典籤仰覲鈞慈察其非懈特賜原貸
某坎壈微蹤久荷甄播叨竊承宣之寄雖偏方遐徼夷獠錯居
自昔號為難制而遠賴朝廷威德莫不革心向化以故桑良樂
業得以安其愚拙舉家飽煖寔出鴻私感激形言曷殫愚悃
某姿品凡庸濫膺符竹勤勞綏撫已越暮年自非恩門覆護曷
免譴尤鏤骨銘心誓酬大德更祈鈞造加憐始終全庇下情依

戀不勝倦

上張徽猷小簡

春序劇暄物華滋勝太平和氣海宇翱翔恭惟志茂經綸術恢
康濟精忠許國膏澤在民神之聽之百祥來舍台候動止萬福
謹再奉手戲布起居不宣

迺辰緬惟雍容轂下步武廷中謹論贊襄宏謀啟沃均調國論
叶濟化工密勿進思優游退食天人參介福祉川增更祈上體
眷懷俯從頌詠保綏養寢慈畱中和倚需大用

竊惟綵衣侍膳日奉鈞顏溫清問安門闌多慶其一麾飽繫數
仞雲高渴奉羽儀第深景企拳、鄙素筆墨奚殫

某仰惟道學資深淵源浩博代工之業夙稟生知熙載之謨率
由自得嚴途穹峻拱侍宸旒倚注方隆春毗益厚渙恩異數輝
映無前廣與英毅飛騰天下縉紳咸慕豈特臣臣

某近被上恩再司戎律黜幽是懼仍進官聯受命拜嘉汗顏殞
越伏惟孤遯曷稱使令茲蓋某官惻憐陳舊推借迂疎特達之
私未知報塞某伏思燕南趙北黜虜殊鄰必擇賢臣付之間寄
干城方畧禦侮 內視缺然益虞訶謫徒悞獎知旦、省循
曷勝戰慄

某濫乘一障遽開三秋上賴聖美授成天威宣揚廟謨制勝堂
上折衝烽燧銷沈銜枚靜柝其如碌碌第守平之加之疾急寢
凌榮然老境嘗攄危懇輒丐投閑比捧御封驟頒綸告臣子之
分莫獲循墻然而某旅力既愆素餐尤甚支離受粟寔不遑寧
久沐眷憐諒蒙記恤

某上問台閔寶眷伏想順迎援律茂集春祺

某此中有委願効驅策

與陳侍讀小簡

燕閑豐暇台候萬福某病即林壑未由占見尚覲為國自重

起居狀比復何如益冀齋疾自謹再極文章禮樂之選下情欽
頌

執事進退異常譬之堅車大輹非有所却不能至也一宿留則
弭節緩轡于禁塗矣

凌雲之別已墮夢境出處喧寂不同書疏兩絕念之慨然有懷
種々非索言不盡

某初心舊學槁落盡矣下執事哀之以華緘妙語鼓氣健讀恍
覺神觀復還也幸甚過望扶憊占辭未謝萬一

與胡侍制小簡

孫仲益

侍

過都一望履絢禮遇益厚而以匆、就別不獲奉周旋為恨日候召歸郊見以盡餘壘

伏審罷還外制未敢為門下慶聖主圖舊示大用之權輿黃閣紫樞自此超進臣、慰喜非朋友之私也

迫于嚴詔僕被造官踈庸拙于用大已再具奏控免所冀聖主哀憐放還田里以遂魚鳥之性自內庭入輔非公而誰

與莫吏部小簡

某罪垢蒙所鄙遠首蒙車騎踵門存勞甚寵一復感著道路流離彌時方有息肩之地占謝不敏伏希諒察

新命登冠六卿除書傳聞頌以遠外不果陪附賓客下陳一贊左右之喜尚冀珍攝以需大用

據案之初訟牒紛然皆數政不決之訟而因循流弊又性所不樂盡索案牘寘一室中時、省閱之吏詐民寃如辨白黑甚有可樂者但塵容俗狀已稍見于眉睫它日復得相見定非故吾矣

與陳實學小簡

不審起居復何如前輩舊德惟公一人益冀珍番以副大夫士歸重之意

遠遠熒座一經星矣中間多故書疏不登几閣之下但增愧歎
其于忘年左顧之恩尚朝夕念之伏乞恩照

某與下執事書疏往來往小紙博封舊矣輒占辭作牋板俗下之
禮有未能去者伏幸洞照

上樓學士小簡

某孤陋無取人所弃絕迺而不問獨蒙眷獎弗替疇昔固獲登因
門墻聳聞訓鈴懷感恩德殆無以為語即日炎溽可畏恭惟密
侍黼展明神議相台候萬福竊冀葆光佇迎柄拜奉：不宣

某官以備道遠業上簡宸衷踐揚華要尚茲錦歷未副四海具
瞻公議鬱々佇膺早暮登拜八叅揆席大福天下豈特門闕叢
爾永有依歸不勝祈望之至

答侍講小簡

孟春謹時恭惟道尊德隆神天拱護台候動止萬福某仰託華
庇末緣瞻對伏冀嚴衛威重永綏斯文

某借候興居既公牘謹矣適辰元正肇啓氣候澄清不審神觀
何如敢于使人問興寢切知衛生有經萬有忻慰得台候無恙
為清朝綱領為斯文東道主此豈小事也

恭惟某官以一代文伯如唐韓柳氏上方偃武右文登用俊傑

審如執事合位要津某游東南無問貴賤皆如此言某不敢欺
潤澤蒼生每在朝夕與在陶鑄可見此心

某誦執事之文願握衣下風既有年矣疎賤僻陋無路自効今
者使人數百里一旦扣門墜之雙緘明珠大貝舉以遺匹夫某
何堪此賜但傳之友朋以為耀耳

某不腆晚生得與諸儒至于庭下不以其言論朴拙擢之首冠
山林鄙野非直宜稱也寔為鄉先生台光之所照臨某不敢自
私尚容趨伏墻仞敷露此懷

播芳大全文粹卷五十六

聖宋名賢五百家播芳大全文粹卷五十七

疊幅

侍從 卿監 正郎 負郎 朝官

與林內翰小簡

毛伯穎

歲律苜暮恭惟坦明迷述作潤色皇猷中和之氣宣夏海隅士林
攸仰神明勵相台候動止萬福謹具啓承候下執事

伏以睿聖勃興恢儒復古雲漢昭回之光下飾萬物天啟賢業
所以經緯天地黼黻百代某官以辭章軌匠為諸儒宗搗華發
藻馳騁六經百氏舉其芳蕤挹其流潤光贊人文啟誘後學方

將闡其儒效承寧康濟奠枕于京四海清議無不聳望敢冀以
時斟酌太和保練冲粹早膺典冊垂副具瞻下情無任虔頌
某岷峨陬徼一介腐生材質駑騫蹇駘華昧、曾無以振奮枯槁
決注潢汙仰望陽春巨浸之未竊覩某官絕塵希世之蹤高步
青冥為斯文軌轍不自揆量砥行立名以求自託附驥尾而致
十里敢飾其固陋不腆自通于下執事仰惟樂育英才之度有
以幸之

某棲遲岷蜀之蹟卑冗望神親親如在霄漢固未嘗得儆戒衣
珮贊其姓名通謁于大君子之庭以自附于一時賢雋縷紘之
塵垢也頃緣郡吏之職論列五事不意其文偶經某官之鑒裁
凡厥朋舊籊籊書移報皆汙辱執事曲加稱獎論荐于公朝誇于
稠人廣衆中自惟不腆固陋何修而待此韓退之有言身在貧
賤為天下所不知獨見遇于大賢乃為貴耳不圖漂末小子有
此嘉遇榮幸欣荷渺然六尺之軀無以負戴

某政和二年恭冒名第建炎中誤蒙收召造跡文館遭維揚之
變垂翅北歸賴清廟樂育之仁三恭郡符粗知奉法循理攻苦
食淡恪恭職業年華日侵舊殖荒落豈敢復希英雋之塗輒比
蒙某官一賜題品溝中斷木遂有青黃黼黻之望輒修短啓并

忝 忝

所業一編專人速獻黃閣下伏望討論潤色之暇畧賜觀采而
還以一字之褒貶庶幾駑蹇之姿尚得振纓頓轡昂首奮臆無
自疲于沃若也干冒師匠無任戰慄俟命之至

某備員眉山當民俗剽夥吏道猥釀之地征調煩興日不暇給
粗能刻肌刻骨勞心撫字浸書兩考未貽敗曠于朝廷素無葭
莩鴻毛之介先容之重而猥蒙齒記再剖符竹諒皆某官慶雲
清風灑潤而戴響將揚休明之賜有此恭冒非晚拜命即當解
絃待次林壤未由濯冠沐浴趨伏墻仞仰望階俯之光倭丹
衷豈勝瞻係

上汪內翰小簡

冬賀

休幽

冬律屆中天元肇序恭惟燕申休幽體暇幽顯贊扶台候動止萬福
某承乏于此遠窈雲麻未由參拜光儀勒手訥申詞記史
承候茵鼎之誠前楮已肅不審比辰台履復奚若緬惟德宇坦
夷智恬交養百順千祥駢集慶悃升辰初屆氣令正寒更祈惠
序精毓粹冲佇膺峻名式慰士夫之望

某官奧學離倫懿文貫道才雄王佐名擅儒宗固宜進任鈞衡
以攄經綸之遠業暫居外郡深鬱輿情當陽剛初長之辰正君
子道亨之際佇聞台躋近輔以茂著于忠勳下情祈向深切

星回昴陸化日肇書恭惟碩德對時誕膺殊祉某以物縻更役
不獲躬造賓闕輒修手續以代慶儀卑悰無任祝頌之至
某才術疎虞徒勞修郡遠荷台庇以追譴訶恨未能趨時談塵
以釋鄙吝惟山仰之心與日俱集比嘗遣介馳貢柔訥已塵玷
典書瞻跂門墻魂爽飛越

與刑侍小簡

賀新除

熊子復

春色融和物華昭立恭惟榮躋從橐密拱宸旒台候動止萬福
某猥屬奔馳猶稽瞻望將叙勤拳之意輒修狂簡之辭仰干典
曹伏幸台察

祇詞燕居已遵彝式仰幾珍食敢致申言恭惟登侍于邃嚴對
此順迎于冲粹春陽貽蕩神物護持頤加葆練之宜庸副薦紳
之望

伏審妙簡宸廷榮躋禁路優從臣之嘉頌審治古之象刑恭惟
驩慶某竦聽傳郵度修賀贊仰窺賢蘊固知道之將行退激于
哀乃至喜而不寐依歸第劇頌嘆奚殫

恭以刑部侍郎碩德鎮時文章華國彌縫省闈已糾著于顯庸
獻納從塗深果特膺于妙選當陟政塗之峻益觀賢業之亨由階
而升可拱以俟

夙仰英符逖依巨庇比總抵于遠部已贊賀緘茲竊審于新除
敢裁慶牘屬方行于原隰阻親拜于門墻搖筆怔忡伏楮惶懼
仰祈洪度俯諒微衷

某拙無取材鈍不及事謬玷光華之遣未殫毫髮之勤惟仰籍
于幘幪庶少遲于沙汰勢當圖報詎敢弭忘

台閣仙聚諒有休祥海部鄙私豈無驅委齊心敬祝綿力願宣

上李侍郎小簡

玄冥司令氣候薄寒恭惟燕處超然天人交相台候動止萬福
某承乏郡庠遠竊幪庇末由瞻望履約謹具手訥申詞記府

邇辰不審台履復何如欽想道襟冲廣德宇坦夷百靈潛衛慶
祉駢臻朔律戒嚴漸覺凝凜更祈妙毓粹和前膺密詔以慰士
大夫之望

某官學貫九流智周萬物英姿碩德拔萃離倫寔閒世之巨賢
中興之良佐故能夙持從橐屢換名藩荐著遠猷暫茲退寓遐
邦深鬱輿論佇聞榮遷禁近進陟鈞樞盡發淵謨以康福天下
縉紳士庶莫不延頸以俟

孤賤寒生仰服重望為年久矣恨以未能盡掃舍人之門惟執
鞭晞驥之心夙暮有加竭來黃舍密邇台光益聞德誼之闕深

俞覺志激教昂鄙吝潛去而况乎親炙者乎瞻仰墻仞神爽飛

越

意

與胡侍郎小簡

中秋氣候明爽伏惟論思之暇參侍清光神明輔相台侯動止
萬福某待次鄉闕方遠屏著仰冀上為宗社保攝嚴重謹具啟
起居

某申問夔寢敬具右楮不審比辰台用何似仰惟貳理司刑周
旋禁掖福履蕃衍時序尚寒更乞保御和粹以副紳綏之係

恭惟某官以忠孝結主知以文章壯國體碩德偉望浩然而歸

回翔憲部閱日滋久與調謂何倚需登庸攄發素學為蒼生忻
懽中外攸矚非特門生之私頌也

某坎壈之姿行能無取而又與閣下素昧平生伏蒙特達之知
與賜收錄寵加論薦碩駕下何以仰承眷遇自非大賢君子以
譽延晚進為心安得不遺葑菲下體耶恩等丘山未知補報毫
楮叙謝莫究萬一

典

某頃嘗求見而興謁者以謝容為阻既而南歸復造台屏又承
旌旆入學士院俱曾拜漫滅之刺某既出門下自合日伏材館
伺致謝禮竟爾不果罪涉簡慢豈容輕貸尚恃寬仁寘諸度外

客

伏楮省循戰汗之極

某踪跡踈遠加之拙宦不能追時以取世資甘心州縣盖有年矣侍從間非之朋舊昨抵行闕間辱與進者而白眼相視無意意故人意斯皆自取弃外復何怨尤豈期遭值鴻儒護短藏疾創相推借寔出望^外雖幽谷蒙暄未足比擬此心耿耿啣德無改

某得邑僻左闕期尚遠居閑處獨因得尋繹舊學恐悞知人之明何時俯伏墀^凡叨預占侍溯風引首悵惘如失

上王侍郎小簡

春事過半寒色尚力恭惟銓總之暇神所相勞台候萬福某竊祿祠館杜門索居末由趨伏屏下謹具狀參候

某蒙恩便私遂遠門墻朔風馳情豈勝犬馬之憲即日不審台用何似願言調護倚須柄除以副中外傾屬之切

某僻居如坐井諸公遷擢漫不省知比至見報狀竊承寵陞法從進^銓贊餘曹某久被眷知屬以阻遠亡緣從賀履之未贊喜門下區區但切燕雀之抃

某承乏都司蒙視遇為最厚于其得請又飲錢之以寵其行而哀懶不即寓狀叙至左右不審台慈能濶畧否不然何以逃責

某還家累月遠賴大庇幸四境亡虞時得以扁州芒屨放浪湖
山萬想滅矣獨于盛德未能忘情

上黃侍郎小簡

比者伏審光奉制書峻躋嚴要光采儒林增華法從縉紳歆仰
為之嘆頌矧叨眷舊燕賀雀躍之情當復如何竊幸加亮
仰惟侍郎曩居諫垣議論切直孰不傾望風采比自侯藩入居
禁林中外輿情方以鼎饒期于左右今茲擢真邇列寔柄用之
漸也以需進拜以安公議

某比貢起居之問伏計塵徹聽司時以未知除命尚修舊稱繼
聆寵還近班追頌不及愧汗浹膚尚恃台慈貸此情實

上楊戶部小簡

毛伯穎

初秋暑雨蒸潤恭惟明光扈從日侍威顏朝夕論思仁言博利
逮于海宇神理聽勞台候勤止萬福謹具啟承記宣

比睹報狀共審某官釋天府浩穰總地官調制寵名登進僉論
允諧幸甚倅甚伏以時方艱難兵所供億修六府而和三事出
千里而具萬方倘非傑才孰稱此舉願因長材之効遂躋論道
之榮某素荷知憐道路賈阻不敢具牋啟申賀不勝彈冠附驥
之誠

某自四月以來累致不腆竿牘相繼呈徹文几哀悰落莫墊蹟
簿領無可言者素特知愛惟日夜祠禱願執事早輔大政登進
羣材則雞壘豕苓終在藥籠之末耳

與程侍講小簡

馮當可

台座至天彭已數日不審為况何如干將莫邪之器有百練之
精故其利無前閣下方以文章事業受知君相而忽逢短毀此
正古人之所常然者造物未必不以此撻拂成就而大振耀之
也天下縉紳士大夫就^孰不翹首傾心以望側席之招如其倘未
死滅尚冀得朋友之力湔洗罪垢其所覲^覲願百倍于傳輩也窮

通之際古人所難處漢獨一賈誼聞道一出長沙悲憂無聊夫
內有九鼎之重在外者不啻一羽伏惟深入聖賢閭奧恬然于
中人莫得窺其涯際異日富貴鼎來徐起而受如所固有區、
有望子台座也

久去誨色近一見獲侍教者三月嘻笑飲食無非訓迪溉已
自深矣以遂得見隱居賦什粲然盈編掃去浮雲淡月之餘
習而直以大雅中正為音其諷刺規美于修身行已補于世教
者甚多所謂太羹玄酒有典有則薄滋味不必他求矣今世人
以佛家利人接物為功然室寂無相非定愚^慧所不能了如新篇

道坦然孩提之童亦以開悟倘遂交口教授其為防備閑範
力不勞而功有過之前日卒不能具錄敢望特為寄惠一笈
庶以為座銘多荷

與都丞小簡

睽關兩更歲籥屆：馳情不少忌也志暑氣正炎恭惟神相賢業
台侯萬福某衰晚諸念泊然掃迹窮荒粗安無足勤執事之念
南望末由叩謁謹寓記起居

去秋上狀之後復以傳播洵：挈家島嶼經時不聞人足音雖
念公甚勤無從嗣問為愧可量近歸故里方欲少定求便具記
伴來致所惠教竟為左右所先伏讀慚感無以為喻仍審還自
仙里諸况甚休尤慰區：都司淹留亦既踰時諒朝夕必還持
橐之除成德相見不疎否想亦非久于棘寺者相距不遠未有
承款之幸臨紙益深向仰自餘保練亟膺寵除以副中外之望
香茶辱貺精好皆今歲所未有物意兩重拜賜感悚暑月第塊
未有以報耳

與張大資小簡

孫仲益

某淪弃泥塗已絕意雲霓不謂野次有接待之款執事存錄故
交不以位貌為間置之客右至今踧踖不遑也

某辭去便趨荆谿路與儔朋館于橫山久乃移舟入善權故人
一笑之適凡十日而後別也伏念大資倦飛之餘行復冲天矣
恐未得專此閑也

伏蒙存省馳賜翰墨共承嘉惠三復感嘆某方圖掃門之役猶
懼以疎慢督過豈敢失言朝夕負荆門下謝不敏

重陽令節追歡筋力非復故時伏蒙遣馳分送名酒洗盞開嘗
為之首一昂也糟薑亦已拜賜勿勿莫喻欣感萬懷

上王給事小簡

某熟于先達之教猷為日滋久雲霓勢力邈早_華願見此心溯依

無以借喻何當瞻依杖履一洗牢吝引胆台屏神徃形留

仰惟某官以懿文奧學亟踐詞科揚歷顯途咫尺黃閣尚稽大
拜公論謂何竊揆制麻可立以俟霈然霖雨一蘇萬物門生故
吏端有望于沾溉也聞之輿誦非敢為佞

某仕無他長名聞不自于世夫勢孤援寡正虞罪斥豈圖過聽
曲賜薦揚雖至公特達不閒疎外其如感悴胡以為辭面謝無
期伏紙但深注仰

上湯_司諫小簡

露凝曉爽風滌午煩恭惟天啟忠嘉神依諒直台候擁福時曼

揚
棋

某猥縻守絀阻造賓閱猥修狂叟之辭虔奉燕申之問

祇叙寒燠厥有定彝敬候夙霄是為申款伏想揖旻空之爽氣
揚諫路之直教神默護持人傾頌禱宜擁多棋之茂更膺新渥
之華

伏自拜違星鳳之宇屢閱歲時審觀雲龍之庭荐馳書問尚遲
趨于墻仞第遙想于堦符教則成文言豈盡意

恭以司諫以雅健之文淹貫之學而授異科以勁正之德傑特
之才而結殊眷自旋歸于井絡遂契合于宸居記事左垣伐言
西掖果踐伏蒲之列已階學橐之除將荐拜于綸音遂預聞于

機政用彰祖烈允穆師虞

伏審光膺命冊易踐諫垣廟筭夙成尚戒幾微之失廷爭遲立
是資獻納之良除日初傳興情相慶綴簪紳之武莫致賀辭剽
簡牘之文第將誠意

雲陰高閎星華大眷茂對清涼之序荐迎穰簡之祥

上句龍舍人小簡

寒氣日炎伏惟揮翰紫微默膺神相台侯動止萬福某屬居賤
職參觀末辰謹具啟申詞典籤

某候問興寢謹具副封不審比辰台用何似仰惟日侍清光密

陪國論天氣順迎戩穀茲茂冬序向深益御冲粹以需柄用卑情無和

恭惟舍人侍講資望兼隆名寔素著天下以為宜登法從久矣乃者伏蒙越由杜史進直西垣優恩所宜群聽皆聳諒惟潤色皇猷丹青元化其功烈豈淺：哉惟乞早步台極均福蒼生俾遲暮者獲觀盛際不勝至願

拜遠台光浸歷歲時雲泥勢異既無緣可親罄欵而起居之間亦缺然不嗣罪涉簡慢夫復何言每念疇昔獲親教誨復不能自絕輒貢尺書以代負荆之請倘蒙曠度真諸禮外尤為厚幸

伏承某官以燕許大手筆為明主所知豈勝欣沃之情而川陸修阻思欲擁篲門墻有不可得若瞻景仰第深結約

與劉侍郎小簡

孫仲益

荐領手誨喜聞動止屬相去國謂公便還朝廷而曲突徒薪之功每在焦頭爛額之後何也然公豈久外者當拱而俟之耳公辭郡甚善翼遂治渤海奏言陛下無令丞相御史拘臣以文法宣帝許之今日從臣守凋郡必度外有所為而待歲月方可異尺寸之功也若一人守之數十人伺之搖手舉足便蹶葵為崇固不若明哲保身之愈也

嗾

修

與朱侍郎小簡

恭惟西清荷橐朝夕論思忠言美利陰被海宇神祇鑒勞台候
動止萬福謹具手啟承起居

伏以休運中興烜赫盛德而執事以道學辭章世其家散風華
舉望冠映朝著海內清議日竚延登燮理之命更冀以時保練
斟酌冲和惠綏勞寵

備員士鄉浸書兩考無一最一狀可稱塞猥蒙朝廷記祿再昇
符竹吹噓借重秋毫已上盡出友念已于傳述中及使人再致
竿牘披露恐未徹省覽敢申言之

倘被臨卽命即當解紱休偃林藪以待次也然鄙怯固陋心地
蕪穢舊殖都落無緣振衣趨隅一奉名理之誨臨紙豈勝瞻燕

與舍人小簡

韓子蒼

某伏違歲久末路沅落挈一：過日故于親知書問例廢不備猶
億初到臨川草堂僧回曾持一幅紙道鄙意想登几案也自此
多病轉益藏縮了不見有人往泉南省者既不嗣音惟勤瞻仰忽
辱手記豈獨把玩欣慰且將陪杖履于七閩之山臨紙喜笑謹
具報萬分

某寓撫今四年矣地當要衝無事即多過客每日劫一：應接不

鞋預諭

辦有事即軍馬上下不絕喘；于此未著者一夕得安眠也近來頗欲小葺茆茨與世隔閼庶幾餘年遠離憂怖然畢竟墮渺茫又欲去之他邦老病廢棄與世不要正爾躊躇豈知有以尺書數千里外辱見招乎發書驚歎此古大丈夫事尋常聞之簡策不謂親見之末俗中也窮窘漸須打疊加以熱甚只候秋風緊鞞草鞋已託鵬舉使君營一居處得寬潔高爽乃稱遠客耳雖未參晤預想教顏已深欣喜

蒙論所歷道路具悉私心久欲遊閩常日問人曾中已自有一卷行程敢不遵依竊知草審得妙喜師開山不喜妙喜之得此菴喜此菴之得妙喜也然此道人孤高絕俗與世寡合此正是其所長以故惡嫉之者衆惟曠懷偉度乃能期之物外若得安居使老園悟之風焜耀焜泉南是叢林盛事也

與錢右司小簡

中春尚寒恭惟台候動止萬福某籍遠苾幸四郊帖然得安田里惟是隔閼未有承教之緣遡風瞻悵不勝拳；某都司方幸親依蒙恩便私遂有相遠之歎雖時見令弟得問起居狀而老懶竿牘竟為左右所先開讀感悚亡以為喻別後為况何如高才碩學時論屬望久矣諒惟遷擢可拱以俟雅幾

調護興居以副輿望

某居鄉兀然無他念唯族人與親戚放舊時設酒相娛樂聞從道人釋子為清游閑放有餘獨與左右參辰此其恨也

與張侍郎小簡

張安國

季秋之月恭惟天相耆德台候動止萬福某謹上問侍郎自布衣以道德文章師表天下又卓然以公輔之望歸先生者餘三十年矣大而不容身屢挫而道益伸今雒里閭燕居朝野善頌特公以為主盟敢乞精護寢與垂副斬鄉

其無所知識皎然此心願以身

託門下庶幾不為小人之歸惟

古有弟子所以承師之義未嘗以書傳也今一再拜教溢于楹翰願皆非某所宜得于先生者盖未嘗承顏接辭則宜先生之不知某也先生倘有收拾之意總今以往請受命

上葉侍御小簡

某屬者輒以書牘申布記室伏蒙台慈寵賜答翰撫存深厚仰佩眷憐豈勝欣荷某茲者蒙恩起之祠祿畀以符竹伏念某一介冗散憂患頻仍忠慮凋喪齒髮耗落豈宜叨冒郡寄惟侍御日矜憐獎與成就之賜感激恐懼交集于中謹當鞭策疲駕夙夜黽勉上副朝廷惠養元、輯和封疆之意伏惟矜察

伏審光膺明詔進長霜臺風采益尊紀綱日振惟侍御稟剛方
之操而行正大之言當天子門象正之門而膺雄劇之任君臣
合契于載一時公道顯行國勢增重天下幸甚某出入門墻久
蒙知過欣聞盛事為天下賀獨以私門多故夏中奔走中暘得
疾厄殆以是修敬後時不敏之愆無以自文尚恃大雅遠度有
以寬貸某下情併深皇恐

上中丞小簡

春氣漸暄伏惟肅正臺綱神人交輔台侯動止萬福某遠託雲
庇未諧參侍謹具手啟仰承夔食寢

候問與居已布右幅不審比辰台用何似伏乞保御粹和節調
神觀以綏多祉下情至扣

乃者竊披邸報伏承光被綸音峻遷臺長朝家得賢公議胥協
恭惟歡慶某官守拘寧無由俯伏台祀稱慶引企恩闕弟深頌
詠某仰惟憲臺寔百僚紀綱地雄峻莫擬自非剛明中正不畏
強禦能副此眷遇恭想垂紳正笏勁氣危言大愜聖心竚期進
東鈞軸用究格天之業

歲歲前人還伏蒙台誨罷答祇讀再四感服謙光無以為喻願敝
帚遺簪人所弗取乃辱記憐未忍終弃惟當錢諸肺腑永矢弗

諼屈：叙謝言不能究

乃者天意悔禍遠人草心前日河南故地悉歸板圖恩沛一施四海洒然相慶以謂我宋中興恢復大業在此時矣恭惟中丞雍容進對所以仰裨國論當載諸簡冊焜耀今古上方虛佇至言願益罄忠嘉以永終譽

上辛侍御小簡

春半尚寒恭惟怠候動止萬福某遠籍苾賴幸四郊帖然得以偷安田里惟是隔闕未有承顏接齒之幸溯風瞻悵不勝依某備員省闈方幸親炙蒙恩便私自此遂遠門牆南望瞻依但

切犬馬之戀即日不審台候何似恭惟神右忠勤益介景福眷候深矣寒暄殊未節敢斬妙香和俛副主上眷依亟躋中興天下幸甚

某居鄉數月時、聞佛出世獨年兄尚徘徊鳥府縉紳之論甚鬱也竊以盛德之士主上虛已擢之言路仰惟聖意豈徒然哉盖將自此尊用之也中外鳴、日夕拱竢

某乍歸一番應接之擾故于記室之問為不敏今者寓記又特未契不敢作圓緘外啟敢幸恕察

上張侍郎小簡

毛伯穎

歲律首盡涸陰沍寒恭惟明光近密崇論竝議朝夕獻納激昂
萬乘休被四海神祇聽勞台候起居萬福謹具手啟承下執事
恭以某官道學辭章才猷智畧隱然為縉紳領袖更踐履歷所
至治辨太阿龍泉游刃恢恢釐席眷思日奉清閑之燕忠嘉啓
沃便當參翊政路敢冀以道保練斟酌粹和順受多祉以慰僉
論

伏自石渠拜遠雖嘗數致問牘亦蒙裁報辭止渥密盱衡推轂
之意寒素榮幸但恨縻于麾符日恪俗吏之繩墨無緣彈振冠
裾以奉使令于前稍希螟蠹之光凝儻墻仞乃情豈勝瞻結

恭惟某官祇膺溫詔還侍禁途啟華章章聳動朝野某辱在盼
睐之末獨深賀履私情輒具短啓少摠頌詠德美之萬一干冒
省覽伏深聳仄

某備員眉山庸：碌：無一最一狀可紀蒙朝廷收齒再昇臨
仰符竹人微地寒素無容援何以得此諒皆某官吹噓借重之
有素致此叨冒乃情銜荷筆語難既

以蒙敦獎樂育服大匠之規矩然念棲遲郡吏日困簿領朱墨
書生事無以自見每懷羞慙恐負疇昔知遇輒繕錄近文一編
專人馳獻以幸指暇投類之賜

上嚴司業小簡

某申詞菲誠恪冥公式即此秋深意冷伏悔誨育多暇天人參
合台候起居萬福某承乏支郡遠竊蒙庇尚阻趨覲謹勒手續
廣玷記史

邇辰素商浸晚天高氣清恭審台履奚似欽惟設教上庠英髦
誠服休祥之至默有相扶更祈妙護鼎茵別膺顯拜式慰傾禱
之勤

某官傑才拔萃奧學離倫科名德望皆為當世第一固宜亟登
翰苑平步岩廊以茂摠于素蘊暫總儒宮殊鬱公議

竊惟朝廷偃革修文崇用儒雅其于兩學師長之任遴簡尤精
雖以全才碩德論之不過假途然宸衷眷注之隆亦可見矣佇
聞揭甌晉擢峻除樞衡以均福于寰海某素蒙知照亢切願言
頃年備員仙府參畫帥幕幸嘗瞻際風度慰懌無窮睽邈英規
五更歲籥飄蓬還官久缺修貢桑函惟傾跂門墻夙宵罔替區
區忤憲伏楮彌深

迂拙之姿分符遐徼仰叨河潤之深冕勉綏懷已書一考向慮
疎愚有所未逮更賴雲麻廣敷俾道謹訶不勝至幸仰恃怠念
敢布腹心

被

柔

上陳司業小簡

素商告晚萬寶順成恭惟立道優閑神靈交贊台侯燕興萬福
某遠竊雲陰末由瞻拜墻仞謹具手訥申塵典記

邇辰不審台履復何如緬維設科樂育猷訓漸漬戩穀之繁顯
幽成相金風蕭瑟氣序向寒敢乞上體眷隆妙毓神觀別膺晉
拜下慰拳之頌

某官岳鎮儲靈奎躔鍾粹應半千之休運擢冠巍科蓬室道山
備彰該博虎闈槐市暫屈師宗茂寔英毅騰播內外某雖不才
得與芹泮青衿共蒙教寔不勝抃蹈之至

竊惟中興在運主上登崇俊傑以熙帝載急賢之心惟恐不及
矧如鴻儒碩量超邁時輩固當待以不次之任雖作成多士有
賴高明而士論輿評殊未厭也佇聞登進槐鼎康濟天下以究
淵衷卑悃祈向尤倍夷等

忻服重望為年久矣踪跡萍梗莫獲進瞻英矩徒勤山仰乃者
誤被宸恩俾尸校舍遂獲託質宗範尤增欽詠雖祇服官箴未
由親炙熒席而向風慕德知所取法寔不異于面承啓迪也瞻
跂崇墉恨無羽翮

某性質庸鈍學術荒疎塵竊末第奔馳薄官俗吏徒勞漸忘故

業今幸隸職庠序得以溫存故習以率勵于常布寔出巨庇更望台光俯矚俾得効于微能以攀附于鱗翼之末不勝萬幸某沈冗下僚未獲趨拜履綦豈宜不量薄分輕奉竿牘以况聽志熒蓋恃至仁寬裕不弃屢微兼屣：悃幅舍此無以自見是以忌其狂斐敢爾冒瀆下情不勝戰慄

某申覆台閱寶眷恭惟中表咸擁殊休

某上覆都梁恐有驅策幸賜台旨當期盡瘁以稱器使

與錢直閣小簡

已秋暑氣猶酷恭惟即日台候動止萬福比有自邑中來者訪

動靜聞大旆喜達里門咫尺請見可勝欣慰然畏暑須稍涼也謹勒恭候

前此上狀正愧率畧回人蒙賜報甚罷三復兼眷無以為喻比辰不審台用何如游宦之久奉還清之直懷郡紱以歸見親戚故舊諒深慰愜尚此阻闊遡風馳詠不已

與監學小簡

遠遶風度數年矣乃心景仰與日俱深春寒待次履裕起居康福某厄祿祠宮諸况粗適未卜瞻晤願言將重以候殊渥向在濠梁忽得脾疾遂乞祠東歸令所苦已幸安愈平居多不

出故不知車騎東歸遂稽上狀以候動止使至忽辱真翰欽佩
眷契閱復感藏何時展奉以布區：句風增慕

伏審榮授北都監學豈勝欣抃才者得此不失故步亦足以養
高也第恐朝廷別有除擢入資國論以福天下不佞

與判部小簡

暑雨蒸潤恭惟握蘭華省地任清要風華譽望藹然縉紳神祇
勵相台候萬福某備員凋郡哀拙勉強于軍興多事之時絕長
補短粗逃罪悔尚賒展晤更冀保練冲粹即膺持索之寵

睽別多年每以臭味之感猥蒙簡記東南人便數領翰墨推禁
送抱白頭如新幸甚頓見邸目知南宮舍人之除緬想以道學
緒餘擣華發藻百音皆奏隱然與三代同風掖垣館殿指期遷
擢區：夙素不勝彈冠之喜

郡卒回奉被春初所賜教染兼惠貺團茶拜受慚感銘佩無忘
帥座素昧平生自到成都頗蒙青顧近以陞陟論薦乞火謹重
知有所自幸甚因通家訊為道區：奮激之意千歲裁照

播芳大全文粹卷五十七

國家圖書館, NATIONAL CENTRAL LIBRARY, TAIWAN, R.O.C.

聖宋名賢五百家播芳大全文粹卷五十八

疊幅

宮祠

上丞相宮使小簡

某請問起居狀大畧如右即日風露益冷恭惟琳館宴閑神右
勲德鈞候萬福某孤踪尚茲匏繫未能引去從杖履為超世絕
俗之游瞻邈高風下情不勝依戀之切謹勒叅候

一介之賤夤緣職事方幸久侍門墻遽遠芘誨南望惟劇犬馬
之愆即日不審鈞用何似冬律肇寒願言對時致和宣滯茂經

壽祉副天下拳之心

功以功成名遂天之道近時王公大人非苟知之亦允蹈之者
惟相公耳某與士大夫既誦詠高標遠躅有不可及之嘆念
方持顛扶危有能任重如相公者又為國家惜其去也

前日方相公抗章謝客之際日至舟次既不容請間尚庶幾追
路一望台光而鈞旨亟行風檣頃刻已邈然矣徘徊江干瞻悵
結憲有兒女之感即日跋履伏計已遂寧居盛德所至固自有
神明扶持若退之所謂務為崇深輒敢為左右之獻伏惟留意
幸甚

未

某至愚極陋無取于世故冬相公復以舊物收錄數月之間樞
屬宰掾皆平生夢想不敢到者相繼叨冒盡出大鈞之播未知
稱塞而相公有請去矣引領恩第祇益慙慕某惇然于此欲請
則來敢欲留則亡依去留幾如觸藩羊矣相公尚軫念否耶

上樞密宮使小簡

暮春之月景氣清淑恭惟勲大德隆高蹈物表百神森衛台候
動止萬福某謹具竿牘仰候記史

申問起居已其右席暑律寢近敢乞上為宗社彌嗇粹和冲盛
靈氣示服籠休區：頌禱寔與有識同之

奔走範圍之內頗有歲思欲整冠抗容望天人之儀表叢宵杳
邈厥路無由惟知誦當世之偉文師厚俗之懿行踴躍鈞播期
不負于化成之化至若神馳夢想拳于造化之門則又抱積
結而已尚稽瞻拜矯首凝睇惟深景慕之懷

恭以某官以有道事聖主以厚德浸黎元自初登朝已傑然有
公輔之望睿眷愈隆時論允屬年除歲遷以登近弼人咸謂宜
從容廊廟致吾君于克舜之上使斯民鼓腹擊壤以樂太平者
非公其誰倚正鼎軸之拜為天下賀

仰惟大雅君子明哲自保旂常竹帛既了能事復乃辭榮高蹈
毓和順志于冲澹之鄉川吟野詠以樂天真當有安期赤松輩
相與談笑于塵埃外也弟恐冕旒注想復為蒼生起太傅于東
山耳後天下之樂而樂尚須佇此以俟他日也謂言及此寔用
慙悻

其一介逃賤久困久路惟念家世以儒為業不敢失其故習比
者誤忝大常之奏猥玷銓籍寔望不及此方茲從官之初乃獲
密賴洪河之潤幸可言邪竊念某荒唐之學固自無取矧于吏
事尤切范然教載之職大儒所任况家兄昔為尚書郎又出榜
下倘不以某之不肖立之庭而薰沐之俾得揚眉吐氣激昂青

雲則平生所志庶幾少伸于今日倘不屑教誨是亦教誨之而已某敢不謹承下風

近者交代報以及瓜促使首塗行即趨伏軒墀之下欣非來集預不勝情謹修啓牘以姓名自通于鈞寬併乞恕其僭率

鈞閱寶眷恭被鼎束之祉

訟路恐有委令拱聽要束

上樞密宮使小簡

夏序清和恭惟耆英舊德燕頤琳館言論風旨海宇瞻頌神明鑒勞鈞候勤止萬福某邈在匪微無由款墻伋謹具承候下執

事某勉強于此且一年半矣每有仗介輒致書牘湖山渺邈沈

浮未知但增瞻鄉耳目近人還奉被去年五月二十一日誨墨

置之坐隅一日三復仰佩盛德不遺亡簪履之義豈勝感激也

伏以某官道德文學冠映接海內勲閥巍然朝野注望然深執謙

冲久就閒曠清議嗟嘆豈某窮薄褻頓攀鱗附翼自有時也更

異以時保練惠緩冲氣即膺典冊帝穆夫緯重副頌願

上大觀文宮使小簡

王練之

問訊起居狀粗如常禮已春寒色尚凜即日恭惟琳館邃清神

護賢業鈞候萬福某頽齡暮眷景分宜退縮尚叨祠館之祿盡出

杖

稽考大全文粹

卷五十一

四

鴻造惟是藐然未有陪侍鳩枚之緣引領高風 有弋人何慕
之歎謹勒恭候

故冬寫高咫尺之書必浼聞聽繼以得請而歸跼伏田野亡從訪

便貢記室問區：之心祇益景慕仰祈妙理生經茂綏福履以

篤鈎閱之慶以副海宇之望

竊以艱危以來主上論相數人其間藉英雄之姿奮經濟之業

整頓乾坤再造王室有如相公者其誰哉今者均逸上至士大

夫下至軍民莫不喁喁：時衮衣之歸益著士儒之效願戒舍人

束裝以待輿議如此敢私布之

宜

恭聞相公殫節天台居處飲食雖南北異宜仰惟相公簡淡之

素隨所寓而安之如在維揚時也門墻下容惟日聽鋒車之台

耳

某一生艱蹇晚節末路獨相公相遇為至厚此恩此義某蓋銘

之心矣自相公去國既失所依而孤迹之危如燕巢幕亟于廟

堂雖幸全璧而歸退念孤相公頻年獎拔成就之意此其負：

為亡窮也然亦安知造物者不為異時之地耳

上樞密宮使小簡

毛伯穎

春輝抄容恭惟燕街琳宮神和道勝老成魁壘之舊海內宗師

神所鑒勞鈞候動止萬福謹具啟承候下執事

某官以道德文章為世儒宗遭時多艱請纓徇國威謀智畧折衝萬福荐膺眷注入秉樞机正笏垂紳深謀遠慮天下誦嘆更莫以時保練冲粹再膺贊列光輔王室以究格天之業

伏以國步未夷士氣緒縮忍玩歲愒日偷合苟容某官以英偉傑特將之姿浩然直養之氣言論風旨頻伸頽眄有識聳動皇天眷佑宗社休運勃興無競維人聽望攸矚豈宜久留閔勞均逸之地行聞備物典冊袞繡來歸當軸處中以厭清議區區深切瞻嚮

某一介孱瑣人微位下無所短長于執事初乏葭莩鴻毛之重以向風慕義切于衷素頃者輒以不腆之記率爾自通于執記寔恃某官蘊氣生風傑出流俗相士以天機而遺其皮毛故敢進其區：果蒙不賜鄙夷垂報教翰所以獎鑒熟飾之至厚敢不鞠躬佩服動勤：勉勵以符一頤之重幸甚

某莫儔榜塵忝上舍及第沈淪州縣垂三十年矣中間備員楊州文館三忝郡寄而才力駑知觸事迂暗又不能小廉曲謹恣睢祇以投合流俗之好惡棲遲凋郡動遭讒謗頻致怨憎頽影跼躄喘：度日今冬滿更方駕柴車歸屏田畝惟望某官登

庸百揆敷贊皇猷大鈞所播品彙皆遂則此生寸進終累陶冶耳

其承先人緒業摩研編削苦心勞意于翰墨畦迕初先所造某以儒林宗匠為世模楷筆端膚寸流潤末學而某斐然以其憔悴管蒯之則進于眎聽乃蒙褒稱獎予形于書牘竊用矜奮不啻見遇于大賢也韓文公有言身在貧賤不為天下所知獨見遇于大賢乃可貴耳不圖小子有此幸會謹以短啓少叙欣戴之素伏祈裁察

與待制宮使小簡

夏序清和恭惟分秩祠庭棲冲業簡措紳清言寓傾碩屬神祇相勞台候動止萬福末由待杖履更冀以道珍練即膺寵數光裕吾道

自到眉陽忽已踰歲雖累致問牘然吳蜀萬里江湖攸細浮沉未可知也某迂踈不能隨順流俗日困風渡波口語無復佳况拱俟更滿歸偃林壑爾某官年兄尚淹閒曠輿論未愜豈復踪蹇步砥礪附託亦自有時耶臨紙重增悵惘

與侍郎宮使小簡

仲夏毒熱伏惟燕申豐暇神明薦嘉鈞候萬福某竊食行朝碌

碌無補末緣俯伏賓閣記上狀記室某僭易惶恐

之間起居已具右幅溽蒸在候調攝為宜敢乞為道自重願神
養和以慰天下之所瞻仰

蹭蹬哀踪素荷推挽戴恩愆德之誠頃刻不忘拜別崇墉忽已

累歲何緣在侍函文少聆書紳之訓區區師慕飢渴莫喻

竊惟碩儒元老德望藹然朝之羽儀上之體貌名遂身退士夫
榮之方茲匏繫阻陪巾履企仰高風徒馳精爽

上觀文宮使小簡

問訊起居狀大畧如右即日秋暑恭惟琳館邃清天人交相鈞

候萬福某蒙恩備員都司末由趨府引領南向不勝依慕之至
謹勒參候

某昨倅維揚偶徒銜道出此邦夤緣得以望履繼此紛擾遂遠
門墻即日不審鈞候何似暑氣未艾仰冀為廟社生靈保合太
和前拜冊命以慰普天之望

某向自浙東航海以歸繼請祠館竄伏湖山殆與世隔無從訪
便寓狀故冬竭來行在已聞相公被命將離長沙正恐道途差
池不敢輒具竿牘占叙區區之私某久荷眷知其心未嘗一日
敢忘恩意伏惟鈞慈賜察幸甚

窃惟相公以承天事業為時英輔粵從長沙均逸而歸此中外所未喻也仰惟聖意趣鋒車之召濟中興之業行有詔矣獨是鄉曲之私日以歧望

某遲暮不才去冬復塵郎省一毫無補坐待汰斥而誤恩踵至皆自相公平生知獎之賜匏繫于此無從伸一言之謝仰懷恩施第劇感激

行在或有使令願効犬馬之力倘驅策之尤荷不鄙之德

宣撫 宣諭 總管 總領 茶馬 都督

上胡宣撫小簡

恭惟高牙大纛作屏殿邦夙夜忠勤神所勵相欽候動止萬福謹具啓承問下執

伏以秦隴繹駸岷梁疲弊主上側席憂顧肆命重臣任保釐分陝之寄恭惟某官以道德冠映簪紳疇咨僉同誕膺興冊天下幸甚一介孱陋辱在下風豈勝欣詠

某官德望之重峻極于天文律之高黼黻河漢固當延登衮繡以正鼎足承君之任主上方紹隆聖統恢復土疆惟是四州川最爾居吳會上流之勢藩垣倚注宜用一時賢業煩橐鞬鞭弭撫綏黎庶命書始下和氣穆然四川百城知所順勵敢冀保練冲

氣垂副具瞻之望

川陝僻陋去輦轂下湖山繚絡路踰數千里某官建旄分閭轅門菱舍冒涉阻不無少勞神用仰惟股肱之寄展盡忠力纓冠叱馭館穀次舍之間神明休勞百祿具宜某蓬藿賤士當獲布武堂下以備掃除之役下情無任竦企

伏以蜀地陬徼風穀氣習之陋無足^比數然以朝廷德澤涵養之舊庠序衣冠伏畝陪隸粗知一心戮力出租賦奉期約今日某官以柱石大臣受任一方布宣德意唯是元、蚩、罔不委心展體以聽教條之下奔走承序敢盡布之伏惟幸察

某曩者備員渠州磨鈇策鈍粗免瘵疇繼蒙朝廷改除眉州尋而叅政席公俾暫攝幕屬悠、碌、無一最一善術仰羞愧方求罷居田舍待次茲者何幸當預門闌卒吏瞻拜光儀不勝夙夜砥礪以幸一頌

與宣撫小簡

恭惟惟幄豐暇神人具宜鈞候動止萬福某仰託節制之尊未敢司敗無由侍見伏冀為國以道自重

某官道德文章九牧之人所共尊仰輕裘緩帶暫寬西顧衮衣繡裳即佇東歸益祈與時御宜調順鼎食用副天下之望

伏奉鈞翰念其留落疾病之餘恩意甚寵跪坐以讀殆欲殞涕
區：依歸傾向之心尚幸矜照

實眷幾時可至府第下邑有驅役願受令

與吳宣撫小簡

秋序澄穆恭惟玉帳靖嚴威加塞外忠謀勇畧為國長城神明
寵綏鈞候動止萬福具啓承候起居

伏以四川百城生靈億萬自中原震擾封豕長蛇日夕窺覘
躬極力為之屏翰遂使元：蚩：仰事俯畜得以安其田里保
生不業大功巨德冠映今古區：孱渺濯冠潔佩敢不惕在下

風

冲

某官以精忠勁氣為國虎臣親董六師鷹揚電逝遂使兇醜
慄追奔遠塞保固疆場威望赫然伏冀為邦家倚注之重念黎
元仰戴之誠保練中氣惠綏寵祿下情瞻誦之至

某竊服緒紳門每聞某官以豐功偉節傑出一代而能降忠屈
體賓禮寒士常願執鞭擁篲于士卒戎行之末比者何幸獲修
容于轅門之下躡履于油幕之前重蒙謙光盛禮 侍隆渥某
委瑣齷齪曷能堪任但知銘佩至意激昂衰氣庶幾稱寒萬分
之一

某自遠錦城忽輸月偶以迎迓宣諭幕府事叢鞠躬奔命
不暇給久不藻飾固陋諄復翰墨以致謝下執事竊恃某官雄
心大度不問微賤未始譴斥敢率爾布之以幸悉察

上宣諭小簡

恭惟宣布多暇神明協相台候動止萬福某遠託恩庇末緣參
覲伏覲為國以道自重

不審比辰寢饋何如高名盛德九牧所知暫去禁庭遠持華節
恩言大布輿論交歡居報有期大用可必益冀珍賚以副中外
之望

蜀非用武之國如孔明之賢其臨中原屢以糧餉不繼而返今
宿重兵餘十年殺勢隱然震于強敵將帥之功固高而民力屈
矣某官以文章議論受上異眷臨遣之旨寔代予行國朝以來
持節將命如富彥國之使河北文寬夫之使河東韓稚圭之使
陝西未有若此之重者當有以大鎮撫之某將與州縣之吏重
拜以賀區、此心伏幸矜察

某為漢嘉踰年愛民戢吏艱勤儉約不敢具言易資中到官未
浹日適雨暘以時麥田甚美米斗至賤獄市不擾內外無盜竊
之虞民情甚安期有以上寬台抱優恤萬一故併論之

與總管小簡

朔律屆中寒凝方盛恭惟總戎多暇益載荐修台候興居萬福
某備員偏人遠切庇輝尚稽瞻對敢祈精毓天和別膺台擢謹
具啟承候

謹時裁詞已列右番即此亞歲屆期陽施陰化伏惟英豪所履

茂集殊休某拘縻郡事趁慶靡違輒假緘封以見誠悃其為傾

禱毫楮難殫

恭惟某官智畧邁倫雄才冠世暫總戎于屯戍克精練于師徒
一路人民盡蒙綏鎮既威名之茂著宜眷倚之彌隆佇聞進位

元戎策勲帝室以副輿人之望

與總領小簡

程子山

氣候漸熱仰惟使節在塗雖有神明然妙護茵鼎以對顯寵則
又人士蘄向之誠所切拳焉敢以告于侍史云

仰惟台座英規義概冠冕多士固宜雍容禁問翊贊昌圖而乃
斜飛遠引握節西來孰不慨然六月不可不息七月當來及
今見之矣士為貴用政恐不免如台座非耶

伏審陞華郎省總計邦財榮寵鼎來德威郵布甚盛甚休惟台
座清修博習聰明疏通凡時之縱急民之休戚郡邑之虛寔其

無不察矣而以能為之材劇可為之勢如破竹如決水如轉圜
石于千仞之山桑陰不移環蜀數千里惠利霑洽以之更生豈
待祠而祝哉少儲茂績歸踐禁塗肅切拱以俟

負罪脫死歸佐御郡已閱一歲且半矣既不敢薄其官而漫畧
不省亦不敢出其位而妄求乎竒唯是潔已救過庶少贖于方
來乃今台座將四路之使為二天之德庇寔窮途之大幸也然
亦安敢恃而不恐以累知舊耶惟高明裁察

自經憂患焚筆硯久矣短牋姑以見其悃誠非敢言文也尚
不鄙畧結匠目幸甚

似聞舟御所流之臺府某一官有守無由亟從衣冠之末少修
贊慶之敬或者臨按少城得遂所願不勝大幸

上陳茶馬小簡

晁子西

麥秋至恭惟六輿行原隰有光神明並相台候動止萬福某敬
遣一介以候前驅

邇日不審台用何如盛德所臨百靈有當呵御不祥伏想當此
炎夏山川之氣皆效清涼更乞盡消息之方不勝至請

天下之裕俗委靡不振久矣士大夫習于寬簡非君子剛大之氣
其孰能起之某得諸縉紳之論以為今可望以此者舍節下其

誰哉蜀郡聞風已皆有立志某獨恨所恨者狹耳何時曠然盡
寢天下之俗耶拭目以俟

擁牧之政蓋可以強兵而富國主上舉以屬之節下其意深矣
方此講好修睦正當閑暇之時便茶戶富寔取其饒以助給軍
食出徼外之駿以佐卒乘為之數年恢復之具成矣節下當擅
此功天下幸甚某流落遠方以貧所驅而冒處劇郡欲罷不能
重以積弊之後府庫空虛賦入不及所出之半視事踰月茫然
不知所圖惟當夙夜匪懈而已更望高明府以誨告之某之頌
也

上都督小簡

仲春寢和恭惟坐鎮江陲運籌帷幄百福拱衛鈞候起居萬福
謹具公函仰塵記史

某謹時之禮具裁右楮不審適辰鈞用何似仰惟盛德所至神
人交贊福祿駢集敢乞上為宗祊倍隆調護某下情不勝虔禱
之至

某比綠軍檄遂獲參拜款待約束曲荷恩光不以位貌為間特
加容接眄矚之私有逾于昔抑亦見大人君子之心待遇門人
之不贊下情感戴雖刻骨銘肝未易敷叙

恭審恩自九天總臨諸將職兼兵柄位冠元戎名寔所先華夷
同慶某以猥職拘寧無緣再造鈞府以伸燕雀之誠輒具短啟
申賀然辭語益類自取瀆尊仰恃恩慈有以矜恕
恭惟某官以道德辭童標映當世譽望之懿自宜謀謨天緯勵
翼庶工丕昭格天之業暫膺眷注峻陟元戎方將曠咨分陝之
之功踐槐鼎以福寰海

安撫

上安撫小簡

仲春謹月恭惟玉節所臨列城風聳幽明協贊鈞候動止萬福

某拜手稽首敬裁柔訥申此典籤

某申詞寒溫之儀不敢不肅邇辰不審鈞用何似恭惟元勳碩
德藩屏王家神明民依福祿繁衍更祈密調視履宣節雨暘仰
符當守眷注之隆俯徇四海依歸之至

伏審榮膺帝綍雄殿候藩詔書甫下于九天和氣已生于列郡
光先報所暨莫不交欣恭惟慶慰某屬以賤職拘縻不獲拜迎道
左輒藉毫楮以申燕賀之恭伏惟鈞慈俯賜矜察

恭惟某官道全道備海內之所宗師深謀遠識夷夏之所畏服
名高崧岱勳耀鼎彝經綸之業宜在左右今慈歛惠一路而帝

心圖舊佇見匪伊孚號鼎傾復專國柄均福天下蒼生延頸以俟

某疎遯庸微瞻望台躔不啻雲霄之間永言敬慕何可弭忘乃今幸會鼎來忝與屬吏之末行將躬詣大府受約束于下執事其為欣抃不能自言瞻望旌戟神爽飛越

某學不聞道寸長無取謬當邑寄何補公家曠敗之虞朝夕芒負今幸託庇于二天之下拳拳依憲寔切此心倘蒙未賜罪遂誓當磨鉛策鈍期効補之萬一仰乞鈞察

某不揆狂斐砌成短啓齋沐繕寫塵獻言語蕪類不足道古今而譽盛德聊以見區區之誠耳倘蒙少霽霜威一回電暘賜幸甚幸甚

上安撫丞相小簡

孟夏謹月恭惟偃藩容與神相耆德鈞候動止萬福某謹齋沐奏記仰瀆司視伏丐鈞察

謹時申詞右辟已肅適辰不審鈞用何似敬惟盛德所臨密有扶扶持景福潛介視履元吉清和在候更乞上律天時俯遵月令保練冲粹仰副隆委某卑情無任虔禱

伏審某官清用剛辰肇開藩府吏民交慶規制鼎新恭惟歡慶

某忝與屬吏固當俯伏鈞墀伸賀伏聽鈞旨遣還賤局聞命奔走即抵下邑謹具手訥敬布燕雀之誠伏乞矜察

恭惟某官奧學洞古今浩氣塞天地逢辰致主佐命中興元勳碩德輝映青史燁乎盛哉故雖均逸祠庭中外繫望欽想簡注愈隆暫屈蕃宣之寄自瀕而中復正台司益茂賢業以侈社稷無疆之休天下幸甚

某一介寒微不敢萌願見之心伏承玉節鼎臨迎拜道左獲修屬吏之敬寅緣幸會慰喜無窮自拜遠鈞墀復經旬浹瞻望旌戟邈在雲漢伏楮凝竚神爽飛越

某才學疎謬濫尸百里歲糜月費亡補縣官雖去替之期僅止

半載朝夕凜凜若何為善後計仰覲一天覆護未賜譴斥誓當益加勉勵求稱使令訴情瀆尊死有餘罪伏乞鈞亮

某不避僭躐之罪敬申鈞閑瀛眷安問伏惟履茲初夏內外駢擁自天之祐下邑恐有驅使事件乞鈞旨行下

上汪帥小簡

庚辛處躔恭惟高牙在行神明護相台候動止萬福其敬遣一介詣節下

比來不省台用何如益昌地接秦隴會當早寒計已授衣遂御

功表吏莫無犯風霜保合太和區、以為請

節下之治蜀、人皆歌舞其賜常願赤舄之留如韋南康公坐至中書令位冠廷臣其如霜雨之施局于一方便天下不被其澤庶聖上行當召公矣

杖鉞臨此四道盖三年矣計其勤勞論其見效宜歸秉魁柄乃為稱耳今茲制詔頒下領昭陵之圖書地近職崇以示光寵盖不欲奪蜀人之蔭麻故也某敢不為蜀人賀

某按刑部亦復期年而司存寔近蠶微向來請公居此極岌岌今乃得無事飽食者公來雪山重耳幸甚幸甚

上安撫小簡

仲夏毒熱伏惟鎮撫豐暇神明薦嘉鈞候萬福某竊食待朝碌碌無補末緣俯伏賓閣謹上狀記室某僭易震恐

詞問起居已具右幅滹蒸在候天令不常伏乞特為宗社妙嗇冲和以副九重眷倚之重

曩者叅政當朝進退羣吏某備數省曹叅謀相府寔出鈞化自違節麾三更歲籥時事多艱塊處里閤不敢時以私書干溷聽覽惟是瞻企門闌不勝駑馬意軒之誠

仰惟叅政盛德元勳中外具瞻宜在廊廟康濟天下方面均佚

久鬱興情匪朝伊夕當膺環召正位鈞衡以快士夫之望
比自祠宮召真省曹方愧叨冒復被誤恩為屬樞府皆自平時
推獎之賜第慚空疎初無一得之慮慧書宥日以憂懼尚賴
鴻芘或逃官謗幸甚

上安撫小簡

恭惟燕及列城神明荐祉鈞候動止萬福某賴鴻芘如昨末由
趨侍拳門墻不勝燕霍之誠

故冬乘便寓狀記室竊謂僭率已在譴訶之域寬德遠量既畧
濶之復肆誨報所以存獎慰藉甚寵仰佩謙眷淪泐肌骨即日

不審鈞用何似暑氣正酷敢乞上為廟社剴時節宣所膺魁柄
以慰普天之望

竊惟某官行孔孟之道致臯夔之業器識之遠政事之妙宜居
廟堂共濟中興出殿大邦亦既逾年側聞公議謂頒詔趨歸侍
寬疏而參帷幄蓋旦暮事也某嘗君隸屬之末尤切悚望

其待罪計都已慚非據而宥密之地平生夢想所不敢到遽以
叨冒遲暮之才寔出參政從來鈞陶之賜獨某隔闕亡從占叙
感激之私惟誓頂踵圖報萬一神寔臨之非敢妄也

上安撫小簡

暑伏敲熾恭惟保釐綏馭說禮樂而敦諸書方面隱然有金城之重神理相勞戩穀具綏台候動止萬福謹具手啟承記室

某官翹翔禁橐風華業履冠映簪紳其于論思獻納見遠識微之明固主上所前席而思當饋而嘆也登延贊刻歸輔台鼎即

在朝夕更乞殮稟太和益疆體素行對寵渥下情虔頌

比嘗率爾其竿牘自維繫轅柎出悴音曲節浼瀆至聽宜蒙謹

斥然某官寬隆盡下獎鑒多士清衿所照每賜酬酢箱篋几杖之間金石隱鉉警策寒陋一何榮幸

某一介凡窳備員部內固未嘗得戎衣冠奉杖履奔走使令于

前恭惟某官樂育仁心兼收並蓄齒牙餘論激揚寒素初無牖

間一面之雅獨取堂下片言盱衡推轂特形論薦凡材下乘頓增光價敢不免強哀拙庶幾于任重致遠無忝題目區：鄙悰

不勝銘藏荷戴之至

某猥蒙知遇置在藥籠之末恭惟某官以儒林宗匠受任方相

伯風裁高峻蔚為今世龍門而沈淪蹇頓濫被品目岷峨人士聳然改觀寔深榮幸謹具短啟小通謝悃伏望燕閒之隙一賜觀

采

上安撫小簡

暑雨蒸潤恭惟者英鉅德為國藩垣保釐督護之功百城順賴神用顯相台候動止萬福謹具啟承候下執事

某官以簪紳素望冠映甘泉侍從之榮嘉謀嘉猷海內稱頌方當策勳序爵翊贊鼎槐而當宁憂頽岷陬暫繫鎮撫恭惟元戎十乘殿天子之邦億萬黔黎性命攸仰伏冀保練冲粹精護寢興乘副瞻頌

某官伸敬侯度布宣王靈所下教條無非惻怛忠厚之寔立經陳紀禁暴律貪風尚凜然令行禁止休聲協氣薰顯太和兩場以時嘉生芄茂某辱在部吏得疊休惕恪恭于繩矩之末頌

不幸甚

某比者不自揆度輒以鄙散之文仰干繩削某官以儒林軌匠運斤成風膏馥之餘不我遐弃特損書教褒稱獎與訴以竒古之目自非顏淵附驥尾而行益顯感嘆奮激不勝下情昔韓文公有言愈之所以志于古者不惟其辭之好好其道焉爾短章悴句摩研編削之陋既辱稱予敢不益思溫尋研摧淬扣砥礪庶幾乎言之必可行以無忘崇邁世教之厚德也

特蒙某官垂貺齊醑十壺仰認台眷拜受感悚恭惟荆州平一之惠建康清醇之德所以飲食教載示其仁心者厚矣敢不屬

屢食盛禮之肝鬲

某蹉跎蹇步頓跡塵壒備負部下當物象重夥政煩賦重之際
刻肌刻骨攻苦食淡無所云補每用愧嘆伏遇某官以篤寔輝
光重郡吏獎鑒風裁蔚為一世之龍門而念此孤蹤自維揚
入館三忝郡寄粗免瘵曠今當開陞正任資序願與牛溲馬渤
雞壘豕苓為藥籠中一物以階寸進猥蒙矜念許賜收錄區
不勝彈冠振衣三浴三薰以候齒牙之論也

播芳大全文粹卷五十八

聖宋名賢五百家播芳大全文粹卷五十九

疊幅

安撫

上安撫小簡

仲秋謹時共惟坐鎮侯藩撫綏多暇百神森衛台候動止萬福
某遙望旌戟行有瞻拜之幸下情預切欣愉謹具啟山塵記府
申問之禮不敢以微賤自廢具如右幅維時玉律方中涼颺應
候不審邇辰台候復何似共惟分間所寄恩威並暢軌躅靖謐
福祿駢臻更乞精練冲養即膺節旄之拜魯棕傾祝倍切拳：

國家圖書館, NATIONAL LIBRARY, TAIWAN, R.O.C.

踈逸一介竊服威名德望積有日矣第以隨牒南北無緣瞻拜
履舄惟是區、願事鞭勒之心耿、不泯何期幸會行奉台符
于指顧之末下情不勝榮慰之極

恭以某官元勳盛德久屬朝野之望經緯大畧夙簡主知方狂
虜未殄朝廷側席優賢以罔恢拓掃除氛祲寧濟宇宙翊戴王
室非公而誰與議如斯非敢為佞

竊以中正大邦寔右都國之會方此還定安集之初某官仰体
眷隆肅如鎮撫威惠並行群兇屏息苛慝不作百姓蒙福元功
卓越前無古人嘉命顯書進東樞筦折衝廟堂之上期在朝夕

某嵬瓊庸流叨塵仕版再調銓部獲司曹掾遂以么麼趨事麾
下天與之幸感愧叅集行將欵板公庭瞻望幕府當竭疲駑用
副鞭策下情欣抃之至

上安撫小簡

中冬寒凜伏惟偃藩多暇天人協相鈞候動止萬福某仰託悁
懃末由俯伏鈞屏謹奉啟申候起居

上問約履謹載右楮陽氣始萌伏惟順秉令序第祿蕃衍某拘
縲不獲旅進階符稱慶伏乞上体眷懷精調養寢倍鈞重至
深祝望

迺者伏審某官均佚機務來牧要藩列城聞風莫不胥悅某既無緣負弩少展望塵之禮復不敢坐通尺牘干浼嚴重輒因新節聊述卑悰伏惟鈞慈特賜矜察

仰惟某官蚤以真儒擢居元輔當國步艱難之際奮然以忠義自許不避險阻四海之內蒙被嘉澤幾年于茲元勳舊德謂宜永佐王室典宗社同休休倚需節台還秉秉國鈞以慰蒼生之望

竊承河南郡縣悉歸版圖中興之功誠日月可美所賴黃閣疇庸緝熙帝載俾寸地尺天皆入貢籍然後仰副聖主憂勤之意某官任隆柱石茂績殊勲行帛雜紀未類同秀袞衣東歸在此時矣播紳喁：非獨孱品所敢諛也

某蚤遊賢閤壘益十載偶獲綴相公榜末是時雖不及叅識于稠人中瞻望風采昂：若雞羣之鶴決知非池中物也伏自相公當軸陶冶天下士類獨某以不才之資無階可備器使賦分淺薄夫復何言引脰鈞闕徒增惓：

漕使

上漕使小簡

區：叅訊已列右記即日仰惟清心肅物有神自相台候動止萬福某謹再勒副上承

竊惟吉德君子所至如和風祥雲品物為之悅茂而獨熒然憊矣得公之來濯：遂有寬裕之意然高文大手當施之北門西掖豈久淹于此乎丘林之纍尚為公一增氣也

頃因迂吏草創上狀蓋念世間陽尊浮禮非所以事長者而又自聞使旌壓境某閑人也若將違：然典負弩之吏竿牘爭先則公亦將鄙之矣故有所待而後講乃蒙高義不忘首賜牋記褒借甚寵下情愧忤重以自咎尚惟寬明有以原炤幸甚

蜀士多文采其學業其志節足以與古人相上下者蓋亦有之但生遐陋俚：無所統盟程能定價使之依以揚聲而補于世

用則公當任此重也某老矣百念灰冷唯于人物猶有莫助之愛敢竊以私于下執事為區：惟所財幸

門下尊少伏惟均介盛福某焚弃筆硯久矣偶作小記漫遣呈亦足以見其憂患廢學如此耳併師相生辰詩五首徑干一觀

上漕使小簡

時維季夏熾以景炎共惟攬轡云初臺網靖肅神示飲相台候動止萬福某拜手稽首敬裁手詢仰塵典籤

申問之儀已列彛式比辰不審台用何以仰惟澄清一路調度有經神之聽之福祿繁衍更祈勉懷體貌珍護飪養行膺顯拜

以叶中外之望

伏審某官榮被宸恩肅將使指涓日之剛已諧視事共惟慶慰
某屬邑下吏喜尤倍于常人最著裁短啟別緘伸燕雀賀厦之
私伏幸台慈特賜省錄

共惟某官望隆朝野識練古今夙被眷知荐揚教寔固宜密勿
禁庭朝夕獻納輔成至治以福天下閩陬何幸而私大惠第恐
坐席未煖環台鼎來入拜制麻垂副公議

去春拜違台表屈指年餘拳拳尊敬頃刻食息不敢少忘唯是
遠隔不及時貢記室之問迹雖似懈情寔不然茲者伏承玉節

載臨某自惟庇陋一何天幸又獲仰事賢使者况桑梓晚進計
未終弃瞻望台躔不勝依向之誠尺楮寸毫莫究萬一

某愚不省事繆當邑寄曠敗之虞旦夕凜然亡何終更善後之
圖未知攸措仰惟厚德君子矜憐塞進周旋覆護不以罪行而
莫大之恩當銘于子孫肺腑矣在冀台念

使闕仙眷敬惟履茲庚暑中外駢擁龐鴻之祉下邑恐有驅委
乞賜台戒願殫駕鈍之誠

上漕使小簡

仲夏謹月伏惟繡斧光華臺綱增重神示贊襄台候動止萬福

某代匱下邑仰承蔭樾末由趨拜履約謹齋沐具狀下溷輿隸
以聽伏乞台察

申問苗鼎恪載前記未審邇辰台候復奚若恭惟玉節載臨澄
清有道天人威助固宜祉福之川至也敢以上為廟朝安養寢
晉膺柄用益懋康濟之圖為天下請

恭審某官榮拜宸恩肅將使指先聲士庶交欣涓日之剛已諧
登攬某叨典屬吏喜陪等夷限守官箴阻迎道左謹具短啟別
緘伸燕雀之賀伏紙瞻依神爽飛越

恭惟某官以大雅之資至剛之氣淵源學問追配古人餘事文
章度越今世結知丹宸入踐禁途屬時清明尤重外臺耳目之
寄妙簡朝望暨屈我公登車方初列城風聳元：仰惠抑何幸
歟竒謀妙蘊盍攄究于宙堂政恐坐席未溫揭甌環台八拜制
麻區：偏方詎能久淹邪輿議調然非敢諛貢

某卑冗寒微佩服山斗之望多歷年所雲泥異蹟不獲一拜台
光永言敬慕鑒寐不忘扶承肇開臺治而某備員文邑忝屬提
封獲叨庇休于景星慶雲之下瞻望企仰私自語幸實何異于
親侍熒煌之席也依歸彌勤毫楮莫既

某曩自叨竊末第強顏入仕一紀餘矣屬以偏親之養覬竊寸

祿得邑海濱行書一考自惟孱陋學不見道以之從政曠官之責將何以為善後計茲幸賢德鼎來奉教戒叮嚀有日矣哲當勉礪厥眊恭承嘉惠磨鉛策蹇期効寸長于屬吏之未儻蒙台慈矜其不逮而免于戾豈勝厚幸俯伏陳露尚祈台察某一介既遠不敢僭申使堂上下靖共之儀下邑恐有使令乞台旨行下

上漕使小簡

秋霖淒腓共惟祇命辨嚴輔軒綉斧光華原隰台候動止萬福謹具狀承候下執事

某官勲勞德業簡在宸衷銜恤之久上心倚注每隆無替是以祥除之始誕錫喜命以數路百城焜煌旒節庸示委屬竚聞賜環之詔歸主論思荷橐之選乃慰清議

違去誨席之久自春間一致問牘尋辱裁報翰墨疑曲之間仰認恩意自爾吏事倥傯久踈遣省企仰惟愛予宿素未貽剪弃吏組拘縻尚未能趨伏門屏敢冀葆練冲粹懋膺晉渥垂副願頌

上漕使小簡

賀生日

季冬謹候共惟漕臺飛輓廉畫優閒靖共神相台候燕興萬福

其遠託恩覆末由瞻拜台光謹具啟申詞記府

仰候起居之禮粗陳梗槩邇辰未審台履復如何欽惟澄按多暇神物交扶茂介殊祉歲聿向莫寒氣益隆敢祈上体眷懷妙毓崇粹以俟晉擢下慰拳之禱

九冬幾滿氣數將周乃某官降神穀旦伏惟元精所作稟質特異仁性符于爰日剛德協于嚴辰出為英傑以佐昌期實自穹靈之默相福祚壽齡固將與宗廟社稷並其久長非管窺蠡測所能知其極也

某官德宇高明性天夷粹自妙齡馳英散膺柄用功勳節操顯顯在人耳目自非大昂應時列星間世何以臻此宜其亟登禁垣旋陟台輔以快士鄉之評尚淹漕寄未愜輿情佇聆鋒車促召以究遠猷門下小子尤切傾俟

恭以夢熊吉日得馨良辰播紳士夫交騰善頌誠由恩輝義槩有以感物激人故抃蹈之至不謀而同矧如疵陋之跡蚤蒙陶冶復有賴于生成其為傾祝當如何哉某限拘官守不克趨廁稱觴之列謹具短啟以露微誠仰祈煥察

某萍梗四方久遠墻仞感戀恩德之心無時或替前此欽聞攬轡之始嘗具柔牘馳慶幸遂塵徹筵席每惟雲泥勢邈不敢頻

拜尺書恭逢誕日復爾僭易修貢兼以星香功德品目專人賈
獻台墀用伸紀誦輕越之罪敢覬恕原

某微瑣凡材夙叨品題遂得簡牧一同常思勤劬恪謹以免瘵
曠庶無辱于恩門茲緣天幸復藉提封之庇豈勝欣戴更蘄盛
德包容始終獎拂俾益安于賤戢以再入于鑪錘實鱖生之至
願依歸傾跋改毫楮雜殫

上運使小簡

晁子西

槐序氣炎伏惟攬轡入境神相循行台候動止萬福某敬遣一
介候詣境上

邇日不省台用何如伏惟乘傳而來雖當盛暑玉節所至肅然風
清自應不知煩鬱也更祈厚自持養以副巡屬之望

伏以某官風度英秀粹然如圭璧宜薦天也宜在清廟不謂乃
爾久使于外雖一方受賜矣其若不稱何佇觀壘台之至

峽內地褊小無甚劇事殆不足以展大才所謂太阿龍泉匣而
藏之識者所惜也近省制誥改臨益部聖主蓋亦知之矣此方
玉議除虛額之調未能即副上意其有待于節下願言疾驅

某本不任為郡如得事忠厚之長以保持之則可耳向在梁山
微節下之賜其何能免于戾耶既來此部猶一萍之託茫然之

誌

啟

水日夕惴恐忽聞輶車當來喜不可言不覺欣然起舞也某更
十告朔亦去矣預恨窮薄又如往時不得久庇寒士之大廈也

上運使小簡

申問記史已具右幅季夏謹時共惟澄按豐暇神衛忠功台候
動止萬福某蒙庇如昨末由趨侍南向拳三不勝犬馬之戀謹
勒叅候不備

某一介之賤乃得以賤事受察節丁側聞涓擇剛辰已諧禮上
賤賤奔馳未皇欲扳一望台光躬修萬一之賀仰慕威重朝夕
以之即日不審台候何似諒惟列城蒙休動履百順坐致殊祥

炎涼末節敢乞妙普冲和益綏壽域拱俟詔除以副中外之望
某屬者輒犯分義率然且咫尺之書塵溷記室少伸燕雀之賀
不審嘗徹台聽某賤事係在蘇常江陰三州徃來幹辦以故未
獲伏詣使臺下情朝悞伏惟神明矜察幸甚

竊以少卿學術才具上副眷知下車未久烈績已著一路士民
孰不鼓舞被翁鬱之澤第恐進陟禁近行有詔矣輿誦屬焉非
敢為佞

上運使小簡

歲籥肇新共惟某官登按豐餘天人介相台候動止萬福某凝

睇星臺未卜瞻觀謹修柔訥仰干下吏之聽

申詞興居已塵管記邇辰獻歲發春不審台履復何侶仰惟觀
省風謠列城徯頌履端之始百順來宜更祈上休眷懷增忝茵
鼎佇聽促還以慰播紳之望

仰惟聖天子所以坐享隆平者皆以外臺得人政流民悅之所
致也當是之時某官以上所簡注出擁皇華其寬大和厚之氣
薰被黎庶坐使列郡之民熙々然如舞春風而飲醇酎可謂不
負委任責成之意矣然一路何足以私大惠必將接武禁林垂
光雲漢使六合內外均被其賜然後足以究其施設也士論所

斬匪倭

屬者進狀台墀既辱燕見于賓客之未且蒙畧去威重而使侍
食慰以溫言所以教督而寵藉之者雖父兄之于子弟不若也
自惟一介微陋何以得此佩服焉謙有言莫喻伏自逖遠光儀
忽々閱歲嬰犢之慕已劇于中何當再遂望履以罄欲言臨紙
溯風恨無飛肉

上運使小簡

中冬寒凝伏惟攬轡澄清臺綱振肅神明扶祐台候動止萬福
某延望旌麾未期參覲謹奉伏仰承饗寢伏乞鑒察

申問之儀已列右楮即日不審台用何似伏惟下車伊始風化
班宣戩穀業舍寒氣已嚴更祈上為清朝蓀毓冲粹別膺異數
下情無任虔扣

恭審光被綸言總司漕計芘休所暨欣抃攸同某屬賤役拘縻
無階旅進稱賀凝望輶軒精爽飛越

仰惟某官碩德重望著于朝端蚤被簡求周旋省寺休譽赫然
孰不歸仰謂宜論思帝所日侍清光尚且擁節外臺殊弗輿議
佇聆嚴召促還禁從光輔王室用紓中外之望

南閩遠部三屈使華伏想軺車入境老壯歡呼深仁善政遺愛

在民去思之詠幾年于茲一旦重瞻四牡再沐恩波人心未愜
當如何哉第恐聖主圖任舊德不容久駐此非下吏私切欣嚮
實播紳之所同也

某頃年備員合沙數獲仰瞻履舄重蒙獎借銘篆肺腑豈有窮
極拜違台範閱歲滋久况賤孤蹤不敢坐通記府之間每于邸
報時見遷擢亦足慰景慕之心然賢業素學未盡發揮更願涇
養以需天寵至深瞻祝

上漕使小簡 賀冬

冬深寒重伏惟秉心宣猷臺綱振肅神明胥贊台候進止萬福

某竊祿無狀政賴幘幪未遂參拜謹奉啟起居仰乞台察
申賀之誠謹具右記即辰不審台候何如歲華向晚敢祈上為
明時惠序珍毓前席晉拜某虔禱

一陽來復品彙潛萌恭惟對此令辰導仰協氣茂擁蕃禧某限
拘文檢阻造台塔稱賀傾頌之誠但深馳仰

恭惟某官教實卓越久著朝端伏自澄按屬部恩威浹洽因不
震肅竊承睿眷方隆計司之任恐難久淹佇膺嚴旨亟躋華要
發揮大業以慰人望

皆嘗具狀上塵記府既而不果荐貢柔訥誠恐冒瀆台嚴固非
懶慢仰惟寬明特賜矜察

某一介几瑣備數下邑雖効戢寢久而空食罔功第切驚惕伏
望台慈更垂保庇尚當自竭以副驅策

提刑

上提刑小簡

仲夏謹月共惟繡斧光華臺綱靖謚神示左右台候動止萬福
某承乏下邑仰記雲麻末由詹侍謹具啟上塵記府邇辰不審
台用何似欽惟玉節載臨澄清有道林祥駢集宥有扶持梅暑
鬱蒸更乞正為朝家加念鼎第前膺召拜

共惟某官挺不世姿負過人畧其笑談餘暇足以剴治煩劇其
動靜俄頃足以建立事功誠可謂難得之才萬夫之望也况當
大有為之主夢想人傑力圖恢復有如執事固已簡在帝心外
臺祥刑之寄姑推借重政恐不待席煖突黔而詔音頒矣區
賀誠謹泚筆以俟

某講服台望非一朝夕恨以沉冗不獲瞻拜煖座永言敬慕鑒
寐不忘茲承肇開臺府而某備員支邑忝屬提封獲與使令之
末其為慰幸何可比量尺楮寸毫莫究萬一

上提刑小簡

劉夷叔

序氣向暄即日不審台用何似某承乏藏事日與門人誦論德
業以次傳授無由趨侍不勝企仰區：奉啟

太上出公以福遠人已神楚鬼預有憑附伏惟下車以來寢膳
安吉起居輕利益副遠近傾屬之心某在門下區：不任大慶
近者方得以書致賀嘗布腹心述其所以不敏之故意謂必獲
誅絕將命者反迺蒙寵以報章然後益愧向者窺量君子之淺
傳播士類咸謂盛德包荒乃至于此人之愛服敢再拜告諸執
事通中伏領公牒蒙被保任皇恐死罪伏念某以薄技誤蒙收
拾不惜語言粉飾薦道向者當塗貴人所以寵異惟公之故此

心惘惘常不相忘未知所以報塞君之大貺枯朽重任懼將壓焉
小人無路報德惟知自修不負所期而已不識執事以為可否
平生憂患如籠中鳥久被閉繫無復飛想門下親臨其旁碩瞻
歎息如有怜而出之之意某竊以振勵庶幾求出情之悃悞因
此發露伏為不以為小人不可近而遂僭者待之幸甚

上憲使小簡

趙公埴

季冬謹時共惟登攬之初神人扶相台候動止萬福某竊食部
封仰依覆護末由詹覲謹具記于溷輿隸之聽伏乞台察
偵候威嚴具如右削不審邇辰歲宴嚴寒台履何似恭惟玉節

嚴

載臨至和來宅敢乞教護悃：葆嗇台重慰天下朝夕之望
恭審某官榮拜親恩肅將使指先敢所暨士庶交欣涓日之剛
已諧視事恭惟慶慰某自聆命忻喜倍于常人敢著裁短啟
別緘伸燕雀賀厦之私伏幸台慈特賜省錄

某官天資傑特地胄萬華兩宮之眷方隆四姓之候莫比果膺
一札畀以祥刑願方今練達之材疏通之政以某觀之未有如
閣下者而幹旋樞極變調元化搃天下本兵之寄非公尚誰望
耶第恐坐席未煖環名鼎來入拜制麻岳副公議

伏自今春下遠遠之拜屈指數月漸見歲換拳：尊敬頃刻食

息不敢或忘唯是遠隔不及時貢記府之間邇雖似懈情實不然自郵報初傳知有持節江東之命某自惟衰晚一何天幸又獲仰事賢使者况門墻舊物計未終弃朝夕引領但未有趨拜之便少叙下悰睇望使星心精馳騫伏幾台照

某備數于此已書一考有奇况食素餐幸無吏責祇益自愧來春先次搬挈碎累歸于長旋^樂為趨朝之計庶幾密邇河海千里之潤旌旄按臨屬部諒在匪伊首當伺塵境之初先象人而郊迎以盡區區之恭情之欲言非筆舌之所能既惟台慈有以亮之國太夫人即日恭惟百順駢臻五福寧謐

台眷上下一一茂集休祥有委使乞賜台旨

上憲使小簡

區區參省已列右戕即日仰惟舟御所臨有神自相台候萬福謹再勒副布下執

天方暑雖江流奔壯放溜容典想甚慰愜尚冀精御粹冲以副願望至禱

西州劇部蓋冠全蜀而嘉陽江山雄傑呈露雖不及吳越之清遠然在叢爾固寔冠諸郡邑臺府高明宏麗甲乙成都君子一臨益增重矣

實

眉山蓋在天之末也台座宜翱翔臺省乃今擁節寶尊臨之而已老窮交豈謂得與父老子弟爭先覩于鄉國乎曷勝大幸

上憲使小簡

張安國

暮春之初天朗氣清伏惟秉節東都神相吉德台侯萬福某謹
勒啟上承記室

請違台表忽閱歲時改慕老成夙夜拳拳比辰不審外台暇日
履用復何似敢祈上体眷懷視時御宜亟膺驛召入對嚴陞區
區至禱

嶺海之間民夷雜居強悍成俗喜鬪健訟一以吹噓撫摩則有
稂秀之害一以苗薈髮櫛則有獄市之擾必得忠厚明允之士
寬威兼濟以變和之故上以節授執事俾定欽恤奉使稱旨即
日顯褒鋒車從還冀遂先覩餘惟為民自重

上趙提刑小簡

春寒共惟外臺豐暇神明協相台候動止萬福某近託大庇末
繇參覲伏冀為國自重

不審寢餼比復何如同姓之鄉宜歸本朝以衛王室尚祈珍嗇
前趨名驛

某瞻仰名德之重于茲有年比者待罪下邑遠獲恭事威嚴幸

甚何當一詣帳下親受約束臨書不勝欣幸依歸之至

上憲使小簡

氣候嚴凝伏惟聳鎮百城神明扶佑台候動止萬福某遠藉熒輝未以罪斥尚阻趨伏墻仞謹具手啟恭候

候問台嚴謹如右幅陽律方新純剛寢長共惟履茲令序戩穀實繁某拘縻無由捧觴稱慶伏冀愛晉神粹永階魯史俾熾之禱

迺者伏承星軺臨按遂獲瞻望符采殊浣疇昔仰德之誠拜遠台光遽閱兩月內擁勞結不可具言更乞益隆賢業前儒峻台

慰中外願望

仰惟某官教迹卓越妙簡淵衷澄清屬部已逾朞月平反獄訟絕無冤濫真足以仰副欽恤之意憲臺雖極嚴峻恐難久淹矧膺異數以安輿論

某備數百里戡事曠敗分甘汰斥前日飛駟按行特蒙寬宥未賜威責不敏之資願何以論報唯銘鏤肺腑誓不忘德姑此申謝萬一

上憲使小簡

欽服威重有年于茲雲泥之隔無階趨就下風惟其注仰不忘

且慕天假之幸乃使密依虎節平昔願見將遂慰釋千百欣悵
無以借况伏承簡在淵衷榮司外憲涓日之吉已開盛府裁剖
伊始犴獄一清自淮而右綿地數千里如在冰鑑中碩屬吏所
以歸賴宜如何也

薄官匏繫趣賀無從引領使星但劇善頌

仰惟某官偉望嘉績凌屬屬一時歷金門上玉堂士心斷向久矣
尚茲弭節蓋清朝用賢之漸匪伊嚴台即踐槐鼎霽然霖雨以
福蒼生某雖孱陋庶及霑丐得之師言非敢為佞

旌旆至臺亦既旬決凡在幘幪之下宜奔走階屺以承戒約小
官有守不敢輒望台闕懈怠非所欲為仁明必推情恕不然則
孤外之迹奚能少安邪

夤緣寸祿獲依麾戟筮仕荒陋豈敢逃責惟王公大人教其未
至而貸其不及使遂邑勉歲月不為親憂丘山之賜碩易量耶
近仰門闌倍萬眷眷

下邑雖僻民訴實繁偶歲屢豐寇攘不作訟鉅因亦簡稀駑鈍
無堪少逃官謗皆仁施所暨也甚幸甚幸

攘

欽定四庫全書
大全文粹卷五十九

大全文粹卷五十九

國家圖書館, NATIONAL CENTRAL LIBRARY, TAIWAN, R.O.C.



聖宋名賢五百家播芳大全文粹卷六十

疊
疊福

憲使

上提刑小簡

伏審旄節按行巡屬當此盛夏敢問跋涉不至勞乎恭惟褰帷
問俗神明嘉相風伯獻涼不知煩暑台候動止萬福某敬遣末
介以候車塵

某聞諸部部內之民思仰盛德朝夕願見不啻當暑而思濯清風
忽聞使輅近止上下延頸以望不勝喁

國家圖書館 NATIONAL CENTRAL LIBRARY, TAIWAN, R.O.C.



此月正是土潤溽暑之時居塊塏者猶病煩熱伏聞輜車犯此
炎天慮有淹繫蓋仁人之用心闔境歎息不知以報惟冀戴星
而行日出而舍以避道暘不勝拳拳之請

某迂疎不勝一郡之寄而復視事日淺州綱頽壞多矣遽承節
下按臨為之惶恐更望台慈有以教其未達而寬其不逮幸甚

上憲使小簡

叙慶如右牘猷歲發春通日寢興何似共想茂對佳辰天相清
德福祿未臻某蒙仁有素得定吏議未期忝省願言葆練粹和
亟還禁院用伏朝金頓禱之勤伏紙卷

不承台誨忽見新春瞻邇光輝日益悃悵比借具記計塵凡格
恩瀆之罪未賜譴斥引領東望不勝感荷

伏念門生故吏所以事貴事賢之禮載于竿牘乃分之宜鉅公
要人未聞獎之往還誦好若僚友然也迺蒙謙尊畧去畦畛誨
荅開諭周旋跪讀感慚曷已尚稽面謝無任歸依

小徃夫来君子道長仰惟吉履綽有休嘉一官冗曹阻陪賀客
千百善頌拙喻毫楮

眷光布澤明天子擢進髦乂時也時望之偉首當遊東徑踐華
貫匪朝伊夕以其彙征門下士猶有望為區：此情竊為之喜

一江賊就擒幾無唯類威令素行群下用命其效正應如此繼
自茲善良得所怙恃而庸懦亦自免官諄頌喜且幸可勝道哉
感刻

上提刑小簡

林豈塵

詞候寢餐敬遵彛式具列首牘比辰春事融悅化日舒遲不審
台用何似竊惟澄清豐暇神贊人詠冲襟泰定戩穀日隆尚願
仰休宸眷茵鼎慈護倚需賜環進陟鈞軸下情真禱激切之至
某夙望台符自惟卑昧無由進侍光纏朝夕第勤景仰茲以試
邑獲隸部封遂記輝映戢守所拘尚阻參觀遠企熒煌精爽飛

越

禁

恭以某官雄名蓋代俊德高古雉為禁路羽儀南宮眉目文章
事業未極施用上方以外臺為重皇華之遣政藉諏訪而埋輪
攬轡姑息咸譽行需走即趣覲清拱逆膺柄用以福寰海
某羞抗塵容掌徯山邑初至承前未知深淺然簿書米鹽不憚
煩碎百里休戚首當訪問至于遵奉科教班揚明令敢不期電
勉以承德意猶懼駑蹇未逮尚賴寬假總策庶幾驅馳竭力不
至顛躓以速咎戾密控慈明敢斬宥啓

某竚膺効知深虞簡率上貽嚴譴晚學寡聞初不敢揚文露志

輒以短啟畧叙早僚仰讀高明戰慄俟罪敢幾白慈特賜省覽
某十六年太學黌蓋晚竊竊一第今一紀矣茲以誠宰山澗未免
墻面之責所幸事大君子敬受警悔庶幾讀書鳴紘不為俗吏
之歸尚靳清鑒特典矜念

上提刑小簡

比日秋清共惟頌節之初德威所臨百城震聳台侯起居萬福
某待罪敝邑無從掃舍人之門上參典謁益莫為國以道自重
公之結上眷獎上之遇公者大夫士共歎千載一時之事不知
其有所自也某獨知之益以公高舉遠引不少留翰墨深嚴之

地悵然耳已渝舊所治亦舊所隱使華重臨人去心之頗有暇
日追尋昔遊見於文字否何當往繼後車賓客之塵臨書重增
馳向以龍茶松煤佳品獨眼室丹妙香新勝不同下拜也此外
不敢望公如陸生以所賜黃金分故人耳一笑皇極書數十萬
言未易辨親物二篇先君子為之傳并褒德下感二書同致几
下尚先君子之意也悲愴何言向伯壽所訪亦此書耳某苦顛
眩極亡聊作記草、思所以廣公意者未盡萬一

倉使

上提舉小簡

賀生日

北律時周嚴冰在候共惟庶畫優問天神飲相台候興居萬福
某代價偏城仰切懔履未由恭侍謹勒手誠申候典記

裁問彛儀恪具前楮比辰不審台履奚若欽想澄按公明百靈
潛衛穰之福萃某駢筵更新精調鼎飪前席峻除式符中外
之望

臘月適中歲功將就天于此時誕毓人傑神湛秋水骨瑩皓玉
卓然為民望時宗寶元精之所生華岳之所挺宜其叶應期運
茂建勳庸祿位之崇壽祺之永固自有穹靈密祐非假區之
禱也某官圭璋稟質梁棟標奇雅性內融英華外發故能結知

黃屋荐恩要途暫屈外臺蓋揚德譽既誕辰之已屆宜寵命之
惟新召寘廟堂當在朝夕輿情若此非某敢私

仰惟孤矢令辰有識交慶列城官吏士民孰不以八千之春秋
祝延遐算想夫袖戔獻掌袂屬肩摩某以郡事攸拘阻趨賓廡
輒具短啟并呈香經目專人賫貢台庭以伸傾訟之誠伏覲仁
明俯垂照察

某竊祿都梁兩見凝臘雖豁信之境緩靖惟艱而仰賴庇輝粗
加免勉幸逃吏責切蘄原德包含俾益安愚拙實終始全死之
賜感戴瞻依伏楮彌甚

上提監小簡

敘問具如右幅庚伏謹時共惟視事以來燕及列城神明相佑
百順來集某哀晚冒昧方此承乏末由扣謁謹上狀叙拳之
誠率畧幸察

已酉之秋與左右南北異向此訪動靜于彥章謂將自此取道
之官庶幾一見延佇之久乃爾差池左地下情豈勝瞻悵暑氣方熾
敢冀調護與居茂對寵休以符頌禱

比承涓辰已諧交印獨以阻澗無從預賀履之末北望馳情但
徒燕雀之抃

武康令莊修戡某妻之姪也庶謹公勤在後生輩流中寔不易
得欲望瑞叔察其治行以一京狀薦之如何使司歲額沛然之
有前使者文字可以補發惟早賜收錄則幸也特有一日之雅
輒冒言之伏紙愧恐

上提舉小簡 賀冬

冬氣正中朔風凝凜共惟摠鎮雄藩澄晝優游忝人忝介台候
起居萬福某備員于此仰託雲麻尚稽瞻拜謹具啟承候記史
申詞菲誠祇載右楮不審適辰台履奚似緬惟豐財有道察舉
至明密有神靈來相純祉陽剛初復氣令彌寒敢祈上体宸眷

加護寢養以副與人之望

恭惟某官儒猷飾吏忠絜光朝蚤歷清華備揚教實暫出司于
臺計誠未究于淵謨宜因剛長之辰亟奉溫明之詔峻躋禁從
俯協師言某仰席息輝尤勤願望

亞歲屆期一元肇節群情昏悅萬彙潛亨共惟 碩對時誕延
殊祉椿年鶴算仰同社稷之休某以賤守拘縻無由趨廁稱觴
之列輒修短啟以代慶儀傾祝之誠筆端奚既

某碌：亡奇徒勞小郡寔賴台仁寬假苟違曠尤雖感懷德詎
罔間夙宵然不敢頻貢尺書以溷聽瑩茲因令序輒布區布仰

冀高明特加矜察

典提舉小簡

孫仲益

風橋辭去匆：又見歲窮雖係小門下而不敢馳書問安否屬
聞造境方敘區：欣頌之私又為左右所先高詞見寵開讀疎
然殆無以為容也

自承拜節少駐一時賓從皆有登龍之喜願以衰老不獲躬埽
門望履幕下自罄鄙悰茲不復縷陳

上僉判小簡

仲秋謹時伏惟贊治雄藩婉畫多暇天人交相台候動止萬福

某區：將遂趨承之幸謹具啟詞候起居

仰聞盛德美譽之久南北差池未遑望履約而聆緒論下情傾
逝日益拳：維時商律向中蕭辰正肅不審眎履何如伏惟慕
府雍容百神擁祐福祿來宜更乞益護禮靈節調茵鼎魯棕頭
言不勝虔扣

伏以某官謀猷宏遠識慮優長明哲保身忠嘉許國暫迂驥足
未邁駕行方今任賢使能籲俊為急佇聞簡拔亟踐清華綸綍
之頒可拱而俟

上教授小簡

仲夏之月恭惟行軒翹駕靈祇左右台候動止萬福某謹拜手
上狀仰塵記史

候承之敬已列右者邇辰炎燠方中不審起居復何似仰惟德
業有相畢來諸更漸順令谷神以竣峻台區：誠禱

誦聞高誼歷年于茲芝宇未識其于馳仰則往來于懷也夫何
幸會行遂依仁方欲修咫尺之間遽辱朋緘文辭璀璨褒譽過
實敬讀三復愧無德以當至意慰感倍之匆：具謝不謹併幾
台亮

恭惟某官志大而氣剛才全而德備文章特其餘事學術自為

名家榮中兩科一時歌艷便當展九萬里垂天之翼曷煩小試
于儒宮上方夢想求賢清切之拜恐祇在旦暮之間耳匪佞
某愚下省事繆當邑寄支弊扶顛其技已窮餘光覆之幸逃厥
咎區、下懷願疾其驅非徒快雲霧之披庶幾奉教下風以來
通其晦室儻蒙薰慈特賜共進萬幸萬幸

吳教授小簡

即日初暑共惟戒嚴之暇袖物擁衽台候動止萬福 行有託
庇之幸謹具啟仰酬來貺之寵
之後恃公寬貸必諒此意而頑鈍廢禮不自違也

歸田四年屏伏村舍遇寒暑之變無以逃比從舍傍築三間以
寄衰朽而百後如毛心力俱盡但悵然作甕中之想亦發公一
大笑也

太守

上汪內翰小簡

韓子蒼

即日不審風霜偃薄起居飲食何如伏惟躬有盛德神明扶持
旌旗所次皆膺百福謹勒手記候問行李萬分

伏承肅膺詔命改刺臨川臨川雖徧地連鄴陽此其前輩畫錦
之榮亦何以異且謝康樂顏平原之風流未遠也非文章守尚

孰繼之然北門承旨今無復人矣二府亦有虛位恐復由宣台
入轉缺鈞此天下之公言伏冀為國加志寢興不勝區區之願
甚從學者得執事之文章手抄口誦目眩心驚如是二十年矣
每逢士大夫親承指教及獲奉杖履者輒自愧恨不謂老境得
與州民瞻望顏色凡二十年企慕弗獲者一朝慰滿其意人之
幸會乃有如此欽佇使麾頃刻以冀

其受才無它世間一閑物耳入仕既晚又常齟齬在官之日淺
投閒之日多已分委棄為農夫矣特以戀膠庠粟故且垂紳搢
笏強顏于士大夫之列頃值紛紜伏藏岩谷流離困頓所欠一

死耳蒲然餘生誰復存省乃今天幸得庇餘光喜極言踈伏幸
加察

上太守小簡

林豈塵

詞候養寢敬遵彝儀且列首牘比辰歲律崢嶸冰霜凝厲諒惟
鈴閣優游神聽民悅冲襟泰定戩穀日隆尚願仰休睿眷茵鼎
精護倚儒台環進涉鈞軸某下情真禱激切之至

某久違台範景慕之誠匪曠朝夕春中輒貢繫牘以干記曹政
悞僭率自貽嚴譴豈固譙撻畧去等夷貶賜教飭懷慚聚感何
以云喻區區守窮不敢嗣起居之間以取瀆尊之罪尚冀慈明

洞達特賜濶畧行遠瞻拜台躔下情豈勝欣抃

某官以良二千石分寄共理流惠舒化斯道之行當先一州而後天下台節之來亟躋柄任中外薦紳所期于文章事業者此耳虞鮑雖有故事而莆陽郡壁記云有三台自我州郡始某將與邑人見鳳同鳴以賀然後以得賢為朝廷天下賀

上太守小簡

林豈塵

詞候籤師敬遵彛式具載石牘通辰不審鈞履何似即日春物融怡和氣宣暢共惟火鈞純嘏神介景福尚願鷓鴣寢室護鼎餼精調仰承疏冕眷倚之重俯慰簪紱祝頌之誠

其惟某官道德正傳天降大任布衣而至上袞書錦以歸故鄉暫輟經綸姑煩藩翰雖聖意欲均其勞逸然朝廷有係乎重輕佇膺綸綍寵還機軸益攄遠業光贊中興某當續蒸民崧高之雅以歌頌勲德之萬一

遠瞻岩石仰跂台躔竊惟起館開閣招延賢士禮貌若在相位某守縣所拘末由瞻拜旂幘以俟進退下情傾慕無任激切之至

上太守小簡

仲春之月即日共惟偃藩之暇豈第宜民神之聽之台候動止

萬福某謹具狀申問記史伏惟財察

起居常儀布在簡牘即乞上律天時俯遵月令浩養冲粹茂迎
純嘏以慰士民千里之志

竊以某官蚤歷華貫為海內名士踐揚中外勲闕甚盛方面之
寄畀何重矣上方鼎新治矩專用耆艾仰如執事德業地望亟
當入陪帷贊襄國論飛詔趣歸可拱而俟也

奔走執事感民之下舊矣閑散之迹留落湖海曾未獲接武于
門叨陪賓客之後塵惟是慕用名誼拳于此不孔自棄也惟
執事尚教誨收憐之厯陽偏訟簡溪山之勝魚稻之饒為疇昔

西州佳處中朝名卿才大夫往：厥直承明重外之寄以清談
坐嘯臨治之中和宣布發為聲詩播之樂府為世美談自頃叔
擾于茲二紀而蕪城未甚葺曠土未全耕蓋因循之治亦有可
恨者惟執事器識精深才猷通濟開藩未經時綽有譽處適此
帑廩虛竭官治紛拏之餘曾無一毫之歛橫及閭里為清靖之
化民皆樂之得賢之效其速如此幸甚

茲者執事布政云初某修桑梓必恭之礼于榮戟之下偶自前
月為浙右之行此方還自四明息肩却落而灾蹇之餘驚魂尚
恍病骨尪瘠未即造前少須安妥謹卜詹侍仰惟台慈俯賜矜

念

與太守小簡

張安國

中冬之月共惟開府之初神相吉德台候萬福疇昔欽繡盛名
又託年家之契願見久矣昨者旌麾來朝統幸一接有懷未盡
即日別去悵仰何窮東望軍牙尤切惓惓

四明令為輔郡選用非輕執事以天支之秀茂膺寄託上意隆
美政成未報亟當台還延佇延佇

頃寓居鄞郭餘十年王母馮夫人歿葬西山皇妣孫夫人以婦
從姑而世父待制公季父莆田丞公以子從母皆並其下故家
視四明猶鄉里執事以慈惠之師有來作牧布宣德意使田野
按堵民物康阜則死者有知抑將滲漉膏澤安于地下惟公念
之

蒙貺兩牋禮之過厚非所宜得蒙愧不能已屬方奉陪郊湮泆
日鮮暇未遑作荅尚當續致

歐公書豈惟翰墨之精而辭嚴義正千載之下見者興起某何
足以辱公此賜也哉而又先正所藏印色猶新輟公秘笈尤所
懷感

上太守小簡

玄冥司令寒氣彌嚴共惟卧護優閒明靈叶衛台候燕興萬福
某鄙陋微蹤日依覆庇高稽趨拜墀庶謹勤柔牘冒塵熒席修
詞茵鼎之誠備具右楮即辰未審台履復何如欽惟政平民詠
美化益新密有神天來介繁祉霜飈愈勁凝凜應時敢祈茂休
眷隆厚加頤衛別膺台拜下副士夫之望

共惟某官以忠誠結主知以豈弟牧民俗事親純孝接下謙和
其言行猷為舉皆過人遠甚是以下車數月續譽遠揚佇聆明
詔入贊岩即以展經綸之業屬邑下士祈願尤深

某疵賤小官比因走慶台階獲侍範誨深慰傾企之悰伏蒙寬
仁厚賜寵待又頒特遺之隆誠非屬吏所宜當者某感服恩憐
夙夜在念尺牘寸管難究謝誠

某違去光儀倏經旬浹瞻依慕戀之情無日少替方圖齋沐以
伸託府之問迺辱台慈先損珥翰仰認容愛之宏既感且愧不
敏之咎更丐原恕

某伏領台戒以朝旨搜訪晉唐墨跡及善本書籍俯委孱微廣
搜邑境某欽稟諄誨已徧託士人多方尋訪豈不敢徒為虛報
佇願得之別具申覆伏乞煥察

某寒薄迂愚苟祿代價愧無毫末之補每荷盛德包荒獲免汰

斥獨恨有正宰司使冗僚趨事之日淺耳然願入鑪錘寔期它日則承恩佩德猶未晚也也依懇之衷更莫於照台閱寶眷伏惟中表俱擁殊禱

支邑別有驅委乞賜台旨誓圖報効之方

上太守小簡

蕤賓紀節氣候梅蒸共惟偃藩多暇明神攸介台候興處萬福某愚鄙員益蒙德廕未獲瞻望台墀謹勒手啟上干典記仰詞養祗之儀具載右牘通日不審台况何似欽想化深恩洽天祐民懷戩穀之來日加繁衍當浴蘭角黍之時炎敲漸熾敢

覬勉承眷渥厚衛鼎茵亟登近密下慰卑悵之願

某官以周召申甫之才行龔黃台杜之政德風惠澤徧浹黎氓最課以書宸知愈厚佇觀多還廊廟熙載奮庸以康濟四方蕃宣之寄非久淹也

自故臘拜違台光忽見中夏雖依歸慕仰之心靡日不在屏憲而恪遵教條粗修微戒恨無可假以造府庭瞻望旌戟邈若雲漢伏楮凝戀神爽飛越

某疎逖凡下雖荷台仁包基不加鄙弃而每霄壤分殊莫敢頻貢采訥以瀆威重然聞有申遞列之劄狀未嘗不蒙矜照俯從

以是知大人君子寬宏逮下察其誠而畧其禮感悚之私交積
方寸毫緒縷、曷罄愚衷

上太守小簡 賀進秩

薰風謹候炎氣浸降伏惟卧鎮餘間天相人詠台候起居萬福
某竊食無補仰荷悒懔尚稽瞻拜履易謹具尺牘申詞記府申
候典籤恪載前幅未審通辰德候復奚若緬惟政治彌新慶休
駢集畏景日加敢祝仰懷體貌妙粹粹真前即環台式副士鄉
之論

某官蘊德業久大之資當運祚興隆之旦暫綏外鎮綽著休聲
進陟樞機諒當指日攀附鱗翼預切卑情

茲者恭聆光奉煥恩峻躋高秩見聞所暨鼓舞惟均某以賤事
奔走未獲趨慶台屏謹裁短啓實在別絨以輸雀躍之誠仰乞
深仁俯垂省察

去遠儀宇之久日覺鄙吝之萌恨未克走侍榮席徒勤山仰比
嘗冒貢愚訥審已塵玷台廡下情不勝榮幸區、依戀之私非
言可既

某竊劣職卑不通世務自承乏下邑日虞曠斤仰蒙某官愍其
孤貧而恕其不逮周旋覆露遂獲安職年餘可期善督某闔族

銘佩厚恩因知紀極更莫始終憐念俾永承于鴻造至禱至願

上太守小簡

天宇明爽伏惟畫諾之假荷愛神勞台候起居萬福某久託雲
庇末期恭待仰乞上体眷懷倍保嚴重謹具啓恭承

上問興寢已布前記不審比來台体何似仰惟含德弥厚福祿
繁衍秋序向高更莫善輔粹和晉膺寵台以副紳綬之係

某伏審先奉宸綸升華書殿公議胥協共惟某官清節孤忠凜
凜為播紳表頃居紀綱地危言勁氣上動冕旒今茲擁蕃宣之
寄政範休聲洋溢中外是宜有此褒擢拘縶無由稱賀省矐之

情倍百稠品

伏承聖恩優異中間或傳抗章力辭未即拜命以故修慶後時
罪涉稽怠無以自明尚恃台亮察其匪他尤以為幸

尺牘之間久不徹于毫席非敢偃蹇第以人微位卑數、坐通
梁訥恐貽瀆尊之誚故援毫而輟者屢矣至于引領熒輝如渴
念飲未能一償所願何當趨伏下風庶和台誨之一二臨楮稍
嚮

今歲境內雨暘應時嘉種繁殖有秋之慶夫何復疑春夏間雖
粒估善昂而民不告病善良按堵茲固豈第宜民鎮撫有方所

以千里蒙福日用而不知也然郡小地褊未足回旋行將入告
嘉猷均惠海宇遲暮之人寔夙夜以冀

上太守小簡

秋氣漸涼伏惟坐蒲黃堂天人叶相台候動止萬福某仰棲巨
庀末繇恭覲伏乞上為宗祐倍保台重謹奉狀申候養寢

共審光膺帝命暫領專城伏惟下車以來神民胥悅百順駢臻
某稍遠旌麾未遂覓趨稱賀伏冀台慈特垂矜察

頃年在雲川瞻望台範違離屢易星霜邈仰拳：自後雲鵬蓬
鷓聲迹易遠豈謂侍御暫辭白筆來擁彤襜而某乃辱在部封

之下其為欣幸倍越等倫

恭以某官才高德重為時偉人頃聞抗章力丐外補仰惟英風
義舉足以律貪革汙况朝家政欲澄源百執如侍御操履端方
不畏強禦自當峻陟中司使朝廷尊嚴顧此遠服豈能久留佇
聆迅台以安輿論

上太守小簡

季夏酷熱伏惟辦嚴曲暝神明靖共台候動止萬福某仰藉輝
潤行遂恭拜下情無任傾溯謹奉啟上承養寢

候問興居謹具奠儀比辰不審台履何如炎氣正隆敢旬節宣

時令謹護苗鼎倚須不次之擢伏楮謹禱

伏審光膺綸綍榮領郡符共惟歡慶某沉迷朱墨日不暇給不

果以時修貢賀幅罪涉簡慢愧負無以自容尚冀台慈矜恕

仰惟某官才華夙著時望攸歸雖踐更職仕而筮鏞大業未遂

發揮今茲遠服政恐未及下車而玉節促台凌厲要途此輿論

所期非未僚之私情也

伏自違遠台範荐更年籥傾養之素實積拳薄官僻左書問

不復仰塵記府今乃辱在奔走之列望塵非遠預切欣抃

上太守小簡

賀正

僭伸慶禮謹如右者王春布暖即日台候何似共惟偃藩清預

神明孚相對時受福寢其宜某苟祿小邦繫巨廕正賒恭侍

祇重詠思敢乞惠時倍音冲理佇調鼎雋庸副具瞻繼頌禱

言不盡意

引去麾戟屢更茲晦賤役執掌不克時扣台屏乃情瞻慕登寐

以之何當密侍坐隅一聽驅策東嚮悃系神爽飛馳

某竊食江濱日此悒悒之賜惟是汗簡所以將屬吏歸賴之勤

者宜相望于託室也而或奔走每以跪尊自嫌坐此采訥不

敢數浼台聽雖高明曲推情恕顧如簡率之迹何握管及茲無

喻愧恐三陽交泰萬寶棣通惟時哲人滋對殊祉椒筵密通趨
賀無階引領台閣第勤善頌

某官宿德雅望簡在淵衷留連符竹未快輿論履端之始賢以
類升竊揆要除旦暮可冀霽然霖雨以福蒼生實士大夫之公
願非某一人之私言也尚冀節宣慰茲傾禱

某不善製錦煨燠四間宏量有容少寬謹此謹修所未至無負
矜怜伏丐厚德孚亮幸甚

蘭堂室眷共惟均福新元壽筭人有千齡之祝也

上太守小簡

歲事更新共惟卧護名藩天人欽相台候動止萬福某行即趨
伏啓戟以祈屠拜先具尺牘仰干記史之聽

月儀之敬虔列右楮通辰霜色晴寒不審台履復何似仰惟政
成訟簡千里生春自天降康時萬時億更新上休簡記增德鼎
茵嗣聽促還以慰天下膏澤之望

仰惟某官行夷而識遠器博而用宏自早膺于眷知即荐更于
委寄固宜入陪禁索日罄論思而乃歛大惠于一州殊未足以
究所蘊然上方循名責實舉行神雀五鳳故事有如治最豈以
于外佇膺前賈之思即慶徵黃之寵此公議所不在非下邑小吏

趨事之初薦容悅于門下也

某早從播紳先生游竊服台望非一日矣勢絕雲泥無階一伸望履之敬若瞻斗仰徒劇此心茲者天假其便得以屬吏仰被約束其為欣幸豈勝名言何當即遂進望光儀以快疇昔臨風仰德心如川流

上太守小簡 賀正

王正謹始共惟坐鎮候藩明神欽相台候動止萬福某遐詹戟榮無階望履謹具采訥仰申記府之問

紀時祇詞虔列右楮適辰陽和布令不審台履何似仰惟擁幃佇聽賜環以慰中外之望

某官雍容和緩而發之以義剛毅果斷而濟之以仁故見于為政寬不失之弛而猛不至于暴使斯民善有所怙而惡有所懼千里之內熙々然日晏于中和之化公之所以德此邦者蓋無窮矣今茲履端之始孰不相與鼓舞祈祝願天報以福而長為吾民之庇然此特邦人之私也所以祈公者未大况節屆三陽在易為泰內健而外順當異不日促還進秉鈞軸使天下均被其賜則公施設可見矣有識所祈非敢為佞

揚芳大全文粹

卷六十

揚芳大全文粹卷六十

國家圖書館, NATIONAL CENTRAL LIBRARY, TAIWAN, R.O.C.



聖宋名賢五百家播芳大全文粹卷六十一

疊幅

通判 簽判 教官 諸司幹官

上通判小簡

壬春正月即辰共惟行旆舒徐神扶斯文台候動止萬福某三
沐三薰敬裁尺牘申玷典籤

寒暄申問已布左方不審邇辰台用何似仰惟^作觀物理與道
階行靈府虛明百嘉來舍春序向和更新上律天時俯遵月令
室練粹和茂膺龍光某無任珍禱

伏審恭承帝命榮倅候藩凡託悁懽增欣抃某忝以屬吏即
遂道左迎謁謹先具柔訥敬申燕賀之誠伏惟煥察

共惟某官踐履醇懿迨配古人學問洪深度越今世為文非道
不言橫放絕塵蓋其餘事上方登用賢俊石渠金馬首當問津
展驥治中興議拂然伏惟明詔擢除近在旦夕區區賀誠此筆
以俟某奔走執事聖名之下非一朝夕末學孤進無緣磨拜光
塵惟是尊仰道誼拳拳於此不敢自弃茲承鼎臨大府贊貳邦
條某幸預屬吏之末承顏色奉教誨有日矣私心慰喜何可比
量匄布叙莫究萬一

某學不聞道謬當邑寄纏困朱墨迄無善狀曠敗之虞旦世
負惟厚德君子尚教誨收於之俾免于戾幸甚幸甚某瞻望門
牆無任依戀之至

儲越申問台闕仙眷伏惟百福攸同下邑恐有使令拱聽要束
上通判小簡

仲秋謹時伏惟歲改雄藩閱沃多暇天佑神相台候動止萬福
某瞻望台階行遂趨承之幸下情預切欣抃謹具仰候起居
申候常儀已具右幅維時秋律寢清商飈向肅伏惟退聽餘聞
神相盛德養溉粹和福嘏增固更祈益調茵鼎前需台節下情

祝頌但切拳：

某晚進寒生佩服名德令譽之久無從一拜履約唯是景仰不勝拳切茲者天幸遂以孤蹤得託庥庇遵奉約束雖未能歛板堦墀仰瞻光範而夙昔嚮慕之勤已渙然冰釋矣何慰如之

某官業懷康濟志在經次粹然圭璧之姿允矣廊廟之具尚遲大用暫貳雄藩行膺治最之褒亟被清華之選當攄素蘊大集殊勲僉論所期可拱而俟

某庸瑣常流叨塵仕版再調銓部獲司理曹猥以孱陋得事高明之下幸可言耶尚須面奉規繩式遵軌轍庶逃瘵_瘵曠全以始

終魯情不勝至願

某不量疎繆輒裁小啟少敘獲託幷蒙之幸鄙辭陋句冒竇台重得賜容貸不勝幸甚

上通判小簡

賀正

勾芒司令寒氣未闌共惟歲撫間暇明靈叶衛台候燕興萬福某寒晚微蹤益_切蒙覆恩遠趨拜墀庶謹具手啓上涸記曹謹時修問之儀祇具彝禮未審近辰德履復何如欽惟佐政中和聲華日卽休祥駢集宥有扶持眷序肇開更祈惠時珍毓前席

密召

某官厚德鎮浮傑才拔萃暫勞別乘未厭輿評當茲享泰之辰
佇聞進登朝著茂建熏庸誦詠之深實非私臆

人元紀候萬彙浸榮共惟某官順迎喜祉休慶效新某以攝事
有拘阻瞻台席輒馳尺牘少代獻觴傾頌之勤言莫能既

去冬以微戩趨稟幸獲瞻侍台光深慰傾戀之誠迺荷眷誨尤
極銘感再違儀矩又復慈月豈勝山仰之私賤事慳愆未獲修
貢尺牘便介之來先辱台翰益服謙厚之宏味戴何已不敢別
具謝幅切覬恕察

某疎愚頑拙仰託德蔭竊食備員無補湏臾日懷愧惕更望憐
其賤貧垂加全庇俾終違于愆尤寔舉家之厚幸懇禱之情敢
祈洞察

上通判小簡

承問興寢敬遽爨式敢敘前幅歲律崢嶸冰霜嚴厲不審台履
何似諒惟閑決雍容冲襟泰定尚願茵鼎精護益綏福履倚需
迅召以陟華近某下情豈勝祝頌之至

某仰服台望閱歲滋久自惟寒微無繇進干典謁以奉光儀眷
拳瞻慕良役卑悰茲以天幸叨宰山澗獲隸部封以備指呼之
役趨覲伊邇預切忻榮

共惟某官碩德宏才蜚聲騰茂尚煩閑決以屈遠圖公輔之量
不辭佩刀召節之來豈俟駕屏星而行耶即登禁途以彰朝昔
得賢之盛公論所屬非某敢諛

與通判小簡

淑問大畧如右即日秋暑共惟閑決之餘尊候萬福某蒙恩方
茲承乏未由款門邇風不勝卷卷之懷謹勸恭候

幸同上壤夤緣考御自是姻家薄宦飄然未有侍坐聽言之幸
但劇跋仰暑氣未艾更冀調護茂對寵休以副區區之禱

某昨竊祠觀之祿窳伏湖山幾與世隔以故亡從通一書之勤

揭來行在又復擾、意生枉誨翰之辱禮數過當下情感戰無
以為喻某官學問根本蓋自家傳推其弃餘以貳邦政豈足以
煩游乃哉諒惟朝夕譽動冕旒必有晉擢以決輿望

某哀晚倦游久安閑放故令牽強以來坐待汰斥而誤息踵至
實出鄉黨平昔借助之素無緣占叙感激之私更勤慶問何愧
如之

上通判小簡

獻歲發春授時伊始伏惟貳政黃堂屆茲穀旦台候動正萬福
某備員無補仰託雲霓下情無任感著謹奉啟候問養寢

申賀之誠已布柔訥即辰茂惟神介靖拱哉穀繁集更祈精護
茵鼎妙用冲和即前不次之擢

去臘進中伏奉台翰振襟祇讀佩服撫謙下情感激無限諸需
不審即日台用何如伏惟炎暑戒塗不無少勞神用然一葦可
航之川朝發夕至更幾倍保崇重迎踐休祉不任願望

恭惟某官上庠第一流人學問文章譽望甚偉毘陵士子皆相
慶以為得師然恐席未煖而台節已在門矣某何幸親得見之
前歲幸獲瞻拜儀矩一見頓蓋礼意勤渠至今感藏不去心今
茲幸會遂得日親誨藥慰拊之懷豈勝言哉併容函叙

輒有短啟仰答來賜願辭鄙義拙不能發揚萬一第深皇懼一
讀置之乃幸

白閣仙眷共惟由中及外享福無窮

此間預有使令切望詳細下諭敢不盡心

與教授小簡

溽暑正熾伏惟趣裝良勞明神協相台候萬福某行獲依承尚
間伏覲加念鼎第以前台擢

自昨者一識芝宇距今許年雖間閱契濶不相間問然眷盛
德自不能忘今者獲聯王事將有朝夕承教之幸其為慰喜何

可比量多：布叙未究萬一伏幾照亮

某官學識文彩藉：在人宜登臺閣羽儀鴻鷺屈臨泮水未可
輿情然裨毘陵士子得所矜式日資博約底于成就亦矜佩之
幸遇也會聞褒召即有亨踐區之繫望

伏審光膺宸綽榮領泮宮伏惟歡慶某未遑修致賀悃豈意薰
仁亟沐誨函副以長牋之貺佩服謙摛言之不盡輒復以短啟
叙謝伏幸過目

與教授小簡

秋律已盡不審辦嚴豐餘尊候何似伏惟神相令德坐擁繁祉
未由省對致莫為時加獲齋寢早情勤頌

奔走莫望之下久矣末路無從恭際屬者津亭幸瞻履舄乃間
使舲遙邁竟不果畧叩緒言迄今遺恨堂在目坐阻至前卑
情尤劇倦

一昨睽間念欲附承起居而賤事無少隙方竊生愧竟蒙誨牘
光及不敏罪何所逃使介亟還馳報簡率併深震忤賜答幸甚
承啟途有目想惟齋舫已入郭矣遂有電裾候館之期豈勝欣
抃

與教授小簡

貞問已具別啟獻歲發春春惟吉德對時茂有庠社某竊食奉
親尚但稱壽敢莫為斯文加厚齒鼎以須簡拔

間違言面寢歷許時前日因巡齋一到服膺緬懷疇昔從容之
樂祇自感歎到家而來使踵門抵以手書：辭華潤慰薦存拊
溢于累紙非獨風誼絕俗獲警哀孺而問學之富見于筆墨父
子兄弟捧翫至紙敝墨渝不能已：屬元日趨朝歸而人事紛
紛勉作報狀未能如禮雖然使更稽留亦何緣能盡話也望寬
其罪平時士友皆謂壽基直諒多聞宜在論思風化之職不然
代言西掖發揮德意尤所優為今且老矣陪都師表多士：友豈

得無罪哉沈和仲日相見邵叔承不輟書皆能言動靜未即
而承臨問惋悵而已

兩辱惠書固荷高誼至于圖緘疊幅若待賢且貴者最爾何以
堪之從遊二十餘年乃不以字呼我未省所以得罪者皇恐皇
恐去年秋初蒙恩兼賤東宮日奉朝謁朝廷察其隔城非便因
許移園南荒薄何有每：叨冒皆自朋舊疇昔之私阻遠末由
謝劇慚荷

蒙分餉果寔皆京師歲節所須者時我時我山藥以餉老母尤
佩至意值冗未有以為報有愧而已

上提幹小簡

朱明戒候一氣清和共惟賓幕容與神示拱扶台候動止萬福
某謹奏記于下執事

遵月財絨已肅問幅不審適辰台用何似敬惟婉畫有相福祿
駢集更期揆序盛番天倪亟前不次之擢

伏承某官擇用剛辰已諧視象伏惟慶慰某官箴有守不克諧
賀謹申柔訥布叙微誠伏冀矜察

某官詩文家傳簪纓世績文章風采為當代第一流人久矣踐
揚固當躡躋華貫入幕外臺雖云畫諾所資未究底蘊第恐席

未以溫即被台除區：州縣豈能久駐濶步耶不敢為佞

某辱同里閉服膺偉望非一朝夕念修桑梓必恭之禮出處差
池願竟莫獲茲幸賢德鼎來忝隸屬邑所恨某之去暫不遠趨
承之日為淺耳或能假事受約束于大府敬當走見以倒屣

伏紙眷：

某學不聞道緣臨^友文邑亡何去此迄無善狀旦：凜然似賴敦
篤鄉誼周旋覆露不以罪行則為賜大矣敢布腹心伏乞矜念

與諸司幹官小簡 賀冬

裁賀之禮已具公式即日氣候凝寒伏惟贊畫履間神人攸介

尊候燕興萬福某僭員編郡密賴庇輝尚稽瞻對謹布啟承候
亞歲屆期湯施陰化伏惟君子履之茂膺純祉某拘守郡寄躬
慶未遑輒修緘以見誠悃其禱毫楮難殫

某官名德並彰器識兼宏宜在要途以彰素蘊暫淹畫幕未快
輿情佇聞乘此亨時榮躋貫式副願言之切

某非才代匱日借獎提雖感懷高誼造次不忘而因循倥偬久
缺記室之問謹因修慶以叙鄙情敢期煥察

與幕官小簡

初暑共惟蓮幕宴開尊候萬福引望門牆未有參覲之幸不勝

馳情謹上狀布執事

辭去忽見長夏雖更事倥偬而仰止盛德未嘗少忘即日為况
如何公餘戲綵有足樂否暑氣浸可畏敢冀留意興寢以膺不
次之除乃所願望

歲初伏奉誨翰爛然累紙佩荷不忘之眷豈勝下情念欲具報
屬到官公冗迄今未能少休日復一日竟坐不敏高明有以寬
照幸甚

桐川諸事如何高才淹留曹掾殊非所稱方急賢之朝旦夕定
當膺薦用也

典檢法小簡

維時孟夏共惟使幕雍容神示介相台候動止萬福某謹具柔
訥仰溷記史

申候起居不敢不肅近辰不審台用何似仰惟冲襟粹德宜介
禧祥更乞揆序慈普天倪亟前不次之召某忱請

伏審某官洎用剛辰已諧視事共惟驩慶某忝與僚屬之末禮
合候賀趨還下局坐是不果謹馳緘封以代面慶伏冀煥察某
幕用賢德歷年于此茲幸瞻敬慰浣尤劇別去光儀又復自決
西向拳：何可弭忘尺楮寸毫言不勝敘

某官德履純誠器度凝遠踐揚之久故宜平步夷途雅快人望
入幕外臺雖云謝決所資未究底蘊居止何薦書上騰即脩除
台區、州縣豈足以淹榮躅也不敢為佞

某庸繆魯下誤當邑寄歲糜月費亡補公家雖去替之期僅止
半載若何為善後計茲幸仰依仁庇尚冀周旋覆露不以罪行
則受門下之賜厚矣腹心是布頂踵知歸

縣官

上知縣小簡

交代

仲夏之月恭惟辨嚴容與神示欣相台候動止萬福某謹啓仰

溷典載之史

詞問之禮敢至丹三近辰梅雨靈潤不審台候何似冲襟盛德
宥有扶持更靳上為朝家益厚持養遂登臺閣之華垂副忱請
佩服瞻望之隆積有歲年敬問賢德屈臨邑寄於某辱在交承
稍喜幸自語繼自今詎惟識荆仕契伊此權輿屬以賤職受約
束于大府適邂逅台表又獲爭先睹之快慶抃之私不能自言
尺楮寸毫莫究萬一

某官圭璋真質梁棟標奇學識文采今代第一流人久矣踐揚
當在清近百里豈為大賢之路尚從此乘輿議拂然會當即有
成除鋒車迅召匪伊聞耳何幸得親見之

某政拙催科迄無善狀昨幸為任兩期之制某于前歲八月十
七日文割賊事全無告假補填亡何終更願言早賜叱馭非惟
獲奉教約亟令去此無以罪行門下之賜厚矣區區敢冀矜念
台閔仙聚共惟復茲中夏內外駢擁日新之祉
此間豈無委諭事件直下恐欲人使令併馬要束

其知縣小簡

仲秋謹序共惟承流宣化愷悌靖共天人欣相台候動止萬福
某不晚將遂瞻際之幸謹先勒款承候興寢

仰聞籍甚之譽望于播紳之久願一拜英猷而參商未遂下情
勤向鑿寐不忘通辰秋律向中源颺順序不審視履何似伏惟
撫字賢勞神明擁祐純嘏日增更祈調護寢饋逢迎太和魯悰
祝頌不勝虔懇

伏以某官襟量清夷器資宏博忠嘉貽厥世濟其美淹回百里
未究遠圖佇聞報政即奉綸音入聯華要以快輿言行將見之
非敢佞也

某連蹇孤蹤濫叨末第再注掾曹獲趨會府遂與賢明服聯王
事榮幸何多某赴官伊邇承顏接辭指日可俟下情預切欣快

與知縣小簡

冬律凝慘伏惟脂轄餘暇神示呵護台候動止萬福某備員蒙
免皆庇之及豈不知感敬勒此以謝先施敢蘄惠序珍敏天倪
即前峻名

猷聞令望服膺有年莫詰願見永懷道德鑒寐良勤天獎之幸
迺得以敝政上累交承晤言之便僅止數月其為欣愜未易言
受伏審簡自瀕泉來撫民社師帥所臨旌俛胥悅何當趨就下
風前叙慶慰瞻言千里徙倚不勝

竊自除日初下日欲為託室之賀屬僻左游客簡稀不獲承奉

都騎所寓用是竿牘亟受謙德所先雖高明無意苟礼然懈弛之咎何以自逭也面謝猶猜伏增愧惧

某官以一豪英蚤都美仕謂宜歷金門上玉堂為天朝之羽儀久矣州縣徒勞未快輿誦一同之選政恐難抑才亦匪伊嚴

召徑踐清華區諱泠何足回翔也嚮風有素不敢亂佞

某來此適累政權攝而承以懦庸反獎抹顛幾不能勝幸連歲

豐稔公私粗饒行且脫去又得明君子為之掩惡已傷之錦完

於敏手此情欣賴未易量也

與知縣小簡

薄寒伏惟尊候動止萬福某承乏無補未期會面敢望以人自

愛以前名權

使至伏承問字感慰并劇且審比日無字心勞政事有暇尊俎

文字其樂無涯相望懸絕引領拳

寄示屬文三冊燦若珠玉磊磊盈紙賞歎不覺寒家之暴富也

珍感珍感

忝幸同年不自知其不肖輒以賢者才德治狀薦聞雖曰僭冒

庶竊知賢之義以為榮耳

弟姪親戚寄治所儘明政能使之循理不擾縣道猶賢于思德

也至祝至祝

罪戾之餘西來無補正合法黜誤恩俄遷重有皇悞同年宜有
以補過而長棧作賀豈所宜乎仰承高誼不勝友側

惡詩反被之石以彰其謬慚皇慚皇棧紙分餉殊荷故人戀
之意某物聊奉篋笥非為報也

播芳大全文粹卷六十一

聖宋名賢五百家播芳大全文粹卷六十二

劄子 四六

賀丞相書成轉官劄子

伏審勒成鉅典褒進崇階增光慈禁之謨益重元台之望竊以
成周之盛祚蓋錫于萬年大漢之隆統爰接于千歲欲紹開魏
魏蕩之烈當纂為灝之噩之書恭惟某官曠代鍾才際空
蘊識燠和帝載乾坤已致于清夷精澤皇猷河維遂彰于經緯
某逃聆寵渥阻列慶班意第極于欣愉辭曷殫于頌歎

賀右丞相書成轉官劄子

伏審勅成鉅典起進華資聖治益光宰廷增重竊以方策有文
武之政寔啟佑于後人春秋無游夏之辭皆析衷于夫子茲續
累朝之會要寔資一代之耆英共惟某官毓粹自天研幾於聖
稷契自比已恢相業之崇姚姒上規更翼聖謨之煥某述傳寵
渥阻列慶班猥陳拙訥之辭曷極欣愉之意

賀蔣丞相免起復劄子

伏審星傳繼催必固共政露章疊懇姑免奪情雖光簡冊之書
甚鬱華表之望共惟某官壯猶奕世不業亮天不得臯陶為舜
之夏方需同德固俾阿衡專商之美更邁昔賢某夙荷洪鈞阻

趨崇仁

洪相

殿

伏以傳言之日老筆曰文兮澤三手臣言有之也女汗辱子星
揚于相業共值生申之旦猥陳頌魯之章共惟某官溫藉貞儒
規摹良弼識洞三才之奧謀周萬務之幾蓋天為生賢首贊重熙
之運而陽常居夏載臨初度之辰瑞色齊于泰階歡聲徧于
寰宇人若存分去之五百歲聖賢已契于心傳王曰公其以予
萬億年君相共綏於眉壽

謝洪相寄先正忠宣公集劄子

伏審勅成鉅典越進華資聖治益光寧廷增重竊以方策有文
武之政寔啟佑于後人春秋無游夏之辭皆折衷于夫子茲續
累朝之會要寔資一代之耆英共惟某官毓粹自天研幾於聖
稷契自比已恢相業之宗姚姒上規更翼聖謨之煥某述傳龍
渥阻列慶班猥陳拙訥之辭曷極欣愉之意

賀蔣丞相免起復劄子

伏審星傳繼惟必因共政露章疊懇姑免奪情雖光簡冊之書
甚懌華夷之望共惟某官壯猶奕世不業亮天不得臯陶為舜
之夏方需同德固得阿衡專商之美更邁昔賢某夙荷洪鈞阻
趨崇仰依歸逾切頌嘆奚窮

賀丞相生日劄子

伏以傳說之用若霖雨方宏濟于邦國吉甫之作如清風式顯
揚于相業共值生申之旦猥陳頌魯之章共惟某官緼籍真儒
規摹良弼識洞三才之奧謀周萬務之幾蓋天為生賢首贊重熙
之運而陽常居夏載臨初度之辰瑞色齊于泰階歡聲徧于
寰宇人若存分去之五百歲聖賢已契于心傳王曰公其以予
萬億年君相共綏於眉壽

謝洪相寄先正忠宣公集劄子

伏以新緘特貺先集併貽披五朶卯公之雲擁萬丈杜陵之色
三復而誦十襲以藏其惟某官間世傑才奕邦卓識悼賢父蚤
持于使節忠本朝久厄于虜庭周大夫過故都而傍徨嘗激黍
離之作漢太史次舊聞而流涕迺參石室之傳某茲捧成編猶
獲至寶在則有神物而護既歆夢得之詩光則與日月而爭尤
慕屈原之賦

被召謝丞相劄子

猥領將輸茂著涓塵之效誤膺收召惠繇陶冶之私即奔命于
道途預貢誠于竿牘伏念某觀風七聚閱歲再暮非才既賴于

忤懷苟祿遂逃於沙汰自陳滿秩妄祈老廟之怜豈意異恩遽
被鋒車之趣危衷倍激大造安鼎此蓋伏遇某官一代具儒兩
朝元老兼三公之事才懋經綸下遂萬物之宜咸資坎北有
如踈迹未忍弃捐望泰階之六符即容趣進播洪鈞之一氣尚
冀曲成

賀漕使被召劄子

伏審鋒車外趣黼宸前咨蓋方佇于對揚豈尚容于倥避恭惟
歡慶某受知特厚贊喜尤深側聽除音繼馳賓牘

賀漕使新命并子及弟劄子

伏審甄寵宸廷將輸鄉部播紳聳動原隍爭光共惟某官典刑
老成禮樂先進益官五紀凜不變于松寒訓子一經荐高攀于
月桂夙垂睿想特畀漕權某晚出鄉邦猥居臺幕望塵修敬即
迎大使之車洒翰投誠預貢小夫之牘

賀人召試入館劄子

伏審射策北門衆驚高妙校文東觀初臘清華現望日隆輿情
風靡伏惟歡慶某受知最厚贊喜殊深誦歎徒勤拙訥難盡

賀人召試入館劄子

伏審射策北門紬書東觀天將大任道可前知恭惟某官縉藉

溥深規摹閱遠鳳千仞而翔下馬萬里而洗空摘宋艷薰班香
兼收于衆作短劉墻劇賈鼎連中于兩科蔚有令名播于昭代
果自容臺之列音同冊府之遊集賢如堵墻嚮共驚于摘藻翰
林逼華蓋佇獨妙于演綸夫豈私期是為公望某愚雖自守者
亦何堪引方丈之舩已回于渤海登天台之陸庶望于蓬萊

疊劄子

與安撫劄子

伏以冬序凝寒共惟某官鎮撫豐暇神明協相台候動止萬福
某遠託恩庇未繇參覲伏冀為國自重

某違去旌幢于茲累年下情傾仰無物以喻一行作吏救過不暇追數初心每用慨嘆何當躬詣帳下盡布此懷臨書重增悵望某昔歲病臥山中伏聞登壇受鉞之寵扶憊占辭因一叟兵為慶迄今不返其浮沉殆不可保比遣使臣護緡至鄂渚再上記頗詳悉伏計已塵台座感念恩義有不能忘者不在書

疎密爾尚幸孚照

某遇以宣威之檄分校特奏名進士于成都用四十日始得歸中途下拜因永康所賜台翰跪坐以讀恩意慈祥寒暄為煖薄莫就道傍僧舍取火作記未謝萬一益深感愧之至

某資中方報代已蒙朝廷記錄繼下沈黎之命顧何以得此不敢忘所自也重增感愧然某衰病益侵行挂衣冠神武門下與草木同腐矣平生相知如公無幾輒布苦懷臨書凄斷
台眷上下均慶東蜀有役願受令

與安撫劄子

伏以春序漸暄恭惟某官坐鎮豐暇神明協相台候萬福某遠託恩庇末由恭覲伏覲為國以道自重
不審寢興比復何如均逸名藩上所眷佇朝夕不忘行膺褒詔榮歸禁林尚祈珍賚以副大夫士之望幸甚

某已遣孥累歸墓舍止留一影束裝待戍公私紛冗不暇亦聞
吾文目疾未平不敢以牋記屢觀覽區、懷仰與日增劇無從
一詣帳下臨書但有馳向

某不肖獲待罪士鄉踰年惡則有之善不聞也行以理去仰佩
保全窮途晚節之恩大不可言輒具啟伸謝伏幸台照

大安撫丞相劄子

伏以時維季夏熾以景炎共惟某官鎮撫春容黃堂靖謐神示
左右鈞便候動止萬福某三沐三薰謹裁染誦仰干典裁伏乞鈞

察

某謹時申候已具甲牘拜手敬詞適日鈞用之詳仰惟浩然之
氣上際下播靈府虛明百嘉來舍庚暑正隆敢乞居天運增忠
寢着仰符九重眷注之隆俯徇四海具瞻之望

某官以宗工鉅儒經綸素業贊襄黼扆勤勞王家弼成至治宸
眷益隆暫茲均逸候藩化行俗美列城如在和氣中元、和首
抑何幸歎第恐紫詔促歸朝夕左右以康濟天下非一邦獨私
大惠蒼生寔延頸以俟

某疎逖庸微邈在下僚仰視大府潭、何膏雲壤昨者不自量
分僭貢竿牘玷况輿隸之聽逮茲復拜緘封蓋以懷感德謹彈

布烟幅不敢自後冒犯之愆仰覲原貸

上安撫樞密劄子

伏以孟秋謹月敬惟某官偃藩優暇列城晏肅蓋載荐休鈞候
動止萬福某備員支郡仰承廕樾尚稽瞻拜履約謹是柔訥申
塵記府伏乞鈞察

申候苗鼎之儀恪布左方通日不審鈞候何以諒惟玉節光華
魏令整暇神之聽之福祉駢集更期忠調視履宣節兩賜仰符
當宇倚注之隆俯徇四海具瞻之切

某官負間世之才茂經邦之畧望隆玉佐名冠時髦用能賦政

樞庭納忠文陛暫辭清禁卧鎮全閩雖總列郡而承教條恐惠
一方而遺天下佇膺名節入拜制麻式符虛左之求永播處中
之譽愚非諛貢允屬師言

逖遠鈞儀荐更晦朔雖依歸慕仰之心靡日不在屏愚而恪遵
教戒勉守微戕恨無可假以造府庭惟幸日竊二天之覆苟道
曠^康涼欽戴抃荷寔無異親侍熒席也毫楮縷：莫罄卑悰

上總領劄子

伏以露往霜來共惟某官坐總賦輿四道蒙惠神明所相台候
動止萬福某奉託候諸侍吏